

JESUS CHRISTO

GA-U MATSITY AIMISHI

E-TSAAPUTYISHI



AMERICAN BIBLE SOCIETY

*Instituted in the year 1816*

NEW YORK

# THE ACTS OF THE APOSTLES

Hano niya (Keres Indian)  
(2M 1936)

HANO TSENI  
GOWA KATSANISHI E KADYATRANISHI



*(Key to pronunciation and writing)*

Gowa Katsanishi—Pronunciation	a	as in father
	i	" police
	u	" oo in root
	e	" met
	o	" note

**Gowa Kadyatranishi**—The Keres, or Queres, Indian language is written with 110 consonant syllables in series; one consonant syllable not in series; and five vowels, which also are syllables.

a	i	u	e	o	wa	wi	wu	we	wo
*{ ba pa	bi pi	bu pu	be pe	bo po	ya	yi	yu	ye	yo
*{ ta da	ti di	tu du	te de	to do	tsa	tsi	tsu	tse	tso
*{ ka ga	ki gi	ku gu	ke ge	ko go	sha	shi	shu	she	sho
ha	hi	hu	he	ho	cha	chi	chu	che	cho
ma	mi	mu	me	mo	*{ tya dya	tyi dyi	tyu dyu	tye dye	tyo dyo
na	ni	nu	ne	no	nya	nyi	nyu	nye	nyo
ra	ri	ru	re	ro	*{ tra dra	tri dri	tru dru	tre dre	tro dro
sa	si	su	se	so	shra	shri	shru	shre	shro
					hya				

\*Sometimes, but not always, interchangeable.  
Sometimes a consonant replaces a vowel; for example, *siipe* becomes *sippe*, etc.

Any syllable of the five series *tsa tsi tsu tse tso*, *sha shi shu she sho*, *cha chi chu che cho*, *tya tyi tyu tye tyo*, *shra shri shru shre shro* may lose its vowel by elision; for example, *tsitsi* becomes *tsits'*, *shiku-hima* becomes *sh'ku-hima*, *niechaku* becomes *niech'ku*, *tsiwa-himatyishi* becomes *tsiwa-himaty'shi*, *shrukukitsitau* becomes *shr'ku-kitsitau*. The vowels *a* and *u* when coming together sometimes become *ō*.

# JESUS CHRISTO GA-UMATSITYAIMISHI E-TSAAPUTYISHI

- 1      THEOPHILUS,—Tsaya tsidyatrani e-suitranishi, sai  
tsi Jesus shru e-tsitranihi e e-tsayasomeshitanishi  
2      niya tsa. Towa she menashru gayaatawishi umatsi-  
tyaimishi dyika ye Tsityumi Maiani niya e-tsayayani-  
kuiyanishi si yuku, si dyu tsiuyutseyi emi tsaashityi  
3      hema. E tsika kunatyumenishi si yuku, naoya kai-  
matsitratyanishi niya towa umatsityaimishi ye kutyie-  
mitra, tsiianishi, emi e tyana-wa-katsi sai tsaashityi  
hatsu wa hawe nu chutyiemitra, e Iusi itye tseshra  
4      niya tsi e-chatsasu. E gayawatyami, tsayayanikuiya  
tsatsi Jerusalem si yuku utsutsi, etyu uyukami Naishi-  
5      tyia ga-mani. She e-chatsa: Towa tiukanatyishi. She  
John kaimatsi tsits' niya baptisma tsayatra, etyu tui si  
yuku tsatsi mame naoya tsaashityi Tsityumi Maiani  
niya baptisma niyatratrakunishi.
- 6      She kayiwatyami tyiupetawa, tania: Huchani,  
Gaityi shru Israel dyika ye itye tseshra hau si e-nitra-  
7      tru? She e-tyayitsakuiya: Tsatsi emi e tseshro niuto-  
nimasa-kutrusatyishi hamatsa kashraityi ku tsaashityi  
8      e-naaitrakunishi. Towa Naishityia noyu ga-itye tseshi  
e-tsitra. Etyu hishrome ishatsini neyeyaape-kutru-  
watrumasa, Tsityumi Maiani hawe nu kutruwauatsinyi,  
she sa-shityishityiku n'taapu-kutrusa, Jerusalem dyu,  
e sai Judea dyu, e Samaria dyu, e hatsuma shra  
gaishibishra.
- 9      She towa sai tsi e-katsani, kumekumeshatyi, si dyu  
tyiyutseyi, hinatyi tyipunaii, she shru tsatsi na tyiuka-  
10     chanatya. She tu na ai si tsukunishi howaka dyika ye  
dyu kumekumeshatyi, Mu, dyue hatrutsai ai si tyayi-  
11     chani, shichamutsi tyaa-wakuni. E tsika towa hatrutsai  
tyaanikuiya: Galilee-me hano, Tsekoma howaka ye

## E-TSAAPUTYISHI 1

dyu kutruwayukai? Towa Jesus, hishrome dyika si howaka dyika ye tyipunaimishi, emi e howaka dyika ye tsukunishi shrukuchanatyishi, emi nushigayuku tsika na hawe si tsunyeku.

- 12 She shrue Olive kotyu si Jerusalem dyika hau si tyeetyu. Olive kotyu Jerusalem dyika si tsatsi tiye
- 13 tsanu, tu na uanatrani tsaashityi itye ani ta. She hau si tseetyupi, ai gaatrutyishi dinyi gaya ye dyu tyeepu, haupa Peter e John e James e Andrew, Philip e Thomas, Bartholomew e Matthew, Alphaeus ga-mutyi James e Zealot tsaaniatyishi Simon e James ga-mutyi Judas.
- 14 Towa sai haupa tsiwashrani, gowahimatsi tsa- tsutru tsishi ye amoma-taapu, ku gayatsi e tsika Jesus ga-naia Mary, e ga-tyumutyaimishi.
- 15 E towa si haityi tsaashityi, kaya-tyumutyaimishi ai suna si Peter chutyatsi, (naoya hano chayawatyami, hatyi tsi katsi-wa-katsi si dyu dyuya katsi), tyanata:
- 16 Sa-tyumutyaimishi, Sekka Tsidyatrani e-naaitraku, emi David tsiika niya Tsityumi Maiani hama e-katsanishi, Jesus tsityattatyishi gayitrutseyanishi Judas niya ka. She kutaatsi shikaya-uishityityani e towa utanitranri kishau. She towa hatrutsai hatsi taape, ga-ukitsishi dyia kauitsuwanishi niya: E yani nu kau-tyaitsani, suna chaaoshatsita, e sai ga-yawani chaauwakatsa. E sai Jerusalem-metra chuwatyu, emi heya ga-tsenishi niya he hatsi tania: Akeldama—towa tsityarapatyi niya, hatsi ga-matsi-shityimishi, e-tania.
- 20 She Yuni Tsidyatrani dyika nu tsidyatrani:

Ga-ama tu pee, e tsatsi hau hano ai dyu paatran; e ga-yapi hau ishika payaou.

- 21 She sai hema Jesus Huchani hake tsutsi hawe tsutsi
- 22 sutruwataa sayiwatyimetyishi si yuku, emi e John ga-baptisma si yuku menashru emi eyu tsaashityi si dyu tsaayutseetyi, hinome sutyeeema si yuku, towa si ishike sekka ushitoni si dyu tsiipatyunishi niya shityishyiku naaitraku, sutruwataatsi. E dyue tyayaatawa, Barsabas tsaniatyishi Joseph (ga-hano E-gashi Justus),
- 24 e Matthias. E amoma-taapu e tyaana: Hishrome,

## E-TSAAPUTYISHI 1, 2

- Huchani, Sai hano ga-winoshikatyishi shrayitrunimishi,  
25 towa dyue si haityi shru-taanishi tyiemi paaitra, hau  
towa utanitrani e umatsani niupuku, emi Judas tsaa-  
tsamitanishi, emi heya noyu ga-tseshra dyika ye  
26 tsunyekunishi niya ka. E chayinaani, e Matthias  
tyishia, e katsi-ishike-tsitra umatsityaimishi dyika  
taauishityityana.
- 2 She shru Taama-wa-katsi Tsaashityi Bashruku  
tsaashityi hau chaaitrani, ishikaku ye sai heme ai  
2 chayiwatyau. E tu tsiwatyi howaka dyika si nu mame  
tsishatsishi tseeshitayanishi natrani tsiukanishi chu-  
shrugayunishi ta, e sai katruty, ai chaatanishra, guta  
3 tyiupu. E tyiemi tyiwautra peetatsishi kutrukanishi  
kushrugayunishi, e nowaina hawe dyu tyiwayata.  
4 She sai haupa Tsityumi Maiani niya chatrukaii, e  
nanami tseni niya shru tyatsia, emi e Maiani atsani  
tayatra.
- 5 E Jerusalem dyu ai tyaatru Horiyu hano, kayu-  
6 kaiityishi, sai gaishibishra dyu shra hatsi si. She  
towa tsiukanishi ga-kanityi, tsi hanowishi chayiwa-  
tyame, e gowa tyiwautra, she haupa nowaina noyu  
7 ga-tsenishi niya tyiwakana. E sai haupa chaaputsani  
imi ma tayatra, tyanatani: Mu, Gao tsa towa katsia-  
8 tyishi Galilee-me taapu? E gowa sutrakani nowaina  
noyu shra-tsenishi, emi hawe sutraityianishro-me?  
9 Parthyia-me, Mede-me, Elam-me e Mesopotamia dyu  
gatrutyishi, e Judea dyu, e Capadocia dyu, Pontus dyu  
10 e Asia dyu, Phrygia dyu e Pamphilia dyu, Egypt dyu e  
hatyi Libya si Cyrene ai shriena dyu, e Roma si  
tsekkuishi, haupa Horiyu hano e Horiyu dyika tsiwah-  
11 matyishi, Crete-me e Arabia-me sutra-kasutyi shra-  
tsenishi niya Iusi imi ma tseshi ga-tani katsiatyishi.  
12 E sai haupa chaaputsa tseetyutsi gowa tyiwautra e  
13 chayania: Tsi gao towa? Etyu mika tyuwamayanikui-  
yana tyaana: Natsi wino chatrukaii.
- 14 She etyu Peter, katsi-ishike-tsitra kutaatsi ai si  
tyuchani, tsishatsi e-chatsa tyayitsakuiya: Hishrome,  
Judea-me hano e sai Jerusalem dyu kutratrutyishi,

## E-TSAAPUTYISHI 2

- 15 towa putonimasa e sa-tseni trakanatyi. She towa tsatsi roku-tsayatyita, emi e shinaetranishetyishi, she tu na chamie ura dyika tsaashikanishi kaaitrani;
- 16 etyu towa emi tsa prophet tseshi Joel e-katsanishi tyanata:
- 17 E shichai-me tsaashityi e-naaitraku, Iusi tyanata, sai tsini dyika dyu sa-Maiani uanye-si, she kutra-mutyityaimishi e kutra-makutyaimishi niyesome-shita-kusa, e kutra-shruyatityaimishi tsi uwakachani niwakachanikuiyana-kusa, e kutra-hashityi tsaaputyishi hitseshityi nutrayaitseshata-kusa.
- 18 Ha, Emi tsaashityitraty a ni sa-tanitranityaimishi, hatrutsai e kuitsa, dyika dyu sa-Maiani uanye-si,
- 19 e niyesomeshita-kusa. E howaka si nu imi-ma tseshi niyewatrani-shrawatruma, e ai nu hatsi dyu tsityemitanishi, matsu e kutrukanishi e nachainime napupuka. Oshratra tsamishityutsi dyika ye wa naaitraku, e tawatra matsu dyika ye wa, tsa na Huchani tsiutsaashityi hawe naaitraku, emi tsi-chuni e tsaanimasatyi. E n'taku hau tsi Huchani E-gashi dyika ye tsishratranu nitraguku.
- 22 Israel hano! Towa mani trakani: Nazareth-me Jesus, wa emi Iusi anye tsiutranishi hatrutsai tsa; emi e kutruwataatsi Iusi emi niya e-tsitranshi ishatsini niya e imi-me tseshi niya e tyiemitanishi niya tyiemi
- 23 kutrayiwatrani, emi e trutyu mu shrutonimasa; emi Iusi mishru kuushranishi tsiuwayanishi e mishru kutonimishi tsiuyaani, emi heya hishrome, tsatsi uyukai tsiyukaityishi gayamashityi niya shrukuchatsi
- 24 si nu shitottyana e shrauttawa. He emi Iusi si dyu tsiipatyunishi, ushitoni kawasanishi e-tsataoinaiii; she
- 25 tsatsi e-itye nityatyi-tyiuma, ushitoni niya. She David kutsi niya e-katsa:
- Dyutyishrutsi si-wawi ai yani Huchani si-ukacha, she shrumikaway se-mashityi ai gaa, emi heya
- 26 tsatsi niuwukutsi-shikunu; she se-winoshika tsiuishityiaani, e si-wachu tsiuishityitraty; mina mame sini tsinaetranishi katrutyai niiku; she sa-maiani
- 27

E-TSAAPUTYISHI 2

ushitoni niya tsityatyii tsatsi tu nitrashrunu; e  
tsatsikutra-Tsityumishi niuyaani-shrunu, ukachani  
kushratyi. Iani ga-hiani tyiemi tiutrani, suutyisut-  
yunisti niya niuishityiamewita-tiuma, shikutaani.  
28 Sa-tyumutyaimishi, David kutsi niya kaimatsi  
nyeyimina-shrawatrumanu, emi e shikaewa kushityishi  
e tsityaitsimishi, e towa tsaashityi hema tsityaitsimishra  
29 tui gaa. She prophet tseshi tsaani, e kutoni Iusi  
kaakaesuni niya tsaakaesukuiya noyu ga-washityi si  
ga-dinya-ukuyanishra ai si dyu ishike nikuyatyunu,  
30 e towa mishru kukachani Christo ga-ushitoni si dyu  
tsipatyinishi niya tyamashra, emi e tsatsi ushitoni  
dyika ai pii-tyiumanu, e ga-tsini tsatsi tyiukacha  
31 kushratyi. Towa Jesus Iusi si dyu tyiipatyu, e emi  
niya sai shityishityiku sutaapu. She Iusi shrumika-  
waya ga-mashityi niya mame dinya tyitra e Naishityia  
32 si kaimatsi e-katsanishi chayaou ni Tsityumi Maiani  
nyeyaapikunishi towa shrukachanatyishi e kutraka-  
natyishi ai si nu uatsa. She David tsatsi na Kaunamatsi  
33 ye si dyu tsukunu, etyu noyu e-katsa:

35 Huchani sa-Huchani dyika e-katsa, Shrumika-  
waya se-mashityi hewisa chukuiya, menashru  
kutru-iyani satyishi kutra-ashityi ga-ashityitratsi  
e-neyatra-si.

36 Emi heya sai Israel katrutya kaimatsi piutonimasa,  
Iusi towa shrukuchatsi si shitottyanatyishi Jesus  
e-tsitraniishi shikaewa Huchani e Christo.

37 She e shru towa gakanatyi, gaya-winoshika ye  
ayama-tayatra, e Peter e mika umatsityaimishi dyika  
tyayania: Tyumutyaimishi, Gowa e-nitrana-shrusa?

38 She Peter tayitsakuiya: Chuwawataipunaime e baptismal putrayatrana, haupa nowaina, Jesus Christo E-gashi niya ka, emi heya kutra-ukitsishi nyeyatoinaimiku niya ka, e shrue Tsityumi Maiani nyeyaityanitta-

39 kutruwatruma. She towa kaimatsi tsatsaanishi, wa  
emi hishrome dyika, e kutra-iatratyaimishi dyika, e tiye  
hema ai shra tseemishi dyika, hatsu tsi Huchani sutra-  
40 Iusi niwapeotsakunu. E mi na naoya tseni niya

## E-TSAAPUTYISHI 2, 3

41 tayiwatonimewa e tyiwakashitaya, tyanatasu: Towa  
yukuma tsekkuishi hano si chayitragumi. She e shru  
ga-tsenishi kayaawatyishi baptismal tayatra; e hau  
42 chaaityaau hatyi tsi chami miri hano. E umatsityai-  
mishi gayasomeshitani e-taapishi, e kayiwatyise-  
tyishi, e semita utsayutsitanishi, e amoma-utranishi,  
tsa tsutru-tsishi e-taapu.

43 E sai hano uputsi tayatra, e umatsityaimishi niya  
44 naoya imi-me tseshi e tyiemi tseshi tayatra. E sai  
heme tsiwahimatyishi chayiwatyame, e sai tsi ishikaku  
45 tyayashita; e hau tsi tsayiwishranu hema na gaashe-  
tyishi e tsi ayutyani gashityishi tyishityia, e sai haupa  
46 dyika ye tayachani. E nanu tsama ai tsityumi katrutya  
gaya tsiwashrani tsa- tsutru-tsishi taapu, e katrutyishu  
semita utsayutsi tsiwauishityia ni, e ishikaku ga-  
47 winoshikatyishi tyaape, Iusi gouamashitanakuiyatyi, e  
hano haupa nowaina dyika anye-tyiwatrutsityishityia.  
E nanu tsama Huchani hau tayawitayani hautsi  
tsiuitragumishi.

3 She e shru Peter e John tsityumi katrutya ye dyu  
tyeeyu, amoma-utrani chaaitrani, emi mayuku dyika.  
2 E hau hatrutsai, ga-naia ga-washrani si yuku ku-  
kusutsitanishi, hawe taatyityianisha, nanu tsama ai  
tsityumi katrutya anye tsaanimasatyishi tsiamyu  
nu taaitsise, tsityumi katrutya dyika ye hau tseepusushi  
3 umatsani uwautaani. Towa hatrutsai Peter e John  
kuukachani, tsityumi katrutya ye shru n'tyeepetyuuni-  
4 shi, tyuwittaa umatsi ayaawi. E Peter shrami kuka-  
5 chanikuiyani, e John, tyanata: Kuukacha! E tyaachatra,  
haityi tsi ayaawi tyinaetrani nyeepetyu-tsiumanutyu-  
6 tyishi. She etyu Peter e-katsa: Shichamutsi sawaka e  
uru tsatsi shikaashra, etyu tsi sashi nyeou-shroma.  
Nazareth-me Jesus Christo E-gashi niya aanitrutyeaya.  
7 E shrumikawayga-mashityi tsityati, dyu tyiunutsi;  
e tu haikamiku ga-ashityi e ga-ashityi-butru tsishatsi  
8 taaitra. E dyu chutotsani, chutyitsi, e shru chaani-  
trutyeaya; e ishikaku tsityumi katrutya hake tyiepu,  
gaanitrutyeayani e kototsitani e Iusi ga-uamashitani.

### E-TSAAPUTYISHI 3

- 9 E sai haupa ai tseemishi tyiukachana ga-anitrutyeya-  
10 nishi, e Iusi ga-uamashitanikuiyanishi; e tyiwittawana  
emi tseshi ai tsityumi katrutyta anye tsiamama yuwisa  
gaapishi, e imi-me tayatra e gowa tyiwautra, he  
hatrutsai dyika e-tsiutranishi niya ka.
- 11 E Peter e John tyaatyatyini, ai tseemishra ye sai  
haupa ai tseemishi hau shru ni chayapetsa, Solomon  
gashi tsaanimasatyishi portaru tseshra ye, mame imi-  
me tayatrani.
- 12 E Peter towa kukachani tsi hanowishi dyika tyayi-  
peyuta: Israel hano kutaaputyishi, Tsekoma towaya  
imi-me kutrayatra? ku tsekoma tyu-uamekumesha  
tyemeshru tsi noyu sutraa-ishatsini niya, ku sutraa-  
uitonimishi niya towa hatrutsai aanitrutyeyani sitranu?
- 13 Abraham e Isaac e Jacob emi sutra-naishityashi ga-  
Iusishi ga-mutyi Jesus ga-uamashita, emi hau shi-  
kuyanatyishi e ai Pilate gaapi shi-ushranitatya, mishru  
14 ku-tsityishitani si nikuya-tsiuma. She etyu tsatsi shi-  
ushranitatya emi Tsityumishi e Tsitonimishi, e shru-  
wauttaana tsayamutyitanishi si ayiwatyityi, hishrome  
15 dyika, e iani ga-Huchani shrauttawa, hau Iusi ushitoni  
dyika si dyu tsiiapatyunishi, emi niya shityishityiku  
16 sutaapu. E E-gashi tsiuhimatyishi niya ka towa hatru-  
tsai tsishatsi tsiutranishi, emi e shrukachanatyishi e  
shrunimasatyishi. Kaimatsi Jesus kutsi niya tsiuhi-  
matyishi towa shrami si unatsani tsaapishi sai tui ku-  
17 tyeema. She shrue-e-shru, sa-tyumutyaimishi, si-  
utoni tsatsi shru-wittawanatyishi e-shitrana, emi e  
18 tsika kutra-yani-tsaaputyishi e-tsitrana. She etyu  
Iusi mishru tyiemi tsitranishi sai prophet tsaaputyishi  
tsaya-ka niya, emi ga-Christo nunatyumekunishi, emi  
19 taa tsautranitta. Emi hey a chuawataipunaime, e si  
chayaishigutra, emi hey a kutra-ukitsishi niukayawiku  
ni, e shrue emi hey a chitye shratsaani e-naaitraku ni,  
20 Huchani gaapishi niya ka; e tsika emi hey a Jesus,  
Christo tseshi, hawe si nikuya-tsiuma, kutrayiwataata-  
21 wityishi, emi sekka Kaunamatsi niushutsikunishi me-  
nashru sai tsi natsi niutraniku ni, emi e Iusi hamatse si

### E-TSAAPUTYISHI 3, 4

- 22 yuku ga-tsityumishi prophet tseshi tsaya-ka niya e-katsanishi niya. Kaimatsi Moses e-katsa: Iusi Huchani tseshi kutra-tyumutyaimishi si yuku ishike Hinome-me prophet dyu nyewatatyini-kutruwatruma; sai tsi kutrayitsakuiyanishi niya nutrachatrashi-kutrusa.
- 23 E naaitraku, sai heme maiani tsi tsa he prophet dyika gachatrashanu, hanowishi dyika si nyeyataanaku.
- 24 Ha, E tsika sai heme prophet tseshi, Samuel e emi hamashu tsaaputyishi, sai heme gamashranatyishi,
- 25 towa tsaashityityishi niya tsippena. Hishrome prophet tseshi ga-mutyityaimishi kutaapu, e Iusi kutra-naishittyashi dyika ushrani tsayatranishi, Abraham dyika e-katsani: E kutra-iatra niya gaishibishra dyu sai tsi shra
- 26 kui tse hano neyauamashitaniku. Iusi e-dyu-tsiipattyuni ga-mutyi, tsaya hishrome dyika tsikuya neyauamashita-kutrumani, sai haupa nowaina kutra-ukitsishi si yuku nyeyashigutrai-kutruwatrumanishi niya ka.
- 4 E tsi hanowishi gayiminatyikuiyanityutsi, chayani-tyitra e tsityumi katrutya ga-yani tseshi e Sadakai hano
- 2 hau tyeetyu, tsi hanowishi gayisomeshtanikuiyanityutsishi e ushitoni si dyu uipatyuni tseshi wa emi
- 3 Jesus niya tyiwapatanyutsishi niya, mame kui tyiwau-tra. E gayamashityi niya taatyatyu, e mi nanu hema
- 4 utsitani dyika taapunaime, she shru shaputra. She etyu naoyatsi towa mani ga-kanatyishi tyiwahima e tsiuishityityani sai hatrutsai taama miri chaaitra.
- 5 E nanu e-chaaitrani, chayani tyitra e tsaya-tsaaputyishi e tsidyatrani-kusana e tsika chayani tseshi Annas e Caiaphas e John e Alexander e hatsu tsi sai heme
- 6 chayani yani tseshi gawityaimishi ai Jerusalem dyu
- 7 chayiwatyami. E ai suna si nu tsaakuiyanutyutsi tyiupetawa: Tsi kui tse ishatsini niya e tsi haityi E-hashi niya towa e-shitranu? She Peter, Tsityumi Maiani
- 8 niya chukai, tyayitsakuiya: Hano dyika yani kutaaputyishi e tsaya kutaaputyishi, Tsi emi wai tsa kunatsansi
- 9 shi hatrutsai dyika tawa e-utranishi niya shikaayaipatyikuiyanu, tsi shi dyia towa hatrutsai tsiutragumi,
- 10 Putonimasa, hishrome sai haupa e tsika Israel sai hano,

#### E-TSAAPUTYISHI 4

- Nazareth-me Jesus Christo E-gashi niya, emi shrukuchatsi si nu shitottyanatyishi emi Iusi ushitoni dyika si dyu tsipatyunishi, emi niya towa hatrutsai tui yani si
- 11 kutruwawichani, kunatsaani. Towa emi yaoni tsa, hishrome shaatratyia yuku shikuyanatyishi, emi shukuna ga-nushika tsiuitrani. E tsatsi hau ishika niya uitragumi tsanu, she howaka si nu tsatsi hau ishika E-gashi tsanu, hano dyika tsaapi, emi hey a sekka nye-yatragu-shikuwatrumani.
- 13 She Peter e John kuushigitsishi kuukachanatyi, e tsatsi gaasomeshitani e tu tsu puta hano tseeshi tsiiuitawanatyi, imi me tayatra; e kuutsi niya tsiiuitawanatyi
- 14 Jesus kayiwatyisetyishi. E tsiusaipunishi hatrutsai ai si gowauichanishi kuukachanatyi, tsatsi itye gowa nutratisatyusatyanu. She etyu e-tsawayanikuiyanatyi
- 15 ayawatyami dyika si yuku utsutsi, ai shra chayapetawa,
- 16 tyanatata: Tsi kui nyeeitrana-sutrusa towa hatrutsai? She kaimatsi imi me tyiemi tseshi e-tsiutrani, kuutsi niya sai Jerusalem dyu shikaamanu tyiemi tsiwautra; e
- 17 tsatsi itye-sutyaaputra atsan tsa kaimatsishi. She etyu tsatsi mi na ai shra hano dyika tsuupetanishra niya ka, shrao, niiuyetsana tui si yuku tsatsi towa E-
- 18 hashi niya hau hatrutsai dyika uminatyi. E si tyuopeotsana e tyaayanikuiyan tsatsi hama na Jesus E-gashi
- 19 niya atsan ku ayasomeshitani. Etyu Peter e John tya-  
yipeyutanu e tyayitsakuiyanu: Iusi kukachanishi si  
haityi tawa tseshi, hishrome dyika achatrani ku Iusi
- 20 dyika, puwittawana. She tsu si-ukachanutyutyishi e  
sutraakanishi ishika atsan tsatsi itye-shikuunu.
- 21 She tsuuyetsanatyi taatoinaime, gowa e-niutsitana-  
tsiumasatyishi tsatsi tsiyainawatya, hano katrusti niya,  
she sai haupa Iusi tsiuamashitana, e-tsitrani niya.
- 22 She tawa utsaipunitseshi tyiemi tseshi e-tsiutrani  
hatrutsai mishru tyana-wa-katsi ai yuku nu kashraityi  
tyaa.
- 23 E tsaatoinaimeti noyu gaa-hanowityaimishi dyika  
ye si tyeeyu, e chayani yani tsaaputyishi e tsaya tsaa-
- 24 putyishi sai tsi kui e-tsaatsakuiyanishi tysiappenu. E

## E-TSAAPUTYISHI 4

- 25 towa gakanityi, ishikaku Iusi dyika ye dyu tsishatsi tyamashrana tyana: A Huchani, Kaunamatsi e hatsi e kawaishro e sai tsi ai nu tseepishi shrayauitrani, emi Tsityumi Maiani niya kutra-tanitrani David tsika niya e-kutratsanishi:

26 Tsekoma nanami hano kaaatsayawa e tsi hano-wishi tu ma tseshi kaatrutsityishita? Hatsi dyu Rai tseshi kashranatyi e yani tseshi kayawatyami, Huchani hake wa, e ga-Christo hake wa.

27 She kaimatsi towa tsaashityitra dyu, kutra-tsityumi-Iatra hake wa shikaewa Herod e Pontius Pilate, nanami hano e Israel hano kayiwatyamishi e-utranii haityi tsi kutra-mashityi e kutra-uwayanishi mishro tsiiushra e-naaitrakuni. She e shru, Huchani gayayetsanishatyishi pukacha: e kutra-tanitranityaimishi payiwartrani mame ushigitsani niya kutra-mani atsani, shramashityi hawe shitrani utsaipuni, e tsika emi heya tyiemi tseshi e imi me tseshi e-niutranikunu, kutra-tsityumi-Iatra Jesus E-gashi niya.

31 She amoma e-tsitranyi, ai kayawatyamishra tsiu-wukutsa, e sai haupa Tsityumi Maiani niya chatrukai, e kowashigitsishi niya Iusi ga-mani tyayamashra.

32 E naoya tsi tsiwahimatyishi ishikaku gaya-winoshi-katyishi e gaamaianityishi tyiwautra, e tsatsi ishike puta kaayuttyanishi tyanata gashi, etyu sai tsi ishikaku gaishimetyishi. E mame tsishatsishi niya umatsityaimishi hawe tyiitana Huchani Jesus ushitoni si dyu uipatyuni shityishityiku taapu. E sai haupa mame tinye-awatruman-i-tyiwautra. E tsika tsatsi hau tyiwataa tayiwishi, she hatsi e katrutyi gaishimetyishi tyishana, e tsuishanishi kayamishi hawe chaatye e umatsityaimishi gaashityi ai nu tyishana, e hau tsi tsayiwishranu hema na sai haupa dyika ye tayiwachanitta.

36 E Joseph, umatsityaimishi niya hano E-gashi taai-shratrana Barnabas (towa tsityarapatyitrani ayakashita-yani ga-mutyi ta) Levi-me, Cyprus-me hano, ga-atsi tyicha e sawaka hawe chaatye e umatsityaimishi gaashityi ai nu tyisha.

## E-TSAAPUTYISHI 5

5      She etyu hau hatrutsai Ananias E-tyashi, e ga-okui  
2      Sapphira, tsi gashi tyichanu, e kayamishi hatsu yuku  
3      chaatyumenu, ga-okui tsika tsiushrani, e hatsue hau  
3      chaatye e umatsityaimishi ga-ashityi ai nu tyisha. Etyu  
Peter tyanata: Ananias, Tsekoma Satan kutra-winoshika  
kutyrakaii, emi heya Tsityumi Maiani dyika  
nuippetra-shru ni, e hatsi kayamishi hatsue naatyume-  
4      shru ni? Tsa na tsityimishi gao tsa trutra? E shru  
tsityimishi, gao tsa kutra-itye tyitanata? Gowa shra-  
winoshika dyika towa tani shikuu? Tsatsi hano dyika  
5      shruippetra, etyu Iusi dyika. E Ananias towa tseni  
gakani, nu chucha e ga-tsatsi sai dyu tsaatya. E sai  
6      heme gakanatyishi mame chaaputsana. E shruyatyi  
shruni dyu tyipunaime e hake si chaaikkuii, e tyityai-  
tsime.  
7      Shrue hatyi tsi chamie dyika kaaitrani ai si dyu, ga-  
8      okui, e-tsitranshi tsatsi kutonimi tyupu, E Peter tyi-  
peyuta taatsakuiya: Kuppe tsi emi hatsi tu me shiya  
9      shiichanishi. E tyanata: Ha, tu me shiya. Etyu Peter  
e-taatsakuiya: Gowa kutruushra, Huchani ga-Maiani  
utaani. Mu, kutra-atru tsityaitsimetyishi gayashityi  
tsiama hau si tseetyu, e hake si nyeeikkuii-kutraau-  
10     masa. She tu haikamiku kashityima nu chucha, e ga-  
tsatsi sai dyu tsaatya, e shruyatyi hawe si tyeebu e  
kushitonishi tyiyainawa, e hake si chaaikkuii e ga-atru  
11     ishikayashu nu tyityaitsime. E sai kayiwatyamishi  
mame chaaputsa, e tsika sai haupa towa gakanatyishi.  
12     E tsi hanowishi dyika naoya tyiemtranishi e imi me  
tseshi umatsityaimishi gayamashityi niya e-tyitrana.  
E sai haupa ishikaku tsiwashrani ai Solomon ga-portaru  
13     dyika tsaapu. Etyu tsatsi hau tyautowishra nutaasha-  
14     kunishi, she etyu tsi hanowishi dinyaay tayatra; e tsi-  
wahimatyishi mina mame Huchani dyika hau chaai-  
15     taya, mame naoya tse, hatrutsai e kuya, tu heme tsiwa-  
wasatyishi hiani ye si tysiutyikume, e uityi e uityi-  
ukuiyani dyika ye dyu tyayatsise, emi heya tsi Peter  
hawe tsiyetyukunu, tu etse ga-unashipati mikat sayi-  
16     watranittyanyu. E tsika Jerusalem ai shriena tsaashi-

## E-TSAAPUTYISHI 5

tyitra dyika si tsi hanowishi shichaaku, tsiawasatyishi hawe tyayitrutsee, e adyema tseshi maiani niya kuwanatyumenatyishi, e sai haupa nowaina tyiwatsaipu.

- 17 Etyu chayani yani tseshi dyu tyutaatyu e tsika sai haupa kayiwatyisetyishi (emi Sadakai hano tseshi) e ukesu chatrukai, e umatsityaimishi tyayityatta e utsitanai ai tayipunaime. She etyu gapishu ni Huchani ga-upeseyi utsitani tsama taata e chaatya ye si tyuwyiku, e tyanata: Hake tyeemu, e tsityumi katrutya gaya ai si natyitsime-kutrusa, e hano dyika nyeyimina-nata-kutrusa towa Iani sai ga-tsenishi. E towa gakanatyi tsityumi katrutya tyawa gayu tse hau tyeepu e tyayisomeshityia. Etyu chayani yani tseshi hawe tsutyu e kayiwatyisetyishi, e ayawatyami hau shruni tyiwapotsa, e tsika Israel ga-iatratyaimishi ga-hashityi tyitra sai haupa, e utsitani katrutya ye hake tyayayataha we ayitrutseyi. Etyu gowaachani hau tsekkiushi ai utsitani gaya tsatsi tyuwatyainawatya, she hawe si tyeku e tyippena, tyaana: Utsitani katrutya shrami tsaaa si-yainawa, e gowawaashityu ai tsama ye si gaashro, etyu seetawatyi tsatsi hau hatrutsai ai gayashityi yainawatya. She tsityumi katrutya ga-uchanishi e chayani yani tsaaputyishi towa mani ga-kanatyi, emi niya kaatsityishitanishi gowa tyiwautra hatsuma shrtowa upetani nienitrutyeyanikunu. She hau ishike tsutyu e tiwapple: Mu, utsitani shiyashitanatyishi hatrutsai ai tsityumi katrutya si tseechanishi e hano gayisomeshitana. Shrue e shru ga-uchanishi e gowaachani hake tyeku, e hawe si tayitrutsee, tsa kayunanikuiyanatyi, she tsi hanowishi dyika chaaputsana, tsi shru tsi yaoni niya tsiwayutsanatyanyu. E tsayitrutseetyi, ayawatyami ai yani si nu tayayatana, e chayani yani tseshi tyiwapeta, tyanatani: Mame shrami shrawappe tsatsi towa E-hashi niya ayasomeshitani; e Mu, Jerusalem sai ai shra kutrayasomeshitani niya kutrataani, e towa hatrutsai ga-matsi hinome sutyeema dyu nyeyityi-tyiwatrumani shraatrutsityishita. Etyu Peter e umatsityaimishi tyamashrana e tyaana: Iusi sekka

## E-TSAAPUTYISHI 5

- 30 niuichattrashita-shrusa, tsatsi hemaku hano. Shra-naishityashi ga-Iusi, dyu tyiipatyu Jesus, emi shraut-tawatyishi, kiwa tseshi si nu shitottyanatyishi, emi Iusi dinya tsitra, shrumikawayaya kamashityi niya, Yani tseshi e Ayatragumi e-n'takunishi niya, emi heya Israel dyika uwataipunaimi e ukitsishi ayatoinaimishi nyeya-yaapikunishi niya ka. E shityishityiku suaapu towa tseni, e tsika Tsityumi Maiani, emi Iusi tsayaapishi gouichatranatyishi ye.
- 33 She etyu towa gakanityi tyiwasamutsa e chaatrutsi-tyishita uwani, etyu ai tyayiwatyamishra ishike dyu tyutattyu, Pharisee-me ta, Gamaliel E-gashi, utsitokaishi dyika kusoo, sai hano tsiuamashitanatyishi, e tyaya-yanikuiya hatsuma hatrutsai chaatya ye utyikumi. E tyayitsakuiya: Israel-me hano, Towa hatrutsai niya bashru nutrusa-kutrusa tsi kui niyatrana-kutrusatyishi.
- 36 She tsa na towa tsaashityi Theudas dyu kutattyu tyanatani noyu hau hyaani; emi hake wa hatsu tsi hano kayasha, hatsu tsi tyana-wa-katsi-wa-katsi, emi tsaauttawa, e sai haupa hatsu tsi tsiuichattrashitayishi tsiwashramatsi e tsatsi tsi haityi yuku gukumetya. Towa hatrutsai si yuku etiyu Galilee-me Judas dyu kutattyu, tsayadyatyitani tsaashityi, e hatsu hano yukuma ye shruni gayasha, e sai haupa tsiuichattrashitayishi ai shra tsiwashramatsi. She shru shrayitsakuiya, Towa hatrutsai dyika si chaatoinaime e tu payatrana, she tsi towa ayasomeshitani e towa tani hano dyika si tsanu, tu naaitraku. She etyu tsi Iusi dyika si tsanu tsatsi itye tu nyewitranitta-kutrusatya, tsi shru tsi shrauyainawatya hemaku Iusi dyika shrawaippetyishi. E kutsi niya tyiwashra, e umatsityaimishi si gowapeotsanatyi tyayashayana e tyayayanikuiyana tsatsi Jesus E-gashi niya atsani, e si tyayatoinaime. She ayawatyami si yuku tyeeku tsiwauishityiani E-gashi kutsi niya unu-nani kuwanatyumenatyishi hemaku tsiuamashitana-tyiatyishi. E sai tsaashikama ai tsityumi katrutyu ai gaya e ai kaatrutyu, tsatsi chuwapakutsa ayasomeshitani e ukatsetani Jesus wa emi Christo tseshi.

## E-TSAAPUTYISHI 6

- 6 She emi eyu tsaashityityama, tsasomeshityiatyishi naoya tsayatrani, Horiyu dyika Grecia-me Horiyu hano tayawaitawana, she ga-hanotyaimishi tsayitraitrama tsaashikama tsayachaapishi niya tsatsi na yu-tyiwatru-
- 2 masatya. She e shru katsi dyue tsitra tseshi tyuwapeo-tsana tsi naoya tseshi gayisomeshitanatyishi, e tyaana: Iusi ga-mani tu nitrana-sutrusanishi, mesa dyika
- 3 ayauikashani tsatsi tawa tsa. Emi heya, tyumutyaimishi, hishrome dyika si maityana hatrutsai powataa-tawa, tsayitrunimi shrami tsaaputyishi, Tsityumi Maiani e gaatsityishitanishi katrukaimishi, emi towa tani
- 4 dyika yani niyatrana-sutrusanu. Etyu hinome tyitra tu dyutishrutse amoma-utrani e tseni ayauikashani niu-
- 5 totsityia-sutrusa. E towa anatani sai haupa tyiwashra, e Stephen tyutaatawa, uhimatsi e Tsityumi Maiani niya kukainishi hatrutsai, e Philip e Prochorus e Nicanor e Timon e Parmenas e Nicolaus, Antioch-me Horiyu dyi-
- 6 ka tsiuhimatyishi. Towa sai haupa umatsityaimishi ai yani si nu tayayaatana; e umatsityaimishi amoma-tsitranyi gayamashityi niya gaya-nushika ye dyu tayi-tyatta.
- 7 E Iusi ga-tseni ai shra tsutyu, e ai Jerusalem dyu gayisomeshitanatyishi mame naoya chaaitra, e chayani tyitra dyika si mame naoya uhimatyi dyika chautsito-kaii.
- 8 E Stephen, uhimatyi e ishatsini kukaini, mame imi
- 9 me tseshi e tyiemi utrani hano dyika ye tyitra. E shrue haityia Libertines tsaniatyishi ayawatyamishra dyika si e Cyrene-me dyika si, e Alexandria-me dyika si, e Cilicia-me dyika si, e Asia-me dyika si dyu tyeetattyini
- 10 Stephen shruni tyeemu e tsatsi itye dinya tyuchanatya, katsityishitanishi e ga-maiani dyia e-katsanishi niya ka.
- 11 E chuwayatanā hau hatrutsai e towa tyaana: Si-ukana
- 12 sutsi-me katsanishi Moses e Iusi dyika. E ganashiyani tyayatrana hano e tsaya-tsaaputyishi e tsidyatrani-kusana, e hau tyiutyatyee e tyityatta e gayiwyatyamishi
- 13 dyika ye taayutsee, e tsatsi kaimatsishi shityishityiku-tyityita hau e-tyitrana, emi tyaana: Towa hatrutsai

## E-TSAAPUTYISHI 6, 7

- tsatsi kauppakutsanu sutsi-me tseni atsani, tui tsityumi  
14 tseshra e utsitokaishi dyika; she sutra-kani e-katsanishi  
towa Nazareth-me Jesus tui-i punyetyu e Moses  
15 shika-yaapishi uyukaii nanami nitratyu. E sai haupa ai  
ayawatyami tseemishi shrami tsiumekumeshatyi, ga-  
wawi tyiukachana tyemeshru tsi Iusi ga-uppeseyi chu-  
shrugayu.
- 7 She shrue chayani yani tseshi tyanata: Gao towa  
2 chaimatsishi? E Stephen tyanata:  
Hatrutsai, Sa-tyumutyaimishi e naishityiatyaimishi,  
trakani: Uamashitanishi Iusi shra-naishityashi Abra-  
ham dyika chutyiemitra, ai Mesopotamia emi eyu gaa-  
pi, tsa na Haran ai gaami, e tsatsakuiya: Kutra-atssi si  
yuku ima, e kutra-wityaimishi dyika si yuku, e hawe  
4 niutrani-shraumanishi hatsi dyika ye ima. She Chaldia  
me ga-hatsishi si yuku tsutyu e Haran ai dyu tyaou:  
e ai si yuku, ga-naishityia tsiuyushityi, towa hatsi dyika  
5 ye tsutya, emi wai ai kutraama. E tsatsi tsi taaku naa-  
kunishi, tsatsi puta ga-ashityi ai dyu nashakunishi, she  
etyu tyiuppe nyeoos-tsiumanishi naakuni, e ga-hamashu  
6 ga-iatra dyika, tsa na emi eyu iatra gashi. E Iusi emi  
taa kushrugayu e-chatsa: Ga-iatra nanami hatsi ai dyu  
naatatyusa, e niiityi-tyiwatrumasa e sutsi-me nyeyatra-  
7 na-tyiwatrumasa tyana-wa-katsi-wa-katsi kashraityi.  
E e-tsiiityishi hano niwataa-si, Iusi tyanata, e shrue ai si  
yuku hawe si nityeeku-kusa, e ta-i nitanitranitta-shiku-  
8 masa. E u-shikutyi-shatsini ushrani taou: e emi heya  
Abraham Isaac iatra-ku e kokomishu sai tse u-shikutyi-  
shatsini e-tyiutran; e Isaac Jacob iatraku, e Jacob  
katsi-dyue-tsitra yani tyitranishi naishityia iatrakutya.  
9 E yani tyitranishi naishityia, utsishikayani tyitran,  
Egypt ye wa Joseph tyikuyana: She etyu Iusi chuyti-  
10 sutyu, e sai tsi tsinatyumenishi si yuku tatoinaii, e  
taou yu-tseshi e katsityishitanishi, Pharaoh Egypt dyu  
rai-tseshi tsiukachani, e Egypt dyu dapopo tyiuitra e  
11 tsika sai ai gaama dyu. She shrue matyuku chaaitra  
sai ai shra Egypt hatsi e Canaan dyu, e mame chuwana-  
tyumenishi; e sutra-naishityashi tsatsi ayutyani tyi-

## E-TSAAPUTYISHI 7

12 yainawatya. Etyu Jacob ga-kani Egypt dyu ashrani  
13 tyeshi, tsaya shra-naishityiatyaimishi tyayikuya, e ha-  
mashu tse Joseph ga-tyumutyaimishi dyika taamashru-  
tsi, e Joseph ga-awi Pharaoh dyika taamashrutsana.  
14 Shrue Joseph tyayayata, e ga-naishityia Jacob hake  
tyuppeotsa e sai ga-awityaimishi, maityana-wa-katsi  
15 taama tsitra tyaityani. She Jacob Egypt ye nu tsu-tyu;  
16 e chushito, etyumu e shra-naishityiashi; e Shechem  
dyika ye tayatyee, e ayatyaitsimishra ai gaya nu tayi-  
wauishana emi Abraham hatsu sawaka niya tyinatta-  
nishi ai Shechem dyu Hamor ga-mutyityaimishi dyika  
17 si. She etyu tsiushranishi hawe e nu tsaashityi tsiutsaa-  
shityi, Iusi Abraham dyika kaakaesunishi, hano chuka-  
18 tsita e naoya chaaitra, Egypt dyu, menashru ishika rai  
19 dyu kutaatyuni, tsatsi Joseph kunimishi. Emi tsi  
tyiwashityuyutsita sutra-wityaimishi, e sutra-naishi-  
tyiatyaimishi sutsi-me tyiwautra, mame hatsumaku ga-  
iatratyaimishi chaukkuyawii, emi heya tsatsi nutrai-  
20 tyani-kusatyanu. Emi eyu tsaashityi Moses tyiia, e  
mame tyiumutawa, e ga-naishityia ga-ama chami tawa-  
21 tra chinamatsa; e tsaauiityi Pharaoh ga-maku dyu  
22 tyitta, e noyu namutyikuni chaaonamatsa. E Moses  
tyiuismeshitani sai Egypt hano gasomeshitanishi niya,  
23 e mame tyishatsi, tseni niya e tani niya. Etyu tsaotyu  
shru tyana-wa-katsi kashraityi gaapi, ga-winoshika e-  
tyiutra ga-tyumutyaimishi Israel ga-iatratyaimishi  
24 uatanyeyi. E haityi ishike sutsi-me e-taaityityia kuka-  
chani, tyiwaimi, e gowa ma tsaaityityiatyishi tyutta,  
25 Egypt hano tyityuuitsani. E tyinaetranu ga-tyumuty-  
imishi kuwittawanatyishi Iusi atoinaimi tsayaapishi ga-  
26 mashityi niya, etyu tsatsi tyiwittawana. E nanu ka-  
waipetyia tyiukachana, e tsika na ishikaku e-niitraku-  
me tyanatani: Hatrutsai, shraya-tyumushratyu; tseko-  
27 ma sutsi shrayatranu? Etyu ai yuwi gaamishi dyika  
sutsi tsitranishi yuku tsiutotsa, tyanatani: Hau kutyiui-  
28 tra huchani e tsayatanikuiya, sutyeeema dyika? Niu-  
mutyitsi-tyuuma, emi e sowa Egypt-me e shiranishi?  
29 She shrue Moses chutyeetyu towa tsanatanishi niya

## E-TSAAPUTYISHI 7

ka, e Midian hatsi dyu nanami hano tsaani ai tyooo, e  
30 ai dyue shruyatyi chuiasetyu. E tyana-wa-katsi kashraityi e-tsiyetyutsi, ai Sinai tsatdyau kotyu uppeseyi hau tyiuatsi, kiwa tseshi dyika kutrukanishi niya.  
31 Towa Moses kukachani, ukachani niya imi-me tyitra, e hau haweku tsaatsi, ukachani niya, Huchani katsansi  
32 shi tyiemi chaaitra: Hinome, kutra-naishityiatyaimishi ga-Iusi, emi Abraham ga-Iusi, e Isaac ga-Iusi e Jacob ga-Iusi sua. She Moses taitunutsita e tsatsi kumai-tyiashra ukachani. Shrue Huchani taatsakuuya: Kutra-hashuimi chushuimitowa shrashityi si, she ai dyu  
33 shru-chanishra tsityumi nutsatya tsa. Siukacha siukacha Egypt dyu gaatrutyishi sa-hanotyaimishi kuwanatyumenishi, e se-ka katyikuiyanatyishi, e neyatoinaisinishi niya tuwe nu tsu-se. She e shru tuwe ima, Egypt ye nikuya-shrauma.  
35 Towa Moses, emi e tsatsi tsiwashranishi tsaniatyishi, Hau kutyiuitra huchani e tsayatanikuiya? tu emi huchani e tsayatoinaisu n'takunishi niya ka Iusi tyikuya, ai kiwa tseshi dyika hau tyiemi tsiutranishi  
36 uppeseyi ga-mashityi niya. Tu emi hawe si tyutyiku, ai si yuku imi me tseshi e tyiemi utrani hawe tyayiwantrani, Egypt hatsi dyu e kukani kawaishromishra e ai  
37 tsatdyau shra dyu, tyana-wa-katsi kashraityi. Towa emi tsa Moses, Israel ga-iatratyaimishi gayitsakuiyanishi: Huchani kutra-Iusishi Prophet tseshi dyu nyewatatyuni-kutruwatruma kutra-tyumutyaimishi  
38 dyika si, taa hinome me, emi niukana-kutrusa. Towa emi tsa, ai tsatdyau dyu ayiwaytayami gaachunishi ai Sinai kotyu dyu tsiminatyishi upeseyi kuutyisututyishi, e tsika sutra-naishityiatyaimishi kayaawatyishi  
39 iani mani sutyemashra ayaapi. Towa emi shra-naishityiatyaimishi tsatsi kuutsitokaitya, etyu yuku kototsana e gaya-winoshika dyika Egypt ye wa si tsika  
40 na kayaishigutrai, Aaron dyika taniatyi: Iusi tsaaputyishi gaya-utrani, sutyemaa ai yani nutyeekkuiyakusanishi niya ka, she towa Moses kutsi niya, Egypt hatsi ai yuku shikaitrutseyishi, tsatsi shikutonimasatya

## E-TSAAPUTYISHI 7

- 41 tsi kui kaaitranishi. E emi tsaashityi wakashi washityi chuwauitrana, e towa kushrugayushi dyika tyiyushityumenitta, e gayamashityi niya kowa-uitranatyishi
- 42 tyiwaushityia. Etyu Iusi chaishigutrai e gayiwa-heetsani sai tsi ai howaka dyu tseemishi ayitanitranittyi, emi e tsidyatrani Prophet tsaaputyishi tsidyatran dyika nu:
- A Israel katrutyu kutyeshi, Hawe tyiutranitta tsiwani adyashi e uyushityumenishi, ai tsattyao dyu emi eyu tyana-wa-katsi kashraityi? Ha, Moloch uameshityi dyu shrayaawa, e kutra-iusi Rephan ga-shityita shruwa-uitranatyishi tsaachuwani hau nu aashutotrumi niya ka; E Babylon mi yuku niyetrutse-shrawatruma.
- 43 Shra-naishityiashi ai tsatdyau dyu shityishityiku uameshityi tyiwautrani, emi e tsayawasenittyishi, Moses tyiminatyikuiya e nuitkauni, emi tsiukachanishi
- 44 taa. Towa tsika shra-naishityiashi, tsiwawakini hawe tsiyutsee, Joshua kutaatsi, nanami hano gashi-tyishi-shra dyika, emi Iusi yuku tayitrawa shra-naishityiashi
- 45 tseemishra ai yani, David tsaashityi hema; emi Iusi ai yani anye tyiyaina e tsiusiputra Jacob katrutyu niya
- 46 uameshityi uyainawi. Etyu Solomon katrutyu tsaatrani
- 47 kutsi niya, she etyu he Mame Dinya Tseshi amashityini
- 48 niya tsiuitranishi tsatsi ai tseechunu; emi e-katsanishi prophet,
- 49           Kaunamatsi sa-anamatyi,  
             E gaishibishro seshityi ai dyu sa-ashityitratsi.  
             Tsi kui tse katrutyu nyeetrani-tiuma? e-katsa  
             Huchani:  
             Ku tsi haityi hatyi sa-uanaatrani?  
50           Gao tsa towa sai tsi se-mashityi chuuitra?
- 51           Kutra-yayu e tsatsi shikutyi kutraya-winoshikatyishi e kutrayappetyishi, tu dyutsishro Tsityumi Maiani dyika shraanutsita, emi e kutra-naishityiashi
- 52 e-tsitranyishi emi taa trutyumu e-shitrama. Hau haityi prophet tsaaputyishi kutra-naishityiatyaimishi tsatsi kui gayatyityia? E Kuitonimishi hawe tsunye-

## E-TSAAPUTYISHI 7, 8

53      kunishi niya mi hama kauppesetyishi kowawana; he  
      emi shru hau shi-kuyanatyishi e sha-uttawatyishi  
      kutrayatra, emi e uppeseyi niya shrami gayatawatyi  
      utsitokaiii shrayawatyishi e tsatsi e-shitranatyishi.  
54      She towa gakanittyi, tyiwasamutsa, gaya-winoshika  
      dyika, e gayacha niya tsayashigunutsita, kutsi niya.  
55      Etyu Tsityumi Maiani niya kukaiishi, tsishatsi hau dyu  
      kaunamatsi dyika ye dyu tyauyukai, e Iusi ga-uama-  
      shitani tyiukacha, e Iusi shrumikawayaya kamashityi  
56      ishikayashu Jesus tyichani, e tyanata: Mu, Kaunamatsi  
      tsaatawi si-ukacha, e Hano ga-Mutyi Iusi shrumika-  
57      waya kamashityi ishikayashu kuchani. Etyu tsishatsi  
      tyiwasheetsa, e gayappe taashita, e ishikaku hau  
58      chuwatotsa gaapishra, e tsaashityitra ai yuku si  
      taaityitsaii, e yaoni niya tyuyutsana, e shityishityiku  
      taaputyishi ga-wakunishi ai nu tyishana, tu na hatru-  
59      tsai tseshi Saul E-tyashi kashityi nu. E yaoni niya  
      tyuyutsityia, Stephen tyuwittaani e chatsasu: Huchani  
60      Jesus, sa-tsatsi chayaou. E nu chaashitotru, e tsishatsi  
      tyiusheetsa: Huchani, Bami towa ukitsi ai dyu payiityi.  
      E towa e-katsani tyipatto.

8      1 E Saul tyauheetsishi ta ga-ushitonishi.

      E emi eyu tsaashityi mame tsichuni upakashani hau  
      dyu chaaitra, ai Jerusalem dyu Jesus tsiwahimatyishi  
      kayawatyametyishi dyika e sai haupa ai shra tyiwa-  
      shramatsi sai Judea ye wa e Samaria ye wa, no-  
2      wainashu umatsityaimishi. E shrami tsaaputyishi  
      hatrutsai Stephen tyityaitsime, e kutsi niya mame  
3      ayama-tyiusa. Etyu Saul ayawatyami sutsi-tyittra, sai  
      katrutyta hawe tyiupusu e hatrutsai e kui-tyittra hawe  
      tyayaityitsayata e utsitani dyia shityityita.

4      She e shru ai shra tsishramatsishi ai shra tyeeku  
5      chuvakatsityia mani. E Philip Samaria tsaashityitra  
6      ye nu tsutyu, e Christo tyuwappe. E tsi hanowishi  
      ishikaku chaachattrashita Philip e-katsanishi, gaka-  
      nittyi e kukachanatyi tyiemi-ultrani e-tsitranshi.  
7      She naoya hano dyika si ai gaachupishi adyema tseshi  
      maiani tyiwawatseemu, tsishatsi tyiwashigaitsitani; e

## E-TSAAPUTYISHI 8

naoya tse yayu niya tsiwawasatyishi e gowakusutsi-  
8 tanishi tyiwatsaipu. E ai tsaashityitra dyu mame  
uishiityiaani chaastra.  
9 Etyu hau haityi hatrutsai Simon E-tya, emi mi ai  
tsaashityitra dyu tyaukimuni tayayaoshikasu, e Sa-  
maria-me hano imi-me gayatra, tyanatani noyu hau  
10 tsichu hyaani; emi sai haupa hake wa tyaatsityishi-  
tanishi tyanatani: Towa hatrutsai wa emi Iusi gayi-  
11 shatsini tsaniatyishi tsa. E hake wa tyaatsityishita-  
nishi, she mishru maiku ga-ukimunishi niya kui  
12 e-tyayatra. Etyu Philip dyika tsiwahimatiy Iusi itye-  
tshesra e Jesus Christo E-gashi dyika tawa mani  
chukatsetanishi, baptisma tayatra, shikaewa hatrutsai  
13 e kui-tyitra. E Simon noyu tsika tyiuhimma, e baptisma  
tyitrani Philip dyika chutyishityui, kukachani tyiemi-  
trani e imi-me ishatsini e-utrani, imi-me tyitra.  
14 She e shru Jerusalem dyu ai tseemishi umatsi-  
tyaimishi gakanatyi Samaria dyu Iusi ga-tseni kushu-  
15 tsanatyi, Peter e John hake tyaakuyana. Towa hake  
nu tseeyi, amoma-tyayiwatrannyu, Tsityumi Maiani  
16 niushutsana-kusatyishi niya ka; she tsatsi na hau  
ishika ai tsaaputyishi dyika dyu tyiwakkuya, she tu  
etse Huchani Jesus E-gashi dyika ye baptisma taya-  
17 trana. E shrue gaa-mashityi niya tyuwapakatsanu e  
18 Tsityumi Maiani tyushutsana. She Simon kukachani  
umatsityaimishi gaa-mashityi upakatsani niya Tsit-  
19 yumi Maiani gayaapi, sawaka tyaauyaani, tyanatani:  
Nutyumu towa ishatsini gaaputyu, emi heya hautsi tsi  
se-mashityi niya si-upakatsanu Tsityumi Maiani  
20 niushutsaku ni. Etyu Peter taatsakuiya: Kutra-  
sawaka e hishrome putraayaitrami; she shinaetrani  
21 sawaka niya niunattyikunishi Iusi tsaaayaapishi. Tsatsi  
hishrome dyika ishami ku tsayaachani tsanu, towa  
tseni dyika si, she shra-winoshika tsatsi shrami tsanu  
22 Iusi yani dyika si. She chuwataipunaii, towa kutra-  
sutsi tseshi, e Huchani dyika amoma-pitra, etse tsi  
shru tsi shra-winoshika ga-tsityishitanishi gaoku  
23 niwataipunaimityu. She si-ukacha kawitsitrani gawa-

## E-TSAAPUTYISHI 8

- 24 shitanishi e sutsi ityatayinishi dyika kuta. E Simon tyipeyuta tyanata; Amoma-kuutrani, Huchani dyika, emi heya tsatsi tsi towa shra-mashranishi hinome dyika naaitrakunishi.
- 25 She shityishityiku e-tsitranyututsi e Huchani gatseni e-katsanutyutsi Jerusalem ye si tyeeyu e naoya Samaria dyu tsaashityitashra tawa-mani chukatsanu.
- 26 Etyu Huchani ga-upeseyi Philip dyika tyamashra, tyanatani; Utattyu e kuwami ye wa ima, Jerusalem si
- 27 yuku Gaza ye nu hiani dyika—emi tu tseshra. E tyutattyu e tsutyu. E Mu, Ethiopia-me hatrutsai, Ethiopia dyu kuitsa huchani Candace dyika nu mame tsi tsichu tyauchanishi umatsi, sai ga-tsityumishi dyu yani tseshi, Jerusalem dyika ye dyu e-tsutyunishi,
- 28 amoma nitrakunishi niya ka, e shru hawe si tsutyuni garu si dyu gaapi, e prophet tseshi Isaiah Tsidyatrani
- 29 tyiukachanikuiya. E Maiani Philip dyika e-katsa:
- 30 Haweku hau iyatsi e garu dyika hau dyu upu. E Philip hau tyuumitsa e tyukka tyiukachanishi prophet tseshi Isaiah tsidyatrani, e tyanata: Truwittawa tsi
- 31 shrukachanikunishi? E tyanata: She gowa sa-etsi, tsi tsa hau shikusomeshitanu? She Philip hawe dyu uiyani e ai si dyu ishikawa ukuyani tyiukashitaya.
- 32 She emi chityi kukachanishi tsidyatrani, emi towa,  
Kanieru uttawani dyika ye tsuitaikuiishi-me, e kanieru washityi gowashanatyita ai yani nu tsatsi gowa katsasushi-me, emi taa tsatsi tsiika taata.
- 33 Nutsia tyitrani ga-yatanikuiyanishi taasatyutsi, kikatsanishi gashi hau nippeku? She ga-iani gaishibishra dyika si yuku tsayaawi.
- 34 E tyauchanishi umatsi tyipeyuta Philip e tyanata: Shrauppeta hau niya towa e-katsa prophet tseshi?
- 35 Noyu tseshi niya, kume no hau ishika? E Philip tsiika tsaata e towa tsidyatrani si yuku kutotsani Jesus niya
- 36 tyikatsanikuiya. E meshru tseeyani, haityi tsits' dyika hau tyaatsi, e tyauchanishi umatsi tyanata: Pukacha, Tu ai tsits'. Baptisma nitra-shikumanishi niya tsi
- 37 shiku-pakashani? E Philip tyanata: Tsi kutru-himaku,

## E-TSAAPUTYISHI 8, 9

shra-winoshika dyika si dyu, nyeeheetsi-shru. E tyipeyuta, tyanata: Shiku-hima Jesus Christo Iusi  
38 ga-mutyi tseshi. E garu utsyitsimi chuwaya, e ishikawa  
tsits' dyika ye nu tyeeyu, shikaewa Philip e gauchanishi  
39 umatsi, e baptisma tyitra. E tsits' dyika si dyu  
kuumuni, Huchani ga-Maiani Philip yuku tyiyutse, e  
gauchanishi umatsi tsatsi na tyiukacha, she ai si yuku  
40 tsutyu, tsuishityaani. She etyu Philip ai Azotus dyu  
taayainawa; e hake tsiyatyutsi chukatsetasu sai hawe  
tsaashityitra dyika, menashru Caesarea hau tsaatsini.  
9        Etyu Saul tu na ayayetsanishi e ayawatratanishi  
emi e tsatsa-ka ni, Huchani tsiwahimatyishi dyika,  
2 chayani yani tseshi dyika ye tsutyu, e tysiwitaa  
tsidyatrani, ai Damascus dyu hatsuka ayawatyamishra  
dyika, tsi emi haityi hau kowatyainame towa Hiani  
tsekuiyanishi, hatrutsai ku kuwi putaapu, Jerusalem  
dyika ye hawe si gayitrusseyu, kaapashityanittyi.  
3 E hake gaani, Damascus haweku hau tsutyu, e tu  
tsiwatyi howaka dyika si mashra ai gaapishra shriena  
4 chushityemitsita, e yaai dyika nu chucha, e e-katsaa-  
nishi chaka taatsakuiyasu: Saul, Saul, Tsekoma  
5 tuishikuiyasu? E tyanata: Hau emi kuta, Huchani?  
Etyu yu tyanata: Tu hinome Jesus, tuishikuiyasushi.  
6 Ayatyawani dyika uiyanukutsi aya-shru. E tsaitunu-  
tsitani e imi-me tsitrani, tyanata: Huchani, Tsi  
e-nitrasinishi kutrutsipu? She Huchani taatsakuiya:  
Si dyu utattyu, e tsaashityitra dyika ye upu, e shrue  
7 nyepena-shru tsi sekka nitra-shrunishi. E hatrutsai  
kaani kayiwatyisetyishi hawe si tyeechanishi tsa  
katsiatyi, atsaani tyakasu, etyu tsatsi hau tyiukachana.  
8 E Saul yaai dyika si dyu tyitattyu, e gaana tsikashityi  
tsatsi tsi na tyiukacha, e kamashityi niya tyitaikkuiyana  
9 e Damascus dyika ye tyiyutsee. E chami sai tsatsi  
tyikashityishranu, e tsatsi tsi chubbenu ku tyishika-  
tyanu.  
10      She e shru haityi tsiuhimatyishi ai Damascus dyu  
tyaa, Ananias E-tya. E emi dyika Huchani taatsa-  
kuiya, tyiemitanishi niya: Ananias. E tyanata: Mu,

## E-TSAAPUTYISHI 9

11 Tu ai si, Huchani. E Huchani taatsakuiya: Utattyu, Shitutsi E-gashi hiani dyika ye ima, e nippeta-shru Judas katrutya ai gaya hau Saul tsaniatyishi, Tarsus-me hatrutsai. She Mu, Amoma tsityita, e Ananias E-gashi hatrutsai hawe kupunishi e kamashityi niya tsiupakatsanishi emi heya si nikashityi-tsiumanishi  
12 niya ka, e-kukacha. Etyu Ananias tyipeyuta: Huchani, Naoya hano dyika si se-ka towa hatrutsai niya ka, hatsumaku ai Jerusalem dyu tseemishi kutra-  
13 tsityumishi hano dyika sutsi gayatranishi. E tui itye e-ta chayani yani tseshi dyika si, ayiwapashityani sai  
14 haupa E-kutrashi dyika ye tsishratranyishi. Etyu Huchani taatsakuiya: Hake ima; she si-utaatawishi  
15 niumatsani-shikumanishi, E-seshi nanami hano e rai tseshi e Israel iatratyaimishi dyika ye naikkuiyakunishi  
16 niya ka. She e-niutrani-si hatsu tsi sekka nunatyume-  
17 kunishi, E-seshi niya ka. E Ananias hake tsutyu, e katrutya hake tyiupu, e kamashityi niya tsiupakatsani tyanata: Tyumu, Saul! Huchani, emi Jesus hawe tsunye-shrunishi hiani dyika tyiemi kutyi-tranishi, hawe shikukuya, emi heya si nyikashityi-kutrumaniishi niya ka, e Tsityumi Maiani niya nyikaii-kutrumaniishi  
18 niya ka. E tu haikamiku gaana dyika si nu pepe-tya, tyemeshru pishichanani, e si tyikashityishiratya. E  
19 dyu tyutattyu e baptismal tyitra; e upbewi chupbe e shratsa-tya.

E hatsuma tsaashityi ai Damascus dyu tseemishi  
20 tsiwahimatyishi ai tyutaa e haikamiku ayawatyami-  
gaya ai gaya Jesus kutsi niya chukatseta, emi Iusi  
21 ga-mutyi tyeshi. E sai heme tsiukanatyishi imi-ma tayatra e tyaana: Gai tsa towa emi ta, ai Jerusalem dyu towa E-hashi dyika tsishratranyishi tsiwanatyumenishi? E tuwe tsutyu, emi heya chayani yani tseshi dyika ye ayitrutseyi tsayiwapashityanittyi?  
22 Etyu Saul mame yuku shru tsishatsi e-tyitra, e Damascus ai katrutyiishi Horiyu hano dinya tiwashia, towa emi Christo tseshi kaimatsi tyitrani.

23 E naoya tsaashityi ai si yuku chaaitrani, Horiyu

## E-TSAAPUTYISHI 9

- 24 hano chayaminata uttawi, etyu ga-uyetsishetyishi Saul  
tyiutonimitratya. E tsiamye tyiwawaashityu settyu  
25 ma e gapishu ma, uttawi niya ka; etyu gapishu ni  
gayisomeshitanishi tyiyutsee, e tsaashityitra shriena  
dyu katrutyashi dinya ye si nu tyityottyana, kanashitu  
niya tyitotyanyati.
- 26 E shrue Jerusalem hau tsaatsini, tyiuta umatsi-  
tyaimishi dyika utaashityi, etyu sai haupa tyayiputsani,  
27 tsatsi tyiwahimatyi tsasomeshita taanishi. Etyu  
Barnabas tyiushutsa, e umatsityaimishi dyika hau  
tyiyutse, e tyiwappe gowa Huchani kukachanishi, hake  
gaani, e tsiminatyishi, e gowa ai Damascus dyu  
28 hatrutsai-me kokatsanishi, Jesus E-gashi niya. E ai  
Jerusalem chayiwatyise, hawe si tseepuni e si tsee-  
29 muni, chuvakatsetyi, hatrutsai-me Huchani E-gashi  
niya ka; e Grecia-me Horiyu hano dyika hake wa  
kokatsetata e chuwayatyita. Etyu etyumu tyiuyetsa-  
30 nisha niumutyitsana-tsiumasatyishi. E kayatyumu-  
tyaimishi kutonimasatyi, Caesarea ye nu tyiyutsee, e  
Tarsus dyika ye tyikuyana.
- 31 She sai Judea dyu e Galilee dyu e Samaria dyu  
kayawatyamishi bishityi e-tayatra, e kaashatsi taya-  
trana; Huchani tsayiputsani, e Tsityumi Maiani  
shratsa-tseeni tyayutyanatyi, naoya tayatra.
- 32 She e-chaastra, Peter sai hawe shra kautanyeai, ai  
Lydda tsaashityitra dyu tseemishi tsityumishi hano  
33 dyika ye tsika hau taatsi. E ai tyiyaina hau hatrutsai  
Aeneas E-tyashi; towa emi kokomishu kashraityi  
34 ga-ityi dyu tyikai, she yayu ta. E Peter taatsakuiya:  
Aeneas, Jesus Christo kutyi-utsaipunaii. Dyu ipatyu,  
e kutra-uityi paishishatowa. E haikamiku dyu  
35 tyiipatyu. E sai haupa Lydda dyu katrutyishi e Sharon  
dyu, tyiukachana, e Huchani dyika ye chayashigutrai.
- 36 She e shru ai Joppa hau ye emi tsaasomeshitana-  
tyishi, Tabitha E-tya. (Towa tsityarapatyitrani, Dorcas  
tsa.) Towa ku naoya tawa utanitrani e-tyitra, e amome-  
37 tsaaputyishi tyayiwamatsitani. E e-chaastra emi e  
tsaashityitratyani tyiwasatyitrata, e chushito. E tsaa-

## E-TSAAPUTYISHI 9, 10

- 38 nometyi, ai dinya gaya tyitsime. E Lydda wa emi Joppa haweku tsaanishi niya ka, tsayasomeshitanihi gakanityi Peter ai gaapishi, dyue hatrutsai hake tyakkuyana gaapishra, tyuwittaanu tsi etse tu haikamiku tsa hake nautanyekunu, sutyeema ye. She Peter dyu tyutattyu e hawe si chayiwatyime, e hau tsaatsini, ai dinya gaya ye taayutsee, e sai haupa tsayityaitrame hawe si tyeechanishi gaattyi, e hawe taatyi dinya nu wakuni e mika wakuni Dorcas kuuitranihi, tu na ai
- 40 gaapi. Etyu Peter sai haupa si tyiwatyiku, e ai si nu kaashitotruma, e amoma tyitra, e shumu dyika hake wa chaishigutrai tyanata: Tabitha, Dyu ipatyu. E tyikashatyi, e Peter kuukachani ai si chukuiya. E kamashityi si tyitya, e dyu tyitattyu, e tsityumishi hanoshi e tsayityaitrame ku gowapeotsani, hawe si tyayiwatrani,
- 42 tsiianishi. E Joppa dyu ye sai ai shra tyiutonimi, e
- 43 naoya tse Huchani dyika tyiwahima. She e-chaaitra Peter maiku ai Joppa tyaa, haityi Simon, eshruka kaunatyutsita ga-ama.
- 10 She eshru ai Caesarea hau hatrutsai ai tya, Cornelius E-tya, Italian E-gashi katsi-wa-katsi kawaiipetyia gowatsikumishi ai si taani, Iusi tsiuhimatyishi e tsiuamashitanishi, e sai ai gatrutyishi, emi hano dyika tsi naoya niya gayawanatsanittyishi, e Iusi dyika tu dyutsishro amoma-tyekkuiya. Towa tsi tyiemi-tranishi shrami tyiukacha, hatyi tsi suna-tsi-dyia si yuku chami dyika kaaitrani, Iusi ga-upeseyi hawe gaapishra ye
- 4 kupuni e tyanatanishi: Cornelius. E hau kukachani chuputsa e tyanata: Tsi haityi, Huchani. She taatsakuiya: Amoma-kutra-utrani e aapi kutrashi Iusi dyika
- 5 tsayinatyumi. She e shru Joppa ye hatrutsai hake piyata e hawe puppeotsa Simon, Peter tsaniatyishi.
- 6 Emi Simon eshruka kaunatyutsita ga-ama ai gaa, emi ga-ama kawaishro butru ai tya: Emi niuppe-kutruma gaoku tsi kui nityekkuiya-tru. E Cornelius dyika e-katsanishi upeseyi yuku si tsutsi, dyue ai
- 7 ga-ama gatanitranityaimishi tyiuuppeotsa, e tsika
- 8 ishike shrami tseshi kawaiku, hau tsaapetyishi. E

## E-TSAAPUTYISHI 10

towa sai tsi gowappeeni, Joppa dyika ye tyiyata.  
9 E nanu tsekkuuyi tsaashityitra haweku hau tseetyu-  
pi, Peter katrutya ai dinyi drutrutya ye dyu tsutyu,  
10 amoma tyitra ni, hatyi tsi suna-tsi-dyia, e mame tyi-  
yamashityitratya, e gai e-nupbetyu, etyu chitye  
tsityityiatyi ishikayashu gowa ma hitseshi-me utsi-  
11 tyishitani tyiutra. E tyiukacha howaka taatawishi e tsi  
uishitani mame tsiya chananatsishi kushrugayunishi  
hatsi dyika ye wa nu tyana shukuna ye nu tyiutottyani  
12 hawe nu tsutsishi, ai nu tyiashityi sai tsi kui tseshrama  
tyana gayashityimishi tsidyayawishi e sai tsi nutsiya  
13 shra tsekkuuyanishi e howaka ye gayatanishi. E hawe  
katsanishi tyiuatsi: Dyu utatyu, Peter, chutta e chupbe.  
14 She etyu Peter tyanata: Tsatsi, Huchani, she tsatsi  
hama tsi tu haityi tseshi ku adyema tseshi shikupbenu.  
15 E tsika na hamashutse e-katsanishi hau tyiuatsi: Tsi  
Iusi kuityeeshityimishi, tsatsi tu haityi tsi pee-niu-  
16 shrunu. E towa chamiya e-tsiutrani, e tu haikamiku  
tsika na tsiuishitani howaka dyu tyipunaii.  
17 Tu na Peter tseetyutsi gowa-kuni, gao tsi utyiemi-  
trani kukachanishi n'takunishi, Mu, Cornelius dyika si  
tsaauyatanittyishi hatrutsai e-tyipeetawa Simon hatyi  
18 ga-amishi, e ai tsiam si tyeechanishi e tyiwashigaitsa e  
tyipeetawa tsi shru tsi Simon, Peter tsaniatyishi ai ga-  
19 kunu. E tu na Peter ukachanishi niya kutsityishitani,  
Maiani taatsakuiya: Mu, chami hatrutsai kutyi-yaipa-  
20 tyikuiyana, emi heya si dyu utattyu e hake si nu utsya  
chutaasha e chayiwatyime, tsatsi tsi tseetyi tsi gowa-  
21 shruni, she wa hawe siiyata. She shru Peter ai hatru-  
tsai, Cornelius si tsaauyatanittyishi, tseema ye nu  
tsutyu; e tyanata: Mu, Tu emi sua, shiyaipatyikui-  
22 yanatyishi. Tsi haityi shi dyia hawe kutyeeku? E  
tyaana: Cornelius, katsi-wa-katsi kawaiipetyishi e uito-  
nimi hatrutsai, e Iusi tsiuamashitamishi, e sai Horiyu  
hanowishi dyu tawa tsaanimasatyishi, Iusi dyika si tsi-  
23 tyumi upeseyi niya tyianikuiya hishrome uppeotsi  
ga-ama ye, e hishrome dyika si mani akani. She hawe  
gaya ye tyiwaapeotsa e tyiwashutsa.

## E-TSAAPUTYISHI 10

Shrue ai nanu Peter kutaatsi hake si tyeeku, e hau  
24 tsi utyumutyaimishi Joppa si chayiwatyime. E shrue  
ai nanu Caesarea hau tyeetyu, E Cornelius tayitrukami  
e kaawityaimishi e mame ga-ukinityaimishi ai shru ni  
25 emi e-tyiwappeotsa. E Peter hawe kupuni Cornelius  
tyiwataii, e ai Peter kashityi nu chucha e chaashitotru.  
26 Etyu Peter si dyu tyiitattyu, taatsakuiya: Si dyu utatyu,  
27 she tsika hinome tu hano ruta. E kayatyishanikui-  
yanutyutsi hake tyupu, e tyiwatyaina naoya kayiwa-  
28 tyametyishi. E tyayitsakuiya: Noyu shrutonimasa  
gowa tsatsi shrami tsiuyukaishra tsi emi hau hatrutsai  
Horiyu tsanu ayaatsini ku ayatanyeyi nanami hano  
dyika ye, she etyu Iusi hawe shikutrani tsatsi hau hano  
tu haityi tsi tseshi ku adyema tseshi pee atsakuiya-  
29 shityumanu. Emi heya hawe tsu-si, tsa gowa sa-  
tsasi, tu haikamiku kutyiupeotsanatyi. Emi heya si-  
petta tsi shi dyia tsi tiuppeotsanatyishi?

30 E Cornelius e-chatsa: Sowa hama tyana tsaashityi  
e shrue toma su-shruikasu, e suna-tsi-dyia si yuku  
chamie ura kaaitrani sa-ama ai gaya amoma-sityita; e  
Mu, ai yani si shikuityitsi kushityemitsita wakuni kuwa-  
31 kunishi hatrutsai, e kanata: Cornelius, Amoma-kutra-  
utrani tsiukani, e kutra-ayaapi tsiutyumishi Iusi dyika.  
32 Emi heya Joppa ye tayayata, e Simon, Peter tsaniatyishi,  
hawe puppeotsa. Emi Simon eshruka kaunatyu-  
tsita ga-ama ai gaa, emi ai kawaishra butru. Emi,  
33 hawe tsunyekunishi nimina-kutruma. Emi heya tu hai-  
kamiku shrauyatani, e tawa e-shitra hawe tsu-shishi.  
Shru emi heya sai haupa sutyee, tui Iusi dyika ai yani,  
sai tsi Iusi dyika si kutyiyanikuiyanishi akani.

34 She Peter tsiika tsaata e tyanata: Kaimatsi sa-utyu  
35 Iusi tsatsi tsiunushra, etyu sai hano dyika si haityi hau  
tsiuamashitanishi e uitonimi tseshi e-tsitranshi tsi-  
36 ushutsani. Israel ga-iatratyaimishi dyika ye tawa-mani  
tyayityi kokatsetani shratsaani, Jesus Christo niya (emi  
37 sai haupa dyika dyu Huchani tseshi), emi amashrani  
shrunimasa weme sai Judea dyu tsiupetanishi, Galilee  
dyika si tsitottsani John kokatsanishi baptismi si

## E-TSAAPUTYISHI 10, 11

- 38 yuku, towa emi gowa Iusi tsaawitra Nazareth-me Jesus, Tsityumi Maiani niya e ishatsini niya, emi ai shra tsutyu, towa tseshi e-tsekkiyani, e shruwatyaimu tsayitya-  
39 tyishi gayiwatsaipunaii, she Iusi chuutyisutyu. E shi-tyishityiku suaapu sai tsi e-tsitranihi, shikaewa Judea hatsi dyu e tsika Jerusalem dyu; emi tsika kauttawa,  
40 kiwa tseshi si nu tsitotyanati, emi Iusi chami tsaa-shityi si dyu tsipatyu e kuheetsa nyekachanakunishi,  
41 tsatsi sai hano dyika, etyu nowe shityishityiku dyika, Iusi mishru gayaatawishi emi suaaputyishi. She ushi-toni si dyu tsipatyini si yuku, Jesus e hinome tyitra ishi-  
42 kaku sutraapbe e sutraashikata. E shikayayanikuiya ukatsani e shityishityiku-utrani hano dyika, gaityanishi e kaawishi tsayatanikuiya n'takunishi niya, Iusi tsaaui-  
43 tranishi emi tseshi. Kutsi niya sai haupa prophet tseshi shityishityiku tsitra, emi E-gashi niya ka sai heme gaapishra tsuhimatyishi ukitsishi nayatoinai-kusa.  
44 Tu na Peter towa mani katsani Tsityumi Maiani sai heme towa mani gakanatyishi ai tseemishi gaya-nushika dyu tyiwapakatsa. E tsiwaushikutyitsityaimishi dyika si tsiwahimatyishi imi ma tayatra, sai heme Peter gayatsi hawe tsekkuishi, she tsika nanami hano dyika dyu Tsityumi Maiani ayaapi tseshi tsishitanishi  
46 niya ka. She tiwakana nanami tseni niya atsani, e  
47 Iusi uamashitani. She Peter tayipeyuta: Itye hau hatrutsai tsits' kuheetsani towa, hinome tyitra-me, Tsityumi Maiani kayaawatyishi tsatsi baptismal tayatranu?  
48 E tyayayanikuiya baptismal ayatrani, Jesus Christo E-gashi dyika ye. She tyiuppetawa hatsushu sai ai aapi.  
**11** She umatsityaimishi e utyumutyaimishi, Judea tseemishi, tyakani nanami hano tsika Iusi ga-mani  
2 kayaawatyishi. E Peter Jerusalem hau si tsaatsini tsiwaushikutyitsityaimishi tyiutanikuiyana, tyanatyi:  
3 Hishrome shru-taasha tsatsi kuwashikutyitsishi hatru-  
4 tsai dyika, e tsika shrutaatsi shruppe. Etyu Peter tsa-ya dyika si yuku sai tsi hakushama tyiwappe, tyana-  
5 tani: Ai Joppa tsaashityitra ai-si, amoma-sutyekkuiya; e ishikayashu hitseshi-me utsityishitani shikutra e

## E-TSAAPUTYISHI 11

utyiemitrani si-ukacha, haityi tsi uishitani hawe nu  
tsutsi mame tsiya chananatsishi kushrugayu, howaka  
6 dyika si nu tsitottyani, tyana shukuna ye nu, e hinome  
dyika hau nu tsiatsi, e hau e-siukachani mame so-tsi-  
tyishita, e si-ukacha tyana gayashityimishi hatsi-me  
7 tsidyayawishi, e tsatdyao tsidyayawishi, e nutsia ye  
8 tsekkuianishi, e howaka ye gayatanishi. E se-ka atsa-  
ani shikatsakuiyanishi: Dyu utattyu, Peter, chutta e  
9 chuppe. Etyu e-satsa: Tsatsi, Huchani, She tsatsi  
hama tu tsi haityi tseshi ku adyema tseshi siika ye nu  
10 kupunu. Etyu tsika na howaka dyika si nu atsaani shi-  
kupeyuta: Tsi haityi Iusi kauyashityimishi emi bashru-  
mi tu tsi haityi tseshi petsakuiya. E towa chamiya e-  
tsiutrani, shrue tsika na howaka ye si dyu tyipunaii.  
11 E mu, Tu haikamiku chamie hatrutsai katrutya ai su-  
tyeemishra ai yani hau tyeetyu, Caesarea si tayaya-  
12 tanatyishi, hinome dyika. E Maiani shiku-yanikuiya  
sutaashityi utsutsi, tsa haityi tsi gowa utsityishitani. E  
towa shichisu tyumutyaimishi hawe sayiwatyise; e  
13 hatrutsai ai gaama hau sutyeepu, e shikuwappe gowa  
upeseyi ai gaama ai si kuchanishi e ganatanishi: Joppa  
14 ye piyata, e hawe puppeotsa Simon, Peter tsaniatyishi.  
Emi mani niuppe-kutruma, emi heya nitragu-shru,  
15 hishrome e sai kutra-tseema. E shru se-mashrani,  
Tsityumi Maiani ai tseemishi gaya-nushika dyu tsiwa-  
pakatsa, emi e ai tsaya drutyutya si yuku sutyeema dyu  
16 taa. E si-utyumi Huchani ga-mani, gowa e-katsa:  
Kaimatsi John tsits' niya baptismal tsayatyita, etyu tru-  
tyu Tsityumi Maiani niya baptismal niyatratrakutruwa-  
17 truma. She tsi eku Iusi tsayaaku ayaapi e-etsi shika-  
yaapishi, Huchani Jesus Christ si-uhimatawanatyi,  
18 hau sua, itye Iusi si-upakotsan? E towa ga-kanityi,  
bishihi-tyiusa, e Iusi tysi-uamashitana, tyanatyi: She  
nanami hano dyika tsika Iusi iani ye wa uwataipunaimi  
tyayaou.  
19 She emi e Stephen kutsi niya e-chaaitra kunatyume-  
nishi heya tsiushramatsishi shra tsekkuianishi, Phoenicia e  
Cyprus e Antioch hema, tsatsi hau ishika dyika mani

## E-TSAAPUTYISHI 11, 12

- 20 chuwakatsityia etyu nowe Horiyu hano dyika. She  
etyu towa si haityi Cyprus-me e Cyrene-me hatrutsai  
emi hau Antioch tseetyupi, Grecia-me hano dyika tsika  
21 tyayiminata, Huchani Jesus chuwakatsetyia. E Hu-  
chani ga-mashityi tsishatsi tayatra, e mame naoya tsika  
22 wahimatyishi Huchani dyika ye chayaishigutra. E emi  
niya tsiupetanishi ai Jerusalem dyu ayawatyami tyakani,  
23 e Barnabas Antioch hema hake takkuiyana. Emi hau  
tsaatsini e Iusi unamatawani kukachani tyiuishityia, e  
sai haupa tyuwakashitaya ma-imma gaya-winoshika  
24 dyika si Huchani dyika utyishityuimi. She tawa ha-  
trutsai ta, e Tsityumi Maiani e uhimatyi chukai; e nao-  
25 ya hano Huchani dyika hau chaaityau. E Tarsus dyika  
26 hau tsutyu, Saul uyaipatyeyi niya ka. E emi tyiyai-  
nawi, Antioch hawe si tyiyutse. She e-chaaitra, ai aya-  
wat�amishra haupa chayiwatyami ishike kashraityi, e  
naoya hano tyayisomeshitanu, e gayasomeshityia tsaya  
hatyi Christian tayania ai Antioch.
- 27 She e shru towa tsaashityi dyika Jerusalem si kowa-  
28 katsetyia hau Antioch tyeeku, e haityi hau ye emi Aga-  
bus E-tyashi dyu tyutattyu, e Maiani niya tysiemi tyiu-  
29 tra gowa sai gaishibishra dyu tsichuni matyuku naai-  
tratyu. Towa e-chaaitra Claudias tsaashityitratyani. E  
gayasomeshityia sai hatrutsai etse gowa itye-kusatya,  
chaapaitsa hake ayiuamatsanityi ai Judea dyu tseemi-  
30 shi utyumutyaimishi. Emi e e-tyitrana, Barnabas e  
Saul chuushitaikkuityi, tsaya tsaaputyishi dyika tyi-  
shityichana.
- 12 She e shru, emi eyu tsaashityitratyuni, Herod rai  
tseshi hau kamashityi chautta haityi ayawatyami sutsi  
2 utrani. E ishipari niya James chautta, emi John ga-  
3 tyumu. E towa Horiyu hano tyiwa-uanyutsanishi ku-  
kachanishi niya ka, tsika hau yuwi Peter tyitya. (Emi  
4 eyu tsaashityi tsa kashratyi gayatsishi semita tsaashityi  
chitye chaaitra). E shru tyityaatyi, utsitani hau tyipu-  
naii, e tyana-ya gowawaashityu kawaipetyishi dyika  
5 hau tyikuya uwaashityuni niya ka, tsinaetranishi uiya-  
tyuni bashruku si yuku hano dyika hau ukuyani. She

## E-TSAAPUTYISHI 12

Peter ai utsitani tyipunaii tyaachu, etyu kayiwatyame-tyishi tsa kaatyisise Iusi dyika amoma-tyiuttyitanitta.

6 E shrue Herod gaika shru hau nikuya-tyiumanu, emi chitye gapishu ni Peter dyue kawaiputyu ai suna ye dyu tyiikai, dyue kayanutsanishi heya chaapashityu, e tsia-

7 ma ai yani gowawaashityu utsitani tyiuwaashityu. E mu, Huchani ga-upeseyi hau tyi-uatsi, e ai utsitani gaya mashra chumashratsu. E Peter tsayakutru tyiupakatsa, e dyu tyiipatyu taatsakuiya: Tyiipatyu, shatru. E ga-kayanutsanishatyishi ka-mashityi dyika si

8 yuku petya. E upeseyi taatsakuiya: Chuutyishitya, e kutra-hashuimi chushui. E taa e-tyitra. E tsika taatsakuiya: Kutra-wakuni chutyusha e hinome dyika

9 hamashu ima. E hake si tyumu, e hamashu tsutyu, e tsatsi tyuwittawa upeseyi e-tsitranshi kaimatsishi ta,

10 etyu tsi tyiemitrani kukachanishi tyinaetrani. E tsaya kowaashityu, e shrue ishika, hake kaiyatytutsimi, hau tyaatsi sawaka tsiamta dyika, tsaashityitra hake uyupunishra, e towa chaata noyu e-kuni, e hake si tyuumu e ishike hiani sai tyaiyatyu, e tu tsiwatyi upeseyi tu tyitra. E Peter shrami si kuitonimitratyani, tyanata:

11 Gaityishru ma-ima si-utoni Huchani ga-upeseyi hawe tsiyukanishi, e Herod ga-mashityi dyika si shika-atoi-naimishi, e tsika Horiyu hano sai tsi tsiuyeetsanishatyishi dyika si. E towa tsi ku-tsityishitani, John ganaia Mary ga-ama hau taatsi (John, Mark tsaniatyishi). Ai naoya chayiwatyami, amoma-tyityityia.

12 E Peter hake uyupuni tsiamta tsayishrukaasitsa ni, Rhoda tsaniatyishi kuitsa hawe tsutyu, ushutsani niya

13 ka. E Peter katsanishi kumatawani, tsiuishityiaanishi niya ka tsatsi puta tsiamta taata, etyu gaya ye si tyiumitsa, e tyiuppe Peter ai tsiamta chaatya si kuchanishi. E tania: Tsatsi shrami shru-wittonima. Etyu kee si e-chatsasu, kaimatsishi. She tyaana: Wa ga-upeseyi.

14 Etyu Peter meshru tayishrukaasitsita, e tsiamta tsaata-

15 watyi e kukachanatyi, imi-ma tayatra. Etyu kamashityi niya e-tayiwatrani bishityi uni, tysiwappe gowa Huchani utsitani hawe si tsiuttyikumishi. E e-katsa:

## E-TSAAPUTYISHI 12, 13

- Hake ima. Towa hau ye piutranitta, James dyika e tyumutyaimishi. E shrue yuku si tsutyu, ishika tse-  
18 shra dyika ye. She tu heme nanu mashra kaaitrani, kawaipetyia gowawaashityu tsatsi tsi tu drusishunishi ganashiyaini tayatra, tsi kui kaaitranishi Peter niya ka.
- 19 E Herod tsiyaipatyikuiyani, e tsatsi tsiyainawi, gowa-washityu tyiwappetaukuiya e chuwaya niwamutyi-tsana-tsiwatrumasatyishi. E Judea dyika si utsutsi Caesarea dyika ye nu tsutyu, e ai tyaa.
- 20 E Herod Tyre e Sidon ai tseemishi katrutsi niya mame tsatsi anye-tyitra. Etyu ishike tsiwashrani hawe tyeeku gaapishra, e Blastus, rai ga-uityishra dyika kutanitra, chaukintranatyi, bishityi uni tyiwatsipu, she ga-hatsi upbewi-tautranitta rai tseshi ga-hatsi dyika si.
- 21 E tsuishranishi tsaashityi Herod, rai tseshi ga-wakuni chuwakuni, ga-kuiyanishra dyu chukuiya e tyayaka-  
22 tsani. E hano tyuwashigaitsa, tyaana: Iusi katsanishi  
23 tsa, tsatsi hano katsanishi tsanu. E tu haikamiku Huchani ga-upeseyi tyiupakatsa, she tsatsi Iusi tyiuamashita. E yuupu tyipbewatya ga-tsatsi sai tsaatya.
- 24 Etyu Iusi ga-mani chitonisu e ai shra sai tyutaa.
- 25 E Barnabas e Saul Jerusalem hawe si tyeeyu, tsaii-tranishi kuinaottani e tyiyutsetyu John, Mark tsania-tyishi.
- 13 She e shru ai Antioch dyu kayawatyamishetyishi tyayaa, haityi kowakatsetyia e tsayasomeshtanishi, emi Barnabas, e Symeon, Niger tsaniatyishi, e Cyrene-me Lucius, e Manaen, Herod tyanaya dyu gauchanishi  
2 ga-umu, e Saul. E Huchani tsayaatranittyi e kuwashrui-kasi, Tsityumi Maiani tyanata: Barnabas e Saul yuku  
3 kuyatani, si-uppeotsanishi tani niya ka. She kuwa-shruikanatyi e amoma-tsitranyti e kaya-mashityi niya gaa-nushika dyu tsiupakatsanutyi, ai si yuku taaya-wana.
- 4 She Tsityumi Maiani niya tsaakuyanutyutsishi, Se-leucia ye wa tyeeyu, e ai si yuku Cyprus dyika ye kanue  
5 niya tyeeyu. E Salamis ai gaapi, Iusi ga-mani chukatsanutyu ai Horiyu hano kayawatyamishra, e tsika

## E-TSAAPUTYISHI 13

- 6 John tyaumatsi. E kutaashroma sai gayitratyutsi,  
Paphos hau, tyiyainawa haityi gaukimunishi, tsa kaima-
- 7 tsi kokatseta, Horiyu hano Bar-Jesus E-tya. Emi ai ha-  
tsi dyu huchani tsekkiyanishi Sergius Paulus chuu-  
tyusutyutsishi, tsi kutonimishi hatrutsai. Emi Barna-  
bas e Saul tyuuppeotsa, e Iusi ga-mani niekakunishi
- 8 tyiutsipu. Etyu Elymas gaukimunishi (she E-gashi tsi-  
tyarapatyitrani emi taa) tyiuppakasha, tyiutaanikuiya  
huchani tsekkiyanishi uhimatyi dyika si aishigu-
- 9 traimi. Etyu Saul (tsika Paul tsaniatyishi) Tsityumi
- 10 Maiani kukainishi, tsishatsi hau tyiukacha e tyanata:  
A, Sai tsi shra yumakunishi e sutsi-tseshi kukaimishi,  
shruwatyaimu ga-iatra kuta, sai uitonimishi uiyanimi  
kuta, tsatsi naappakutsa-tru Huchani ga-shrami-hiani
- 11 upakatsani? She shru Mu, Huchani ga-mashityi ku-  
tru-pakatsa, e tsatsi tsikashityi nitra-kutruma, ha-  
tsuma tsatsi oshratra niukacha-shrunu. E tu haika-  
miku tsesaya e tsamishityutsi tyiutra, e ai shra tsutyu
- 12 e tyiyaipatyikuiya hau kamashityi si nitaikkuiya-tsiu-  
manishi. E shrue huchani tsekkiyanishi tsi kui tsiu-  
tranishi kukachani tyiuhima, Huchani ga-mani niya  
imi me tyiutyita.
- 13 She shrue Paul e kayiwatyisetyishi Paphos dyika si  
tsekkiyi, kanue niya, Pamphylia dyu Perga hau tyee-  
tyu, e John kuutaatanu Jerusalem ye si tsutyu. Etyu  
Perga ai si yuku tseeyi, Pisidia dyu Antioch hau tyaatsi;  
e uanatrani tsaashityi ayawatyamishra hau tyaapu e ai
- 15 si nu chukuiyanu. E ayawatyamishra ga-yani tsaapu-  
tyishi utsitokaishi e prophet tsidyatranishi kukacha-  
natyi si yuku hau ye taaukuiyanitta taania: Hatrutsai,  
tyumutyaimishi, tsi emi haityi uwakashitaayani kutraa-
- 16 shra, hano payaaputyu. She Paul dyu tyutaatyu, e  
kamashityi niya chuiyaashita, tyanata:
- 17 Israel-me hano, e hishrome Iusi shi-uamashita-  
natyishi, trakani. Towa Israel hano ga-Iusishi shra-  
naishityashi tyiwataatawa, e hano dinya-tyayatra, ai  
Egypt hatsi dyu tseemi, e tsishatsishi kamashityi niya
- 18 ai si yuku tyayitrutse. E hatyi tsi tyana-wa-katsi ka-

### E-TSAAPUTYISHI 13

shraityi gowa gaittyianishi kutaatsi chaushigitsa ai  
19 tsatdyau dyu. E shrue maityana-ya tsi hanowishi ai  
Canaan tseemishi si nu gayatyatsinaima, gaa-hatsishi  
20 tayiwakuichani, e shrue ai si yuku hatyi tsi tyana-wa-  
katsi-wa-katsi si dyu taama-wa-katsi kashraityi  
Samuel prophet tsaani hema tsayayatanikuiyanishi  
21 tyayiwayaani. E emi si yuku rai tseshi tsiwatsiputyi, e  
Iusi tayiwayaani Kish ga-mutyi Saul, Benjamin hano  
22 tseshi. Emi tyana-wa-katsi kashraityi tyaucha. E  
shrue emi yuku si nu tsityityaani, David, rai tseshi niya  
ka, hau dyu tyayiwanamatsani. Emi niya tsika shityi-  
shityiku tsitrani e-tyanata: Jesse ga-mutyi David si-  
yaina eetse se-winoshika kuushranishi hatrutsai hyaa-  
23 ni. Towa sa-uwayanishi sai tsi e-nitraku. Towa ha-  
trutsai ga-tsini si yuku, emi e-tsiushranishi, Israel dyika  
24 Iusi tyayiwanamatsani Jesus Tsayatragumishi. John  
tsaya kokatsetani uwataipunaimi tseshi baptismal  
25 Israel hano dyika, Jesus tsa na hawe tsutsi. E John  
tsiitranishi gaunaottani, tyanata: Hau sutyeeshi shinae-  
tranisha? Tsatsi emi tseshi shityanu. Etyu mu,  
Hinome dyika hamashu hau hawe tsunyekunishi, emi  
ga-hashuimi uwaushiputawi tsatsi chitye shityanu.  
26 Hano tyumutyaimishi, Abraham ga-hano kutra-iatra-  
tyaimishi, e tsika hishrome kutyeema hautsi Iusi, tsi-  
uamashitanikuiyanatyishi hinome tyitra dyika towa  
27 uitragumi mani shikayityitta. She ai Jerusalem dyu  
gatrutyishi e gaa-kowachanityaimishi, tsatsi tyiunima-  
satyishi niya ka, e prophet tsidyatranishi kowakatse-  
tanishi tsika tsatsi tyayitruminasatyishi niya ka, emi  
sai uanatrani tsaashityitratyama tsiwakachanishi, tu  
28 etse e-shitranatya, Jesus shrutanatyishi niya ka. She  
gaika tsatsi tsi shi dyia niushitokunishi tsiyainawatya-  
nu, she etyu tsiwatsipu Pilate niumutyitsa-tsiumanishi.  
29 E kutsi niya sai tsidyatranishi sai e-tsitrnatyani, kiwa  
tseshi si nu chayaawana, e ai ityaitsimishra tyitsime.  
30 Etyu Iusi ushitoni dyika si dyu tyiipatyu. E Galilee si  
31 yuku Jerusalem dyika hawe chayiwatyimetyishi naoya  
tsaashityi hawe tyiukachana, emi hanowishi dyika shi-

## E-TSAAPUTYISHI 13

- 32 tyishityiku tsaaputyishi. E tawa mani shrayaape, emi  
33 naishityiatyaimishi dyika tsuishranishi, gowa Iusi emi  
e-tsitra shra-iatratyaimishi dyika, Jesus si dyu tsipat-  
tyinishi niya; e tsika emi taa ai dyue yuni dyika nu tsi-  
dyatrani: Sa-Mutyi kuta, towa tsaashityi iatra-shro-  
34 ma. E ushityini dyika si dyu tsiuipatyinishi, tsatsi na  
ushratyi tseshi dyika ye si aitranishi niya, emi taa ty-  
nata: David ga-kaimatsishi ayawatyuityi nyeou-  
35 shroma. She e tsika ai hatyi yuni niya e-katsa: Kui-  
tyumishi kutrashi kushratyi ukachani tsatsi niuheetsa-  
36 shrunu. She David, Iusi ga-uwanishi niya ga-hano-  
kikaatsanishi gatrutsi niya kutanitranishi si yuku, tyi-  
patto, e ga-naishityia-tyaimishi gayatsi taaitsime, e  
37 tyiukacha kushratyishi. Etyu Iusi si dyu tsipatyunishi  
38 tsatsi kushratyi tyiukachanu. Emi heya putonimasa,  
hatrutsai, tyumutyaimishi, emi towa hatrutsai heya  
39 shayakatsetani ukitsishi uwataipunaimi; e emi niya sai  
tsiwahimatyishi sai tsi dyika si uitonimitratyani-  
tyayitranitta, emi tsi dyika si Moses ga-utsitokaii niya  
hishrome tsatsi itye uitonimitratyani-nyeyiwatranitta-  
40 shrunu. Emi heya bashru-trusa prophet tseshi niya  
tsanatanishi tsatsi emi e-naaitra-shrunu, hishrome  
dyika:
- 41 Pukacha, tu tsi kutruwatrumasatyishi, e imi-me  
putrutrani e tu shaaitra. She kutra tsaashityi,  
utanitrani sutanitra utanitrani mame tsatsi niu-  
hima-kutrumanihi, bato hatrutsai tutraapiku.
- 42 E Horiyu hano ai ayawatyamishra si tseemuni,  
nanami hano chuwauktana towa mani hamashutse ua-  
natrani tsaashityi tsika na nyeyikatsanitta-tsiwatrums-  
43 satyishi. She tsayawatyami heme kaaitrani naoya tse  
Horiyu hano e kauyukaii tsiwahimatyishi Paul e Barna-  
bas dyika hamashu tyeeku; towa emi tyayiminatyu  
tiwakashitayanu meshru Iusi ga-tinye dyika uni.
- 44 She emi hamashu tse uanatrani tsaashityi chaai-  
trani, mamu sai tsaashityitra-me-tra hau shruni tyeeku,
- 45 Iusi ga-mani akani niya ka. She etyu Horiyu hano tsi  
hanowishi kukachanatyi, mame utsishikayani tayatra e

## E-TSAAPUTYISHI 13, 14

46 Paul e-katsanishi dyika yukuma tsityanatyi sutsi-me  
tania. She Paul e Barnabas tyiushigitsishi-traty,  
e-tyaanikuiya: Sekka Iusi ga-mani mishru hishrome  
dyika tsaya e-niyetsaaniku, etyu wa yuku shichaana, e  
tsiyakamitsi iani niya tsatsi yatra kutaaputyishi uni  
noyu shru-utana, Mu, nanami hano dyika ye saishigu-  
47 traimu. She emi taa Huchani shikayayanikuiya kana-  
tani:

Shra-utaata hano-tyitra dyika mashra n'ta-shru-  
nishi niya ka, emi uitragumishi niya ka n'ta-shru-  
nishi, menashru sai gaishibishra tsiyatsini hema.

48 E she nanami hano towa ga-kanityi, tyiwauishityia e  
Huchani ga-mani tyu-uamashitana; e hau tsi hatsu  
49 tsiyakamitsi iani ye tsayatawishi, tyiwahima. E  
Huchani ga-mani sai ai shra tseshra dyu tyiuppetani.  
50 She etyu Horiyu hano tyiwayeetsani-tratyana tsiwahim-  
atyishi e dinya tsaaputyishi kuiyawitra e ai tsaashi-  
tyitra hatrutsai yani tsaaputyishi, e Paul e Barnabas  
51 dyika tyaamanitsitratyana, e hema ai gowachanishra  
ai yuku si taaputsana. Etyu gaashityini washrutsishi  
ai tseema ye wa chauppakatsana, e Iconium hau  
52 tyaatsi. E tyayisomeshityia mame uishityiaani tyi-  
wautra e Tsityumi Maiani chatrukaii.

14 E shrue e-chaaitra ai Iconium, ishikawa ai Horiyu  
hano kayiwatyamishra dyika ye tyaapu e tyamashra-  
nishi niya ka mame tsi hanowishi, Horiyu e tsika  
2 Grecia-me hano tyiwahima. Etyu tsatsi tsiwahim-  
atyishi Horiyu hano tyiwayeetsanitratyana nanami hano  
e-katsityishitanishi sutsi tyayiwatranitta, tyumutyai-  
3 mishi dyika ye wa. She maiku ai chukuiyanu  
kuushigitsishi chukatsetanu, Huchani niya, emi tinye  
tse ga-mani niya shityishityiku tsityitanityutsi e  
4 tyiemi-utrani e imi-me tseshi gaamashityi niya e-  
tyitranutyutsishi taauheetsani. Etyu ai tsaashityitra-  
me tsi hanowishi chuwayakuicha, e sunama Horiyu  
hano dyika ye wa taapu, e sunama umatsityaimishi  
5 dyika ye wa. E nanami hano e Horiyu hano e tsika  
gaa-huchanityaimishi tsukawaiityi, ganunani nieitra-

## E-TSAAPUTYISHI 14

- 6 nutyunu e yaoni niya niuyutsana-tsiumanutyunu, e chaaftyumutyu, e Lystra e Derbe ye tautyeetyu, Lycaonia ai dyu tsaashityitra e ai shriena tsatdyau  
7 tseshra ye. E tsika ai tawa-mani chukatsetanutyu.  
8 E ai Lystra hau hatrutsai ai si tyaa, kashityi niya tsa itye-kunishi, ga-naia ga-washrana si yuku tyuku-  
9 sutsitanishi, tsatsi na hama chaanitryeyanishi, towa emi chaka Paul e-katsanishi. E Paul tsishatsi hau tyukachani, e niutsaipu-tsiumanishi tsiuhimatyishi  
10 tyiwittawani, tsishatsi tyamashra: Shrashityi niya shitutsi dyu chutyitsi. E dyu chutotsa e chaanitru-  
11 tyeya. E tsi hanowishi Paul e-tsitranihi kukacha-  
natyi, tsishatsi tyiwashigaitsa tyaana, Lycaonia tseni niya: Iusi tsaaputyishi hawe nu shikuwa-uatseepu,  
12 hano-ma tseshi. E Barnabas, Jupiter tania; e Paul, Mercury tania, she yani tseshi kokatseta niya ka.  
13 She ga-ashityitarsi ai yani si Jupiter kaatru dyika chayani hawe weyasi tyayitrutse e agutrutsi tsiushigu-  
tyitsishi ai tsiamma hau ye chaatye, e tsi hanowishi  
14 gayatsi uyaityani aashityiakumi tsiwatsipu. Etyu umatsityaimishi Barnabas e Paul towa gakani, gaa-  
wakuni chaushratyitsanu e hano dyika suna ye  
15 tyuumitsa tyuushigaitstani, e-taanikuiya: Hatrutsai, Tsekoma tsi towa shityityia? Nutyumu tu hano sutaa, tu hishrome-me sutraiani, e shayikatsetanityu towa tu ma tseshi dyika si aishigutraimi tsianishi Iusi dyika ye wa, emi howaka e hatsi e kawaishu e sai tsi ai nu  
16 tseechupishi chuwanish. Emi hamaha sai tsi shra kui tse hanowishi tyayiwaheetsani noyu ga-uyukaishi  
17 niya aanitryeyani. She etyu tsatsi tu chaaitra, tsa noyu kutsi niya shityishityiku tsaani, towa dyika tawa e-tyityitani, e howaka dyika si nu achani e hitruni kaaitrani kashraityi shikayiwatrani, shraya-winoshika  
18 upbewi e uishityiaani niya shikayataasu. E towa tsanatanishi niya tu etse mamu tsatsi hano tyiwapako-  
tsanu, tsa uyaityani-aashityiakumi, gaapishra dyika.  
19 E haityi emi Horiyu hano Antioch e Iconium si tyeeku, emi tsi hanowishi tyiwakashitaityia, e Paul

## E-TSAAPUTYISHI 14, 15

yaoni niya tyiuyutsana, e tsaashityitra dyika si taanu-  
20 tsana tyinaetranisha kushityishi. She etyu tsayiso-  
meshitanishi ai shriena tseechanishityi, Paul si dyu  
tyutaatyu, e tsaashityitra hake si tyupu, e shrue nanu  
ai si yuku tsutyu, Barnabas chuutyimutyu, Derbe ye  
21 wa. E shrue tawa-mani kokatsanityutsi towa tsaashi-  
tyitra dyika, e naoya gayisomeshitanityutsi, tsika na  
22 Lystra e Iconium e Antioch ye si tyeeyu, tsayisomeshi-  
tanishi ga-maianishi kutru tyayatyatsisutyu e tyuwaka-  
shitayanu, meshru shityuhimatyi aapi, e sekka tsi  
naoya unatyumenishi niya Iusi ga-itye tseshra dyika  
23 ye n'tyeepu-shrusa. E sai hawe tsi ayawatyamishra  
katrutsi niya tsaya tsaaputyishi tyuwashutsanu, amo-  
tyayatranutyutsi e kowashruikase amoma taaputyi  
Huchani dyika ye tyiyatanutyu emi gaapishra tsiwah-  
24 matyishi. E Pisidia ai shra tseeyi si yuku Pamphylia  
25 hau tyaatsi. E ai Perga dyu mani kokatsetanutyutsi,  
26 Attalia ye nu tyeeyu. E shrue ai si yuku kanue niya  
Antioch ye tyeeyu towa tsaashityitra si Iusi ga-tinye  
tseshi dyika ye tsuitatawa, e-tsitrantutuysishi tani niya  
27 ka. E hau gaatsini e ayawatyami shruni tsitranutyutsi,  
sai tsi Iusi e-tsaautranittyishi e-tyippenu, e gowa  
uhimatyi dyika tsiamama gayaatawityishi nanami hano  
28 katrutsi niya. Shrue maiku ai tyaa, ai gayisomeshitanishi  
tseemishra.

15 E hau ye emi hatrutsai Judea si nu tyekkuishi  
tyumutyaimishi tyayasomeshityia, tyaana: Tsi tsa  
Moses ga-uyukaishi emi taa tse shayiwashikutyitsi-  
2 shatyanu, tsatsi itye niyatragumi-kutrusatyanu. She  
Paul e Barnabas tsatsi tsi tu drusishunishi tsa tsiwa-  
shranishi e yukuma katsanishi we hatrutsai dyika hake  
wa tsiwautrani, sekka tyiusa Paul e Barnabas e hau  
ye emi mika Jerusalem ye dyu tsutsi, umatsityaimishi  
3 e tsaya tsaaputyishi dyika, towa upetawi niya ka. E  
shrue hatsuma kayawatyamishi tayitrutsee, Phoenicia  
e Samaria hake tyaiyatyu, nanami hano kayaishigutra-  
imishi tyippenutuysi, e mame uishityiaani sai tyumu-  
4 tyaimishi tyayiwatranittyu. E Jerusalem hau gaatsini,

## E-TSAAPUTYISHI 15

- ai ayawatyamishi e tsika umatsityaimishi e tsaya tsaaputyishi tyiushutsana, e shrue tyippenu sai tsi  
5 Iusi e-tsaatranittyutsishi. Etyu hau dyu tyutattyu hau ye emi Pharasee hano, tsiuhimatyishi tyanatani: Sekka ayiwashikutyitsanittyi e ayayanikuiyani Moses ga-utsitokaii uyukaiyi.
- 6 She umatsityaimishi e tsaya-tsaaputyishi hau  
7 shruni chayawatyami towaya shi dyia atsaani. E tsi naoya shruni tseemuni Peter dyu tyutattyu e tyayitsakuiya:
- Hatrutsai e tyumutyaimishi, shrutonimasa gowa maiku kaaitra gowa Iusi kutaatawishi sutyeema dyika si, nanami hano siika niya tawa-mani n'trakani-tyiusa,  
8 e niwahima-tyiwatruma. E Iusi, sai winoshika gaitruminishi, shityishityiku gayiwatrani Tsityumi Maiani gayiwayaani, tsika emi hinome hemaku shikayiwa-  
9 yaanittyishi, e tsatsi nanami tseshi tsiutranu sutyeema ku tseema dyika, gaya-winoshika gayiwayashityimi  
10 uhimatyi niya. She e shru tsekoma Iusi shrutaankuiyana, tsayisomeshitanishi gaya-witra ye ayaityuishityi ayityityi, emi tsatsi haityi shra-naishityiashi ku e tsika hinome-tyitra tsatsi itye naikkuii-shikusatyanu? Etyu shikuwahima, Huchani Jesus Christo ga-tinye tseshi niya ka natragumi-shrusatyishi, emi e kaatra-gumetyishi.
- 12 She sai tsi hanowishi maku tyusa; tyachaatrashityi Barnabas e Paul dyika, tsippetanutyutsishi gowa Iusi tsi tyiemitrani e imi-me tseshi nanami hano e-  
13 gayiwatrannyishi, noyu tseshi niya ka. E towa maku tsaastrani si yuku, James tyayipeyuta tyanata:
- 14 Tyumutyaimishi, kukanatyi, Simeon tsippe gowa Iusi nanami hano tsaya hatyi tyuwatanye, emi si yuku  
15 E-gashi kutsi niya hano tyuwatata. E towa tsiushranishi prophet ga-tseni emi e tsidyatrani:
- 16 Tsi towa si yuku hawe si tsunye-si, e tsika na David ga-uameshityi naatra-si, emi si nu bukanishi. E tsika gamatsaishrumishi naatra-si, e si dyu nitattyu-si. Emi heya kaatyumishi hano e

## E-TSAAPUTYISHI 15

- 18 sai haupa nanami hano ai dyu E-seshi tsaanima-satyishi, Huchani niyaipana-kusanu, Huchani e-katsa, hama tse dyika si yuku tsayatonime-wanishi.
- 19 Emi heya taa se-yata, nanami hano Iusi dyika kaya-shigutraimishi tsatsi niwappakashita-shikusatyau.
- 20 Etyu nyeyidyatranitta-shrusa yapaishuni adyema tse-shra dyika, e iani-utranishi dyika, e tsi-witra-shayutsishi dyika, e matsu dyika tsa hau uiatsini. She mame hamatse si yuku Moses tsidyatranishi niya kowakatsetyia sai hawe tsaashityira ye tsee, she sai heme uanatrani tsaashityi ayawatyamishra ye emi tsidyatrani tsiukachanikuiyani.
- 22 She shrue mame tyiwau-anyutsa umatsityaimishi e tsaya-tsaaputyishi e sai tsayawatyamishi ayayaatani tsiwatatawi hatrutsai noyu ai si tsaaputyishi dyika si Paul e Barnabas Antioch ye ayiwaytyme. Emi tsiwatatawishi Judas, Barsabas tsaniatyishi e Silas,
- 23 utsymutyaimishi dyika ye yani tseeshi. E tsidyatran chuwayatrana, emi towa hatrutsai chaatyee towa taa e-tsiutranishi: Umatsityaimishi e tsaya-tsaaputyishi e tyumutyaimishi hake si tyayauishatsanitta Antioch e Syria e Cilicia ai dyu tseemishi nanami hano utsymutyaimishi dyika ye. She sutra-kani hau ye emi haityi sutyeema yuku tsekkuishi tseni niya tutraya-itsyawita, kutra-maianishi ayama trutrayatyita tyanatani: Sekka nyeyiwashikutyitsanitta-kutruwatrumsa e utsitokaishi nauyukai-kutrusa; (towa hatrutsai dyika ye tsatsi taa hau shityiyanikuiyanaty) tawae shikuwautra ishikaku sayiwaytamyi shikuwashranishi, tsawatatawishi hatrutsai hake uiyatani, kutyeema dyika ye, tinye-
- 26 siumanutyutsishi Barnabas e Paul ayiwaytyme. Emi sutra-Huchani Jesus Christo E-gashi kutsi niya gaianishi ganashiyaini-tayatranishi hatrutsai tseshi. Emi heya wa Judas e Silas seekuyana, tsika emi niwappe-kutruwatrumsa sai tsi hemaku tsaaika niya. She Tsityumi Maiani niya tawae tsitra, e tsika sutyeema, towa sekka tsi e utrani tsatsi hau yuwi mina gayutaya

## E-TSAAPUTYISHI 15, 16

- 29 ayaapi hishrome dyika; wa emi yapaishuni dyika si, e  
tsi tsiyaityanishi dyika si, e matsi dyika si e tsi tsiwa-  
witra-shayutsishi dyika si e iani-utrani dyika si  
nutruwatyashi-kutrusa. Tsi emi towa dyika tsatsi hau  
kutye-atsinu, tawa e-nitrana-kutrusa. Truwauishatsi.
- 30 She tsayayatanatyi Antioch hau tyeetyu, e tsi  
hanowishi hau shru ni gayiwatyametyi tsidyatrani hau  
31 tyichana. She towa kuukachanatyi mame tyiwaishi-  
32 tyia, ushigitsishi niya ka. E Judas e Silas, noyu  
kokatsetanutyu, tyumutyaimishi tyuwakashitayanu,  
33 naoya mani niya, e nuwa tyayatyatsimu. E ai, hatsuma  
kukuiyanutyutsi si yuku tawa si taakuyana, tyumu-  
34 tyaimishi dyika si umatsityaimishi dyika ye. She etyu  
35 Silas anye-tyiutra mina hatsumashu ai ukuiyani. Paul  
e Barnabas tsika ai Antioch dyu meshru tyaa, tya-  
yasomeshitanutyu e chukatsetanutyu Huchani ga-  
mani, e tsika naoya mika hau yuwi.
- 36 E hatsu sai ai si dyu, Paul e-chatsa, Barnabas  
dyika: Shrao, Tsika na shra-tyumutyaimishi shiwa-  
tanyetyu sai hawe tsaashityitra ye, emi ai dyu Huchani  
ga-mani sokatsetanutyutsishi, e shiwakachanutyu  
37 gowa hawe tseemishi. E Barnabas sekka-tyu John,  
38 Mark tsaniatyishi, uyutseyi. Etyu Paul chutsityishita  
tsatsi tawa tseshi uyutseyi emi ai Pamphylia tseemi  
yuku tyiutsukunishi, e tsatsi chayiwatyime tani dyika  
39 ye. E mame hatsumaku shruni-tyiumu, emi heya  
40 nowaina tyeeeyu, she Barnabas Mark tyiyutse, kanue  
niya Cyprus ye tyeeeyu. Etyu Paul Silas tyutaata, e ai  
si yuku tyeeeyu, tyumutyaimishi hau tyikuiyanatyishi,  
41 Iusi ga-tinye tseshi dyika ye. E Syria e Cilicia ye ai  
shra tsutyu, e kayawatyamishi si dyu tyayatattyu.
- 16 She e tsika Derbe e Lystra hau taatsi, e Mu, hau  
ye emi tsayasomeeshita ai tya, Timothy E-tya, hau  
tsiuhimatyishi Horiyu-me ku cha-mutyi, etyu ga-  
2 naishityia Grecia-me ta. Emi tawa tsaanimasatyishi ai  
Lystra e Iconium tseemishi utsymutyaimishi hawe  
3 tyitrana. Towa Paul utsyimi tyitsipu, e nowe tyiushu-  
tsani tyiushikutyitsani emi ai hatsi dyu tseemishi

## E-TSAAPUTYISHI 16

- 4 Horiyu hano katrutsi niya ka, she tyiutonimasa ga-naishityia Grecia-me tseshi. E ai shra tsaashityitra hawe gaatsini hau tyayaaputyu tsiyatani emi ai Jerusalem tseemishi umatsityaimishi e tsaya-tsaaputyishi  
5 kutaatawatyishi. She kayiwatyamishi si dyu tyeetattyu uhimatyi niya, e tsaashityityama naoya tayatyita.
- 6 She ai shra Phrygia e Galatia hatsi tseeyi, Tsityumi Maiani niya tyiupakasha tsatsi ai Asia dyu mani ukatsani. E Mysia hau gaatsini si yuku Bithynia ye utsutsi tyiutaanu, etyu Maiani tsatsi tauyanitty, e  
9 shrue Mysia gaiyat�utsi Troas dyika hau tyaatsi. E gapishu ni Paul utyiemitrani tyiukacha. Macedonia-me hatrutsai ai si dyu tyuchani, tyiwittaanikuiya taatsakuiyasu: Tuwe bu Macedonia ye umu, e gayi-wamatsani. E utyiemitrani tyiukachani si yuku, haikamiku siuyetsana Macedonia ye utsutsi, kaimatsi sa-trutsityishita Huchani shikuwa-peotsanishi, tawamani ayakatsanittyi.
- 10 11 Emi heya Troas dyika yuku kanue seetoinaimetyi, tu shitutsi sutyeku Samothrace hema, e ai nanu Neapolis hau; e ai si yuku Philippi hau, towa emi Macedonia ai shra tsichunishi tsaashityitra ta, gowachani itye tsaaputyishi ai tseemishra; e ai tsaashityitra  
12 hatsu sai sutyee. E uanatrani tsaashityitratyani ai tsaashityitra yuku sutyeku hawe china butru ye, ai amoma-utrani tseshra dyika ye, e ai si nu saata, e  
13 14 hawe tsekkuishi kuiyawitra seyiminata. E haityi ku, Lydia E-gashi pishunatsa ukami tsishita, Thyatira tsaashityitra-me, Iusi dyika amoma-tyityitanishi, shikuwaka, emi ga-winoshika Huchani dyika tsaata,  
15 emi heya Paul tsi e-katsanishi gaachatra. E shrue baptismal tsitrani, e ai ga-tseema, shikuwa-shutsa, kanata: Tsi emi Huchani tsiuhimatsishi tiunaetranishatya, tuwe sa-ama tyeepu e ai chaata. E sekka shikayatra.
- 16 17 She e-chaaitra, amoma-sitranyeetyi, hau makutsa, chukimuni-maiani tyityitanishi shikawataiyyi, emi chukimunityitrani niya ga-yani tsaaputyishi dyika naoya

## E-TSAAPUTYISHI 16

- 17 hau tyayauitayani. Towa makutsa Paul e hinome tyitra dyika hamashu tsuku, e kushigaitsa, kanata: Towa hatrutsai mame dinya tseshi Iusi ga-umatsityaimishi tsaa, uitragumi hiani kutruwappetanatyutyishi. E naoya tsaashityi towa e-tsekkiya. Etyu Paul amo-tyiutsityishita, kaishigutra e maiani dyika taatsakuiya: Shrayanikuiya Jesus Christo E-gashi niya towa ku dyika si uyumuni. E emi eyu haikamiku si tyumu.
- 19 Etyu ga-yani tsaaputyishi kukachanatyi hau ga-uitayanishi unaetrani tsatsi na tsaani, Paul e Silas tyaatyatta, e ai utsitanishra dyika ye taaityitsaii gowachani dyika hau. E gayatanikuiya-tyitra dyika hau taayutsee, tyaana: Towa hatrutsai Horiyu tseeshi,
- 20 21 mame shra-ashityitrashi ganashiyaini tsityitanu, e gaayasomeshita uyukaishi, tsatsi itye nayukai-sutrusatyishi ku nayawa-sutrusatyishi, Roma-me sutaaputyishi nika ka. E tsi hanowishi ishikaku dyu tyaashranya tsa tsiwashranishi gaapishra dyika. E gayatanikuiyana dinya nu chuwa-wakuni-tyiutawa e chuawayana
- 22 23 ayashayani. E naoya wa tsiiushipitsanatyi utsitani hau taapunaime, e utsitani-gawaa tayanikuiyana shrami
- 24 25 niiutsayuku. Emi taa tayanikuiyanatyishi, mame wa ai gaya utsitani tseshra tyaapunaii, e gaa-ashityi hashityini-utyaatyi dyika hau taapunaii. She etyu suna noya kaaitrani Paul e Silas amoma-tyityitanu e Iusi dyika uamashitani chuyuttanu, e mika tsiwatsitani-
- 26 27 kuiyanishi tyiukana. E tu tsiwatyi mame hatsi chayuna, hemaku utsitani ai si dyu kinutsanishi chuwukutsa e tu haikamiku sai tsiamama chaata e sai haupa gaapashityanishi tayatoinaii. E utsitani-gawaa tyitrachuwani, utsitani tsiamama tsaatawishi kukachani, ga-ishipari dyu tyuku e gaika shru numutyitsatyu,
- 28 29 tyinaetrani tsiwatsitanikuiyanishi gapayushi. Etyu Paul tsishatsi tyushigaitsa tyanata: Bami sutsi chaitra, she tu sai tui sutyee. She shrue anatrani kuwittaa e hau nuka chutotsa, e sai tunutsitani hawe tsutyu e
- 30 Paul e Silas dyika ai yani nu chucha, e hawe si

## E-TSAAPUTYISHI 16, 17

31 tyiiutyiku e tyanata: Huchani tyitra, Gowa e-nitra-si  
32 emi heya nitragu-sinishi niya ka? E tyaanikuiya:  
33 Truhima Huchani Jesus Christo dyika, she e-nitragu-  
34 shru, e kutra-tseema. E Huchani ga-mani tyayimi-  
35 natyu gaapishra dyika e sai ai ga-tseema dyika. E emi  
36 eyu chaaitrani tu na gapishu ni, hake tyaayutse e  
37 tyaauteeeshityimi ushipitsi ga-adyatranishi, e haika-  
38 miku baptismal tyitra e sai ai ga-ama tseemishi. E  
39 shru ga-ama hau gaapunaimi upbewi hau tyaatyityi, e  
40 mame tyiuishityia Iusi dyika tsuhimatyikuiyani, e  
tsika sai ai ga-tseema.

35 E gaishibitratyani gayatanikuiyani sentaru hawe  
36 tyiyatana tyaana: He hatrutsai paatoinaii. E utsitani-  
37 gawaa towa mani Paul dyika tyiuppe: Gayatanikuiyana  
hawe tsiyatana si aatoinaimi. Shrue shru hina, su-  
tyeema kutru-uishityiaa. Etyu Paul e-tyayitsakuya:  
38 Shikaaishayana, tyiemi tse, tsa shikuutaanaty, Roma-  
39 me sutaaputyu; e ayatsitani hau tyaapunaime. Etyu  
40 yu, tsiushikumashityi si niutyikume-tyuumasa? Kaimatsi  
tsatsi. Noyu hawe peeku e si nutruutyikume.  
E sentaru towa mani gayatanikuiyana tyiwappenaty,  
e chaaputsana, gakanaty, Roma-me tseeshi. E hawe  
tyeeku e tyiowitzana, e si tyiiutyikume. E tyiwatsipu  
ai tsaashityira yuku si peeyu-tyiumasa. E ai ayatsi-  
tani si tyuumu, e Lydia ga-ama hau tyaapu, e shrue  
tyumutyaimishi kowakachanutyutsi shratsa-tyayatra-  
nutyutsi ai si yuku tyeeyu.

17 She e shrue Amphipolis e Apollonia hake gaiya-  
tyutsi, Thessalonica hau tyaatsi, emi ai dyu Horiyu  
2 hano ayawatyami-gaya ta. E Paul, emi e tyaonaitra-  
nishi-me, hake tyiwayupunaii, e chamie uanatrani  
3 tsaashityi Iusi Tsidyatranishi kukachani e ai si chuka-  
tseta e tyayiwa-shitutsitani, e kaimatsi-tyityitani  
4 Christo sekka nunatyumekunishi e tsika ushitoni dyika  
si dyu uipatyunishi, e tsika towa Jesus heya shraikatsa-  
nishi, wa emi Christo tsa. E haityi mika tyiwhima, e  
Paul e Silas dyika hau chuwataashita, e tsika kayukai-  
tyishi Grecia-me hano mame naoya tse, e yani tsaapu-

## E-TSAAPUTYISHI 17

- 5 tyishi kui-tyitra tsatsi tu hatsue. She etyu Horiyu hano, tsiutyishikayanatyishi hau tsi puta hatrutsai, tsa tawa tsaaputyishi tyiwatyainawatyi tyayiwatyame e sai tsaashityitra dyu ganashiyaini tyitrana, e Jason ga-ama hau chaauwasee, e tuyu si niutyukume-tyiumasa
- 6 chaatya ai hano dyika. E tsatsi gaayainawatyi, Jason e haityi utyumutyaimishi tyiwa-nutsana ai tsaashityitra huchani tsaaputyishi dyika ye, tyuwashigaittsita: Towa emi tsaapu, gaishibishra tsamashitaku-tsanatyishi tu na
- 7 hawe tseeku tsika. Towa emi Jason kuushutsanishi, e towa sai haupa Caesar tsiyatanishi yukuma e-tsekkiyanatyishi e-tsaapu, kanatata mina ishika rai ta, emi
- 8 Jesus. E hano kui tyayiwatrantta, e tsika ai tsaashi-
- 9 tyitra yani tsaaputyishi, tsi towa gakanityi. E Jason e mika hano dyika tsiwashrani si tayayaatana.
- 10 She utyumutyaimishi tu haikamiku Paul e Silas gapishu ni Berea ye tyaakuyana, e hau tyaatsini Horiyu
- 11 hano ga-ayawatyamishra hau tyaapu. She towa mina mame tsi tyiutonimasatyishi tsatsi hemaku Thessalonica-metra, she mani tyiushutsana, shrami-me katsityishitanishityi, e tsaashityitratyama tsidyatranishi
- 12 tyiukachanikuiyana tsi emi towa kaimatsi tseshi. Emi heya mame naoya tyiwhima, e tsika dinya kui-tyitra
- 13 Grecia-me taapu, e hatrutsai tsatsi tu hatsue. Etyu ai Thessalonica ai tseemishi Horiyu hano kutonimasatyi Iusi ga-mani Paul kokatsetanishi ai Berea dyu, tsika ai
- 14 hau tyeeku e hano ganashiyaini tyayatrana. E shrue tu haikamiku tyumutyaimishi Paul yuku tyiyawana, kawaishu butru ye wa, etyu Silas e Timothy mina tyaa.
- 15 E tsiyutseetyishi Athens hau tyiwatsinaime e kayawatyi Paul kuwayanishi Silas e Timothy shatru hawe gaapishra utsutsi, ai si yuku tyeeku.
- 16 She Paul ai Athens dyu gaayukamishi, ga-maiani utyuityi-tyitra, tsi iusi tsuitranishi tsaashityitra gutanishi kukachani. Emi heya ai ayawatyamishra gaya Horiyu hano e Paul shruni tyeemusu, e tsika kauyukaityishi hano, e tsika hawe uishitanishra ye gayiwayasushi, nanu tsama. E haityi Epicurean kusomishi e

## E-TSAAPUTYISHI 17

- tsika Stoic tsaaputyishi tyiputrayawa, e mikä tyaana:  
Tsiya shi dyia towa hatrutsai katsa? E mikä tyaana:  
Tyemeshru nanami iusi hau tsiyatanikuiya tsa. She  
Jesus e-ushitoni si dyu uipatyini niya tyayi-katsani.
- 19 E tyiyutsee, e Mars kotyu tseshra hau tyeeku, she  
tyaana: Shru-katsetanishi usomeshitanishi niya aku  
20 tsa e-niutonimasa-tutrusa? She e-shratsanishi wa emi  
tsi tsatsi na shrakanatyishi shrayappe. She shikuwa-  
21 tsipu utonimi tsi towa tseshi. (She sai heme Athens-me  
hano e ai tseemishi nanami hano tsatsi tsi haityi ishika  
taitrushanu, tu heme ayapetani ku akani haityi tsi natsi  
22 tseshi). She Paul ai Mars kotyu drutrutyा si dyu chu-  
tyatsi tyanata:
- Athens-me hatrutsai, sawatyaimishi. Si-ukacha  
23 hatsumaku sai tsi dyika shra-uyukaii. She tuwe si-  
yat�utsi e kutra-apaishumishi si-ukachani, towa hake  
kadyatranishi ishike yapaishuma siyaina: TSA TSIUNI-  
MISHI IUSI DYIKA. Emi heya kum emi shiyapaishanitta  
24 tsa hau shrutonimasatyi, emi niya shrawappe. Gai-  
shibishra e sai tsi ai dyu tseemishi ku-uitranishi Iusi,  
wa emi Kaunamatsi e gaishibishra gauchanishi, emi  
heya hamashityini niya tsi-uitranishi yapaishumishra  
25 gaya ye tsatsi gaachukunu; ku tsatsi hano-hamashi-  
tyini niya tsiyapaishumittyishra, tyameshru tsi haityi  
tsiutsiputyishi, she wa emi sai haupa dyika iani, e tsaa-  
26 tsi, e sai tsi, tsayaapikuiya. E ishike matsi niya sai tsi  
hanowishi kaya-uitra, sai hatsi dyu nutyee-kusatyishi  
niya ka, e mishru hama si yuku chu-uityimitra chitye  
27 naairakunishi e ai tseemishra tsiupichanishi; Iusi  
niyaipana-kusatyishi niya ka, tsi shru tsi gaapishra  
dyika ye nautanikuiyana-kusatyanu e tsiyainawatyanu,  
she etyu tsatsi sai haupa sutyeema dyika si tiyee gaku-  
28 nu. She he niya sutraityani, sayunyetyia e sutaa; emi  
taa haityi kutra-yuni-kowityita gaana:
- She hinome-tyitra tsika ai si washityi sutaapu.
- 29 Emi heya Iusi ga-washityi sutaaputyishi niya ka, gaika  
tsa shika-trutsityishitanu Iusi wa emi uru ku sawaka ku  
yaoni kushrugayunishi, hano ga-uyushikamishi e ga-

## E-TSAAPUTYISHI 17, 18

- 30 tsityishitanishi niya kadyatranishi. She hama towa tsa ga-uitonimitratyanishro, Iusi tsatsi tsi heya gowa tuy-nishi, etyu shru sai hano gayayanikuiya uwataipunaimi;
- 31 she tsaashityi kutaata, hama uitonimi tseshi niya gaishi-bishra niutakkunishi, kutaatanishi hatrutsai niya; towa sai haupa dyika kaimatsitraty, ushitoni dyika si dyu tsiiptatyini.
- 32 E ushitoni dyika si dyu uipatyini niya gakanityi, mika tyiumayanikuiyana, etyu mika tyaana: Tsika na towaya shi dyia niukana-shraomasa. She Paul ai tsee-ma yuku si tsutyu. She etyu haityi hatrutsai gaapishra dyika hau shruni tyeeku e tyiwahima, ai tyiutaa Mars kotypu-me Dionysius e Damaris E-tya kui-tseshi, e mika kayawatyisetyishi.
- 18 Towa tsi e-kaaitrani si yuku Paul Athens ai yuku si
- 2 tsutyu e Corinth dyika hau taatsi. E ai tyiyaina Horiyu-me hano, Aquila E-tyashi (ai Pontus tyiashi, menashru Italy si tsutyunishi, she Claudius tyauchanishi chuwaya sai Horiyu hano ai Rome yuku utsutsi), e tsika ga-okui
- 3 Priscilla, e emi gaapishra hau taatsi. E tsika eetsi kutanityitanishi niya ka, ai ga-ama chukuiya e chutanitra, she gayi-tani uameshityi kowityitanu taa. E uanatrani tsaashityi-ma ai ayawatyami-gaya chukatseta, Horiyu hano e Grecia-me hano dyika tyiwakashitaya.
- 5 Etyu Silas e Timothy ai Macedonia si tseeyi, Paul, mani niya tyiyatsitsinaii, Horiyu hano dyika shityishi-tyiku tyitra Jesus emi Christo tseshi. E noyu e-kusatyi yuku ma chaapaitsani e sutsi-me e-tyatsiatyi, Paul ga-wakuni chaappakatsa e tyayitsakuiya: Kutra-matsi noyu kutra-nushika ye dyu pee. Tsatsi na shityiutsiku.
- 7 Tui si yuku nanami hano dyika hau tsunye-si. She ai si yuku tsutyu, e hau hatrutsai Titus Justus E-tyashi, Iusi tsiuhimatyishi, gaama hau tyiupu, emi ai ayawa-tyamishra yuwi si nu tyaou. E Crispus, ayawatyamishra yani tseshi, Huchani tyiuhimma, e tsika sai ai kaatseema; e naoya Corinth-metra gakanityi tyiwahima
- 9 e baptismal tayatra. E gapishu ni Huchani tyimina

## E-TSAAPUTYISHI 18

- Paul, utyiemitrani niya ka, Bami tyiutyushu, etyu amashra e bami bishityi-uni, She suutyisutyu, e tsatsi hau niuyetsa-kutrumunu niunatyume-kutrumanishi niya ka, she tui tsaashityitra dyu naoya sa-hanowityai.
- She ishika kashraityi e shichisu tawatra ai chukuiya, e kutaatsi Iusi ga-mani tayasomeshitasu.
- Etyu Gallio hamashu gauchanitrani Achaia dyu, Horiyu hano ishikaku Paul dyika dyu tyaashratya e ayataanishra hau tyiyutsee tyaana: Towa hatrutsai hano kowakashitaya utsitokaii yuku ma Iusi uhimatyi.
- Etyu Paul gaika shru tsiika nyeetakuni, Gallio Horiyu hano ye tyayitsakuiya: Tsi emi kaimatsishra yuku ma sutsi tseshi ku sutsi ukitsi tsanu, Horiyu hano kutaaputyishi, hishrome dyika naushigitsa-sinishi shramime n'takunu; she etyu tsi tu me tseni ku haashi ku kutra-utsitokaishi niya tsipetawishranu, noyu truwatsitawa, she tsatsi towaya shi dyia ayataanikuiya n'tashikunu. She ayataanishra ai yuku si tyayiputsa.
- She shrue sai Grecia-me hano, Sosthenes, ayawatyamishra yani tseshi tyityatta e ai ayataanishra ai yani nu tyushayana. E Gallio tsatsi towaya tsi gowa-tyu.
- E towa si yuku Paul koimi maiku hatsumashu ai tyaa, e shrue utsyumutyaimishi tyayauishatsani, e kanue niya Syria ye tsutyu, e tsika Priscilla e Aquila chayiwatyme, ai Cencrea Paul ga-hadrani chushanawa, she emi e chaakaesukuiyani. She shrue Ephesus hau taatsi, e ai Priscilla e Aquila tyaakuiya, etyu Paul noyu ai ayawatyamishra hau tysiupu e Horiyu hano tyayikatsetani, she tsiwitthaanatyi, mina maiku ai ukuiyani, tsatsi tysiushranu, etyu gaya-uishatsanitty e-tyanata ni: Towa ai Jerusalem dyu bashruku nairakunishi sekka bashruku nitra-si, she etyu tsi emi Iusi e-kunu, tsika na tuwe si kutyeeema dyika ye tsunye-si. E kanue niya Ephesus ai yuku si tsutyu.
- E shrue Caesarea hau hatsi dyika tsiatsini, e hau dyu tsutsi, ayawatyamishra ye gowa-tsi tyitra e shrue Antioch ye nu tsutyu. She koimi maiku ai chukuiyani, ai yuku si tsutyu, e Galatia e Phrygia tsatdyau sai shra

## E-TSAAPUTYISHI 18, 19

hakushama tsutyu, sai haupa tayisomeshitanishi tyayi-washigitsityitani.

- 24 She e shru hau Horiyu hano Apollos E-tyashi, Alexandria ai tyiianishi, mame yumakunishi atsani hatrutsai, e Iusi tsidyatranishi mame kuso, Ephesus hau taatsi. Towa hatrutsai tyiuisomeshitanishi Huchani ga-hiani niya, e ga-maiani ka-uhimatsi, hatrutsai-me chatsa e tayasomeshita tsi Huchani niya ka, tu heme
- 25 John ga-baptisma tsi niya tyiutoni. E ai ayawatyamishra ai gaya atsani hau chutotsa, hatrutsai-me. Towa Aquila e Priscilla gakani, tyiushutsanatyu, e mina
- 26 shrami-me Iusi ga-hiani tyiupenutyu. E shrue Achaia ye niyatyu-kuni, utyumutyaimishi tyiwakashitaityia e chuwadyatrana tsayisomeshitanishi towa emi ushutsi,
- 27 she emi hau tsaatsini mame tyayiwamatsani Iusi gatinye niya tsiwahimatyishi. She mame tsishatsishi niya Horiyu hano ushrani tyayiwatrani, tyiemi me, Iusi tsidyatranishi niya tyiemi tyayiwatrani Jesus Christo tseshi.
- 19 She e chaaitra, Apollos ai Corinth tu na gaapi, Paul kotyu tseshra hatsi ye tyiyatyu ni, Ephesus hau taatsi e
- 2 haityi ai gayisomeshitanishi tyuwatyaina, e tyayitsakuiya: Hama kutruwa-himatyi Tsityumi Maiani tra-yaawa? E tania: Tsa, tsatsi na puta tsi heya shika-
- 3 kanitya tsi emi Tsityumi Maiani tsaanu. E tyayitsakuiya: Kume shrue tsi dyika ye baptismal kutrayatrana?
- 4 E tania: John ga-baptisma dyika ye. She Paul e-chatsa: Kaimatsi John uwataipunaimi niya baptismal tyayatyita, hano tyayitsakuiyasu, Sekka niwahimatsiwatrumanishi hinome dyika hamashu hawe tsunye-
- 5 kunishi wa emi Christo Jesus tseshi. E towa gakanityi,
- 6 Huchani Jesus E-gashi dyika ye baptismal tayatra. E shrue Paul kamashityi niya gowapakatsani, Tsityumi Maiani hawe tyiwauatsi, e nanami tseni niya tyatsia, e
- 7 kowakatsetyia. E sai hatrutsai hatyi tsi katsi dyue tsitra taapu.
- 8 E ayawatyamishra ye tyiupu e hatrutsai-me hatsu ma na chami tawatra chukatseta, tyi-ushitutsita e tyi-
- 9 wakashitaya tsi Iusi ga-itie tseshra niya. Etyu haityi

## E-TSAAPUTYISHI 19

hano gayayumishi e tsatsi tsiwahimatyi towa Hiani  
niya sutsi-me e-tyatsia tsi hanowishi dyika tseema, ai  
yuku tsutyu, no gayisomeshitanishi tyiwayakuicha,  
nanu-tsa-ma ai Tyrannus ga-someshitanishra tyi-  
10 ushitutsitasu. E towa sai eku hatsu ma na dyue ka-  
shraityi e-chaatyita, hatsumaku sai haupa Asia ai dyu  
gatrutyishi Huchani ga-mani tyakani, shikaewa Horiyu  
11 e Grecia hano. E mame haityi imi-me ishatsini Iusi e-  
12 tyitra, Paul kamashityi niya. Mame hatsumaku tu-  
yuma ukayawi e utotyani ga-tsini si tsiawasatyishi  
dyika ye tsaaikkuinitatyat, e hiyatsani si tyiwawatsee-  
13 kuiyasu, e sutsi maiani tyiwawatseemusu. She etyu  
haityia tsekkuuyana Horiyu hano gayayaoshikase, tu  
ma chuwatseewetyityia, sutsi ga-maianityishi dyika  
dyu Huchani Jesus E-gashi atsani, e-katsiatyi: Paul  
14 kokatsetanishi Jesus shrainu. E haityi Horiyu Sceva  
E-tyashi, yani tseshi chayani, maityana chamutyityai  
15 emi taa e-taapu. E sutsi maiani tayipeyuta tayitsa-  
kuiya: Jesus si-uni e Paul si-uni; etyu trutyu hau ku-  
16 taapu? E sutsi maiani gaachupishi hatrutsai hau chu-  
tottsa tseema, e tayiputraya e tyiwashia, hatsumaku he  
17 katrutyu ai si tyappayu, hanami e kuwanatyumeni. E  
towa tyiutonimi sai Horiyu e tsika Grecia hano ai  
Ephesus dyu gatrutyishi; e sai haupa chaaputsana, e  
18 Huchani Jesus E-gashi tsichu tysiutranu. E tsika naoya  
tsiwahimatyishi hau tyeeku e chuwawataipunaime e  
19 e-tsitranyishi hawe tyitrana. E naoya imi-me shi-  
kautrani e-tsitranyishi hau shruni chuwauyashee tsi-  
dyatranishi e tyi-takana, sai ai shikaami. E chuwau-  
iushityityana hatsu kayamishi, e chuwatyu taama-wa-  
20 katsi miri sawaka tseshi. Emi taa tsishatsi chitoni Iusi  
ga-mani, e tyishia.  
21 She towa e-kuinaottani, Paul, ga-maiani niya chucha,  
Macedonia e Achaia hake e-tsiyatytutsi, Jerusalem  
hake utsutsi, tyanatasu: Ai siipi si yuku, sekka Rome  
22 tsika niukacha-si. She Macedonia ye tyaakuya dyue  
hau tyiuikashanutyutyishi, Timothy e Erastus, etyu  
hatsuma noyu Asia ai chukuiya.

## E-TSAAPUTYISHI 19

23 E emi e tsaashityitratyani tsatsi tsi tu drusishu ga-  
24 nashiyainitratyani he Hiani shi dyia. She hau hatru-  
tsai Demetrius E-tyashi, sawaka kouityita, Diana kutsi  
niya sawaka yapaishuni chuuityitanishi, tsatsi tu drusi-  
shu sawaka kouityita tyayauitranitty; towa hau shruni  
tyayawat�au, e tsika emi taa tse kowatanitra, e tyanata:  
Hatrutsai, Shru-tonimasa towa tani niya shrami sa-  
yutiana. E hau yuwi kutraya-kashityi e kutra-kase  
tsatsi nowe ai Ephesus dyu, etyu mamu sai ai Asia shra  
towa Paul naoya tsi hanowishi kowakashitaya e yuku  
kayaishigutrai, tyanatasu: Tsi hamashityini niya tsui-  
tranishi, wa emi tsatsi iusi taaputya. Emi hey a tsatsi  
tu heme sutraitanishi ganashiyaini tu naaitrakunishi,  
etyu tsika tsichunishi kuitsa iusi Diana katruty a niya  
tsatsi na hau hey a nutsityishitakunu, e ga-uamashita-  
nishi tu naaitrakunu, emi sai Asia e gaishibishra tsaa-  
paishunita. E towa ga-kanatyi mame chaatsayawa e  
tyuwashigaitsa, tyaana: Ephesus-me Diana mina tsi-  
chunishi tsa. E sai tsaashityitra sai ai shra ganashi-  
yaini chaaitra. E Gaius e Aristarcus, Macedonia-me  
hatrutsai, Paul shra gaani kayiwatyisetyishi, tsaatya-  
tatyi, uishayani katruty a gaya ye ishikaku chuwato-  
tsa. E gaika Paul ai hano tseechupishra niupukuni,  
gayisomeshitanishi tsatsi tyiuyaanitta. E hau Asia yani  
tsaaputyishi, emi ga-ukinityaimishi, hau tyiyanikui-  
yanye tsatsi ai uishayani katruty a hake nupunaikuni  
utani. Emi hey a hau haityi mika tsi tyiwashigaitsta,  
etyu mika nanami shiya, she kayiwatyamishi gowa-  
tyiwautra, e naoya tse tsatsi tyi-utonimasa tsekoma hau  
shruni tsekkuishi. E tsi hanowishi dyika si Alexander  
tyiunutsana, Horiyu hano yani ye wa si tyuttyikume.  
E Alexander ga-mashityi niya dyu chaotta, hano dyika  
utseshruwani tyiutsipu. Etyu kutonimasatyi wa emi  
Horiyu hano tseshi, sai haupa ishikaku hatsu ma na  
dyue ura tyuwashigaitsta: Ephesus-me Diana mame  
tsichunishi tsa. E tsaashityitra kudyatyita tsi hanowi  
bishihi kayatrani tyanata: Ephesus-me hatrutsai, Hau  
hatrutsai tsi tsa kutoni Ephesus tsaashityitra tsichu-

## E-TSAAPUTYISHI 19, 20

36 nishi Diana yapaishumishra gowaaku, emi Jupiter si  
yapaishumi tseshi. Towa tsatsi tsa kaimatsi nyieinia-  
kunishi niya ka, gaika bishityi n'trusa-kutrusa, e tsatsi  
37 ganashiyaini me e-nutaapu-kutrusatyau. She tuwe  
shraayutsee towa hatrutsai, emi tsatsi ayawatyamishra  
kuuchayawayanutyu ku tsatsi tsika sutra-kuitsa iusi  
38 dyika sutsi-me e-kaatsanu. Emi heya tsi Demetrius e  
kutaatsi kowatanityita, tsi niya hau tsi kuyeetsanisha-  
tyanu, ayataanishra tsaatawi, e hamashu gauchanitrani  
39 shitaapu. Paya-upinaime. Etyu tsi haityi ishika shiya  
kutruwa-tsiputyanu, tu dyutishru tsayiwatyamishi  
40 dyika niuitawaniku. She kaimatsi ganashiyaini nyei-  
wapinaimi-shikuwatrumasatyau towa tsaashityi gana-  
shiyainishi niya, she tsatsi tsi shi dyia e-kaaitranishi,  
e emi niya tsatsi itye nippena-shikusatya towa kayiwa-  
41 tyase niya ka. E emi taa e-katsani hano si tyiyata.

20 E ganashiyaini bishityi e-chaaitra ni, Paul gayiso-  
meshitanishi gaapishra hau tyiwappeotsa e tyayauitsia  
e ai yuku si tsutyu, Macedonia hake wa tsutyunishi  
2 niya ka. E hake wa tsutyu ni, e mame uwakashitayani  
3 tyayaou, Grecia hau taatsi. E chami tawatra ai chuk-  
kuiya. E Horiyu hano tyiutsaishikutyityia, gaika Syrai  
hake wa kanue niya tsunyeku ni, Macedonia hake ni-  
4 yatyukunishi tyiuyetsa. E Berea-me Sopater, emi  
Pyrrhus cha-mutyi, e Thessalonia-metra Aristarchus  
e Secundus; e Derbe-me Gaius, e Timothy; e Asia-  
me Tychicus e Trophimus, Asia hema kutaatsi tyeeku.  
5 Etyu towa mishru ai yani tyeeku e ai Troas tutraa-  
6 yukamisha. E tsa kashratyi tsayashityi semita tsaa-  
shityi si yuku Philippi si yuku kanue niya sutyeku, e  
taama saii tse ai Troas gaapishra hau sutyetyu. Ai  
maityana sai sutyee.

7 E Domiku ishike tsaashityi, semita utsayutsi niya  
sayiwatyametyi, Paul tyayimina nanu ai yuku si utsutsi  
8 tyiuyetsani, e suna gapishu hema maiku chukatseta. E  
ai dinya gaya ye naoya tanatrani, ai sayiwatyamishra.  
9 E ai kuishityama kowayatyuma si dyu hau mutye tsa  
tyaa, Eutychus E-tyashi, mame tyiipakkuiya, e Paul

## E-TSAAPUTYISHI 20

- mina meshru kokatsetani mame mina tyiipatto e tyutracha, chamiya dyu katrutyu dyika si nu, e kushityi si dyu taayaawa. E Paul hake nu tsutyu, e gaapishra nu chaaitsi e kuitsiyame tyanata: Bashrumi ganashiyaini trayatra, she mina ga-iani gauchu. E hake si dyu tsutyu ni, e semita kautsayutsani, e kupbewi, e mina maiku katsani, mi gaishibitratyu ni hema, shru si yuku tsutyu. E mutye tseshi tsiiiani hake si tyiyutsee, e tsatsi tu koi-mi shratsa-tyeetya.
- 13        Etyu tsaya kanue dyika ye si sutyekuii, Assos ye wa kanue niya sutyeku, ai si Paul dyu upinaimi suwauuyaana, she emi taa shikayayanikuiya, etyu noyu ani kuyetsa. E ai Assos shikayawataimi dyu sipunaime e Mitylene hau sutyeteyu. E ai si yuku kanue niya sutyeku, shrue ai nanu Chios haweku hake sutrayitryu, e ai nanu Samos hau sutyeteyu e ai Trogylgium hau sutyeeysatsi, ai nanu Miletus hau sutyeteyu; she Paul kuyetsa Ephesus ye wa uiyatsini, she tsatsi ai Asia dyu maiku nukuiyakunishi niya ka; she tsiunashia, tsi emi itye kaaitranu, Jerusalem ai niikunishi emi e Taama-wa-katsi Tsaashityi Bashruku tsaashityi.
- 17        E Miletus si Ephesus hau tyayayanikuiya ayawa-  
18        tyami tsaya tsaaputyishi hawe uwapeotsi. E shrue hau tsiwatseetyupi e-tyayitsakuiya:
- Shrutronimasa, ishike tsaashityi shru tui Asia see-tsini, gowa kui sutyeeshi, tu dyutsishru amome sotsityishitani Huchani si-tanitrani e sawanashityitrani, e shikutaanikuiyani emi Horiyu hano shiku-tsaishikutetyiatyishi niya ka, e gowa tsatsi shikuishikumasha haityi tsi yatra niwautra-kutruamanishi; etyu hau ye shrayiwatrani, e tyiemi tse shrayisomeshita katrutyishu, shikaewa Horiyu e Grecia-me hano dyika shityishi shityiku si-tyita Iusi dyika ye wa uwataipunaimi e sutra-Huchani Jesus Christo dyika ye wa uhimatyi. Etyu mu, shru Jerusalem dyika ye tsu-se, maiani niya sapashityani, tsatsi si-utoni tsi ai kui naaitra-sinishi; she etyu ai hawe sai tsaashityitra Tsityumi Maiani shityishityiku tsityita, e-katsasu apashityani e unatyumeni

## E-TSAAPUTYISHI 20

24 tutyiyukami. Etyu tsatsi tsi towa puta gowa-shikunu,  
ku tsatsi sa-iani yatra shikaumanu, tsi emi saitani shi-  
kuishityiaani suinaottanu, e tsika Huchani Jesus dyika  
si sayaawishi tani, emi Iusi ga-tinye tseshi tawa-mani  
25 shityishityiku utrani. She mu, siutoni hishrome sai  
haupa kutyeeema hawe seenitrutyayasu Iusi ga-itye  
tseshi shayikatsetanityishi, tsatsi na si-wawi niuka-  
26 chana-kutrusatya. Emi heya wai shityishityiku sitra,  
hishrome dyika ye, hinome sai haupa ga-matsishi  
27 dyika shikuyashityimi; she tsatsi shika-upakutsanu sai  
28 tsi Iusi ga-uwayanishi ukatsani, hishrome dyika. Emi  
heya bashru-chuwatrumsa e tsika sai tsiwaatsishi  
bashru-trusa, emi Tsityumi Maiani tsaya tsaaputyishi  
kutrayatranishi, Iusi gayawatyami utyishani emi noyu  
29 ga-matsi niya tsinattanishi. She si-utoni, yuku si tsu-  
se, gayanatyumetyiatyishi gakana tuwe niwatasha-  
kutruwatrumsa, tsatsi tsiwaatsishi nyeyishipena-kusa-  
30 natyishi. E tsika noyu kutyeeema hatrutsai dyu nutrao-  
shratya-kusa, yuku ma tseshi nutratsia-kusatyishi, tsa-  
31 yisomeshtanishi hawe wa uanutsani. Emi heya tru-  
wayukai, e putyumisha gowa hatsu ma na chami  
kashraityi tsatsi shikutyitsima sai haupa uapanatsi,  
32 gapishu ma e settyu tsi sawanashityitrani. She shru,  
tyumutyaimishi, Iusi dyika dyu shrayayata, e tsika ga-  
tinye ga-mani dyika, emi itye dyu nyeyaatra-kutruwa-  
truma, e sai haupa tsityumi tseemishi kutruwataatsi  
33 nyeyiweetyitratyka-kutruwatrumsa. Tsatsi hau hano ga-  
sawaka, ku ga-uru, ku ga-wakuni ukeso niya shityi-  
34 utsiputya. Ha, Noyu shru-tonimasa towa hamashi-  
tyini tsi shikutsiputyaishi e tsika hawe sayiwatyisetyishi  
35 tsi tsiwatsiputyaishi e-shikayiwatrani. Sai tsi shraya-  
waseni gowa shiku-tanitrani gaika tsatsi kashatsishi  
ayiwamatsanittyi e Huchani Jesus ga-mani utsiputyaishi  
gowa e-katsanishi: Mi na mame uiyeetyi ta ayaapi,  
tsatsi hemaku ayaawi.  
36 E emi taa ga-mashrani, nu chaashutotru, e kutaatsi  
37 amoma tyitra. E sai haupa mame tsishatsi tyatta, e  
38 Paul chuawitsiame ga-witra ye, e tyuutsotsana, mina

## E-TSAAPUTYISHI 21

mame ayama-kusatyi, tseni e-katsanishi niya ka, tsa na ko-wawi niukachana-kusatyishi. E kanue dyika ye sai kayiwatyime.

- 21 She e-chaaitra, ai tseema si yuku sutyekkuiyi, kanue niya sutyekkuiyi tu shitutsi Cos hema sutyeku, e shrue ai nanu Rhodes hema sutyeku, e shrue ai si  
2 yuku Patara hau, e ai si Phoenicia hake wa tsunyeku-nishi kanue si-yainawatyi, hau dyu sutyeebu, e ai yuku  
3 si sutyeku. E shrue Cyprus tyiemi kaaitrani, ai ishu-ya ye wa sutraitratyuni Syria ye wa sutyeku, e shrue ai  
4 Tyre dyika hatsi dyika ye dyu sutyeku, she emi ai  
5 kanue tsi gaishityimishi nu niutyikutyu. E tsayisome-shitanishi siwatyainawatyi, maityana sai ai saata. E towa Paul dyika tyaana, Maiani niya, tsatsi Jerusalem  
6 ye uatsini. E e-chaaitra, tsaashityi sutruwa-unaottani, ai si yuku ye wa sutyeku, e sai haupa, kuiya-witra e iatra ishikaku sayiwatyime, tsaashityitra kupichanishra hema, e ai kawaishu butru saashutotrume e amoma  
7 siitrana, e saya-uishatsanitattyi, hinome tyitra kanue dyu sutyeebu, etyu wee tsika na gatrutya ye si tseeku.  
8 E Tyre dyika si hiana kuinaottani, Ptolemais hau sutyeebyu, e utyumutyaaimishi gowa-tsi sayatrana, e  
9 ishika sai ai tseema saata. Shrue ai nanu Paul sayiwayisetyishi ai si yuku sutyeku e Caesarea hau sutyetyu, e maityana dyika si ishike tseshi Philip kokatseeta  
10 ga-ama hau sutyeebu e ai saata. E towa emi hatrutsai tyana ga-makutya, tu na maku tsaaputyishi, kowakatsetyia taapu.  
11 E ai naoya tsaashityi saatattyi, Judea dyika si hau  
12 kokatseeta Agabus E-tyashi hau tsaatsi. E hawe shikuwa-uiatsini, Paul ga-atyishityumi kayaou e noyu ga-mashityi e kashityi kaupashitya e tyanata: Emi taa Tsityumi Maiani kanata, Ai Jerusalem Horiyu hano, towa atyishityumi hatrutsai emi gashi emi taa niupashityanityu e nanami hano gaya-mashityi dyika  
13 hau nyekuyanatyu. E tsi towa sutra-kanityi, ai gatrutiyishi e hinome tyitra shikaewa si-ukashitaityia tsa Jerusalem ye utsutsi. She etyu Paul shikayipeyuta:

## E-TSAAPUTYISHI 21

Tsi shi dyia kutratta e se-winoshika niunatyumena-tyusa? She tsatsi tu heme nyeepashityanitta-shikau-masatyishi chitye shikautranishra, etyu tsika ai Jerusa-lem dyu Huchani Jesus Christo E-gashi kutsi niya ushityi. E tsatsi dinya si-uchanatyi, heme sutrusa, sutraana: Huchani ga-uwayani e-paaitra.

14      E emi tsaashityi si yuku garu dyu sutyepunu  
15      Jerusalem ye dyu sutyeku. E tsika sayiwatyime  
16      haityi Caesarea-me tsayisomeshitanishi, e hawe tsiyut-  
17      tsee hau Cyprus-me Mnason, hashityitsa tsisomeshi-  
18      tanishi, emi ai ga-ama naata-tutrusatyishi.  
19      E shrue Jerusalem hau sutyetyupi, utyumutyai-  
20      mishi tsiwa-uishityiaani shikuwa-shutsa. E ai nanu  
21      Paul James kutanye, hinome tyitra sayiwatyime, e ai  
22      tsee sai tsaya tsaaputyishi. E gowa-tsi gayatrani, sai  
23      heme ga-tanishi niya Iusi nanami hano dyika ye  
24      e-tsitrinishi tyiwappe. E ga-kanittyi, Huchani tyi-  
25      uamashitana, e tania: Shruckacha, Tyumu, hatsu miri  
tseema utsitokaii dyika mame gowahimatsi. E hishrome  
niya tsiwapeni, nanami hano dyika ye gaatrutyishi  
Horiyu hano shrayisomeshitasu Moses tu utrani,  
shranatasu tsa ga-iatratyaimishi ayiwashikutyitsa-  
nittyi, e tsika tsatsi ayukaii dyika hamashu ani. Kume  
emi tsi shi dyia? Tu sekka tsi hanowishi hau shruni  
n'tyeekukusa, she nutrakani-kusa hishrome hawe  
tsu-shishi. Emi heya towa shraniatyishi e-pitra: Tui  
sutyemaa tyana hatrutsai gowatyashi. Towa payi-  
trutse e shru-taatsi noyu chuyashityi, e nyeyiwama-  
tsani-shru aitsuwani, ga-nushikashi nowashanawana-  
kusatyishi niya ka; e shrue sai haupa niutonimasa-  
kusa hishrome dyika tsi tsiuppetanishi tsatsi tsi  
kaimatsishra, etyu hishrome noyu shitutsi shra-  
anitrutyeyasu, utsitokaii shra-uyukaii. She etyu  
nanami hano tsiwahimatyishi ka-trutsi niya sowadya-  
trana, ayataani hake seyaapetyi, yapaishuni dyika si  
tsiyaityanishi dyika si, e matsi dyika si, e tsi tsi-  
witplashityayutsi dyika si, e iani-utranishi dyika si tsa

## E-TSAAPUTYISHI 21

- 26 hau uiatsini. She shrue Paul emi hatrutsai tyayitrutse e ai nanu kutaatsi noyu chauyashityi, tsityumi katrutyu hau tyiupu, tsiuyashityimi tsaashityi sai heme tyiemi tyitrali, mi hamatyi nowaina tsiyaityanishi nyeyaityani-tsiwatrumanu.
- 27 E shrue maityana sai mameshru nuinaottakuni, Asia-me Horiyu hano ai tsityumi katrutyu gaya tsiukachanatyi, sai tsi hanowishi ganashiyaini tyayatrana e
- 28 gaya-mashityi niya tyityatta, tyiwashigaita: Israel-me hatrutsai, Trayamatsana. Towa emi hatrutsai sai ai shra sai hano gayisomeshitasu hano dyika hake wa, e utsitokaii dyika hake wa, e tui tseshra dyika hake wa, e mi na tsityumi katrutyu gaya ye Grecia-me hano
- 29 tsiyashita, e towa tsityumi tseshra sutsi tsitra. She mishru ai tsaashityitra Ephesus-me Trophimus kuutyisutyutsi Paul taakachana, emi towa tsityumi gaya hawe
- 30 tsipunaimishi taanaetranisha. E sai tsaashityitra kui chaaitra, e tsi hanowishi hau shruni chayapetsa, e Paul tyityatta e tsityumi katrutyu yuku si taaityutsaii,
- 31 e haikamiku tsiamtaashita. E gowa niumutyitsantaumasyatishi tsuukamishatyi, ai kawaipe gowatsikumishi yani tseshi upetani hau tyiuatsi sai Jerusalem
- 32 ganashiyaini tayatrani. E towa haikamiku kawaipe e katsi-wa-katsi kawaipetyiatyishi tyayitrutse e tsi hanowishi dyika ye nu chayapetsa. E towa kukachanatyi yani tseshi e kawaipetyia, Paul tyushikuiyanatyishi tu
- 33 tyitrana. She shrue kawaipetyia yani tseshi haweku tsutyu e tyitya, e dyue kayanutsanishi niya upashityanniti chuwaya; e tyiupeta hau tseshi, e tsi kui tsitranishi. E tsi hanowishi dyika si mika ishike shiya
- 34 tyiwashigaita, etyu mika nanami shiya. E tsi shi dyia mame ganashiyaini tayatrani tsatsi ku-wittawani haityi kaimatsishi, ai kawaipetyia katrutyu ye uitaikkuii
- 35 chuwaya. E kupakkatsa hake dyu hau tsiatsini, kawaipetyia dyu tyitawa, tsi hanowishi ganashiyainishi
- 36 niya ka, she mame tsi hanowishi hamashu tyeeku tyiwashigaitas: Tu paastra.
- 37 She Paul gaika ai kawaipetyia katrutyu dyika gaya

## E-TSAAPUTYISHI 21, 22

ye nyeeyutsee-tsaumasatyishi, kawaipetyia yani tseshi dyika tatsakuiya: Tsa e-nimina-trauma? Emi tatsa-  
38 kuiya: Greek niya tra-ka? Kume tsa emi we Egypt-me tyuta, emi hama ganashiyaini shayatranishi, e tyana miri hatrutsai gayamutyitsityia tsatdyau ye trayatru-  
39 tseyishi? Etyu Paul tyanata: Tu hiname ai Cilicia dyu Tarsus-me Horiyu hatrutsai ruta. Tsatsi drusishu tsaashityitra haashityitrani ruta. She shraushaa tsi  
40 hanowishi dyika amashrani kuyaani. E tsuyaanittyi, Paul kupakkatsa si dyu tyichani e kamashityi dyu e-tyitra, hano dyika. E mame bishityi tsayatranii, Horiyu tseni niya tyayi-iminatyi tyanata:  
**22** Hatrutsai, tyumutyaimishi, e naishityiatyaimishi. Shru hishrome dyika sa-utseshruwani trakanii.  
2 E Horiyu tseni niya tsayiminatyishi gakanittyi, mameshru bishityi tayatra. She e-tyanata:  
3 Kaimatsi ai Cilicia hatsi Tarsus tsaashityitra dyu si-ia Horiyu hano ruta, e etyu tui tsaashityitra si-toni, Gamaliel kashityi yuwi si shika-naishityityaimishi ga-utsitokaiishi niya mame shitutsi shika-someshityia, e Iusi dyika ye wa sa-uhimatsi, emi e wai e-kutyeetyishi.  
4 E towa Hiani ushitonishi dyika hema si-shaya, shi-kaewa hatrutsai e kui tyitra sewapashitayani e utsi-  
5 taani dyika ye si-yashityi-tyitani, emi e tsika chayani yani tseshi shityishityiku shikutrani, e tsika sai haupa tsaya tsaaputyishi emi ai si tsidyatranishi saukkuiya, tyumutyaimishi dyika, e Damascus ye tsu-se, ai gaapashityumetyishi Jerusalem dyika hau ayitrutseyi,  
6 niutsitani-tsiwatru manishi niya ka. She e chaaitra, hake seeni e haweku Damascus hau tseetsini, hatyi tsi suna-tsi-dyia tu tsiwatyi howaka si nu mame mashra  
7 kaaitra, siipishra shriena. E nutsatya nu sa-ucha  
8 e-katsanishi se-ka, shikatsakuiya: Saul, Saul, tsekoma tuishikuiyasu? She si-peyuta: Hau kuta, Huchani? E shikatsakuiya: Tu hiname Jesus, Nazareth-me, emi  
9 shru-shikuiyasushi. E sayiwatyisetyishi mashra tseshi kaimatsi tyiukachana, e chaaputsa, etyu tsatsi tyakani  
10 shikatsakuiyanishi katsanishi. E senata: Tsi e-nitra-si,

## E-TSAAPUTYISHI 22

Huchani? E Huchani shikatsakuiya: Si dyu utattyu, e Damascus hau yaatsi, e ai sai tsi niya nyeepenakutraumasa tsi sekka e-nitra-shrunishi. E tsatsi shityikashityishra emi mashra tsishatsishi niya ka, ai sayiwatyisetyishi gayamashityi niya shikuitaikkuiyanatiy Damascus hau seetsi. E haityi Ananias, utsitokaii ye wa ga-uhimatyishi, e sai ai tseemishi Horiyu hano dyika si tawa tsaanimasatyishi, hau shiku-tsuku-i, e ai si kutyutsimi e shikatsakuiya: Tyumu Saul, Si tyikashityishi-tratya. E emi eyu e-kaaitrani hau dyu si-ukacha. E kanata: Shra-naishityashi ga-Iusi kutru-taata ga-uwayanishi niutoni-shrunishi, e he emi uitonimi tsaanishi niukacha-shrunishi, e tsika si katsanishi nyeka-shrunishi niya ka. She ga-shityishityiku naaitra-shru, sai hano dyika ye, shrukanishi e shrakanishi niya. She shru, Tsekoma shiyukami? Dyu utattyu, e baptisma putyitra, e kutra-ukitsishi dyika si chaatoinaii, Huchani E-gashi shi-shratyitani. She e-chaaitra, tsika na Jerusalem hau seetsini, ai tsityumi katrutyga gaya amoma-sutyekkuiyani, ishikayashu hitseshi-me utsityishitani shikutra, e Jesus si-ukacha shikatsakuiya: Shatru tui Jerusalem yuku si ima. She su-tsi niya shityishityiku shiranishi tsatsi nayaawa-kusatya. She senata: Huchani, shrami kutonimasa hishrome dyika tsiwahimatyishi seyeyashitanishi, e seyashikuiyanishi, sai ayawatyamishra ye; e kutra-shityishityiku Stephen ga-matsi tsiwatseemu ni, tsika hinome ai yuwi si sicanishi niushitokunishi su-heetsi, e tsiumutyitsanatyishi ga-wakunishi suwatrakai. She shikatsakuiya: Ima, She tiye ye nanami hano dyika nikuya-shrauma.

22 E towa katsanishi tyaacatrana; e shrue tsishatsi tyiwashigaitsa e tyana: Taa tse hatrutsai tu paaitra, gaishibishra dyika si. Niianikunishi tsatsi tawa tsanu.

23 E tyiwashigaitsan e kowa-wakunityutawatyi, e wa-

24 shrutsi dyu tyamishitoii, kawaiapetyia yani tseshi kawaiapetyia katrutyga gaya ye niupunaimikunishi chuwaya, tyanatani uishayani niya akaesikuiyani, emi

## E-TSAAPUTYISHI 22, 23

25        heya niutoniku tsekoma emi taa gaapishra hake wa  
kowashigaitisanishi. E eshruka tsiuwashitrani niya  
tsaapashityanittyiatyi, ai yuwi si kuchanishi katsi-  
wa-katsi si kawaiku dyika Paul e-chatsa: Tsi emi  
hatrutsai Roma-me tsanu, e tsatsi na tsaataanatyishi,  
26        uishayani itye e tyuta? E emi katsi-wa-katsi si ka-  
waku towa kakani, yani tseshi kawaiku dyika ye  
tsutyu e tyiuppe, tyanata: Bashru-uni tsi kui kutyekkui-  
27        shi, she towa hatrutsai Roma-me tsa. She yani tseshi  
kawaiku hawe tsutyu e taatsakuiya: Kuppe, Gao  
28        Roma-me tyuta? Ha, Taatsakuiya. E yani tseshi  
kawaiku tipeyuta: Mame naoya sawaka niya towa  
haashityitrani shikaou. Etyu Paul tyanata: Etyu hino-  
29        meku emi e siiia. She tu haikamiku ai gaapishra si  
yuku tyekku gaika nyeekaesikuiyana-tsiumasatyishi; e  
kawaiku yani tseshi tsika chuputsa, kutoni Roma-me  
tseshi, e tsipashityanittyishi niya ka.  
30        She ai nanu, tsiusipu utonimi kaimatsishi tsi shi  
dyia Horiyu hano tsipinaimetyishi, gaapashityanishi  
yuku si tyiutra, e chuwaya chayani yani tseshi e sai  
haupa kayiwatyasetyishi gaishimishetyishi hau uatsini,  
e Paul hake nu tyiyutse, e ai tseema yani si nu tyikuiya.  
23        E Paul kayiwatyametyishi shrami tyiwakachani-  
kuiya, tyanata: Hatrutsai, tyumutyaimishi. Towa  
tsaashityi hema tawa suitonimi Iusi kutsi niya siiani.  
2        E chayani yani tseshi Ananias ai yuwi si tseechani-  
3        shetyishi tyayayanikuiya tsiika nu utyishatsi. She  
Paul e-taatsakuiya: Iusi niutyishatsa-kutruma, sha-  
mutsi tsayatseemi katru kuta. She utsitokaii niya  
ayataani ai si shraa, e utsitokaii hake wa trayayanikuiya  
4        hinome utyishatsi. E ai yuwi si tseechanishetyishi  
tyaana: Iusi ga-chayani yani tseshi sutsi-me chatsa-  
5        kuiya? E shrue Paul tyanata: Tsatsi shikutonima,  
tyumutyaimishi, chayani yani tyeshi, she tsidya-  
trani, Bashrumi kutra-hano ga-huchani kutsi niya  
6        sutsi-me petsakuiya. Etyu Paul kautyumi sunama  
Sadakai hano, etyu mika Pharasee hano tsaaputyishi,  
tsishatsi ai ayawatyamishra tyushigaitsa: Hatrutsai,

## E-TSAAPUTYISHI 23

tyumutyaimishi, Pharasee suta, e Pharasee-me shikumutyi. Ushitoni dyika si dyu uipatyini uiitranishi niya  
7 shika-ataana. E emi taa katsani, Pharasee hanowishi e Sadakai hanowishi shru chuwayatra, she tsi hanowishi  
8 chuwayakuicha; she Sadakai tyaana tsatsi ushitoni dyika si dyu uipatyini tanu, tsatsi puta upeseyi ku maiani tseshi; etyu Pharasee hano shikaewa tyiwhima.  
9 E mame ganashiyaini chaastra; e Pharasee hano tseema tsidyatrani-kusana dyu tyaashratya e mi na tyayakashitayanatyi tyaana: Towa hatrutsai kutsi niya tsatsi tsi sutsi tseshi shityi-yainawatya, e yumushru tsi  
10 maiani ku upeseyi tsiminakuu. E mame mi na ganashiyaini kaaitrani, kawaipetyia yani tseshi kauttityiwatsani tsi shru tsi Paul tsaashigutru-tsananatyau, tyayayanikuiya kawaipe hake nu utsutsi e ai tseema yuku si uttawai sekka, e kawaipetyia katrutyia hawe si uyutseyi.

11 E emi eyu gapishu ni ai gaapishra Huchani hau tyiuatsi, taatsakuiya: Truuishityia, Paul, she ai Jerusalem su-tsi niya shityishityiku shitra, e emi taa ai Rome sekka shityishityiku nitra-shru.

12 E ai nanu kaaitrani, Horiyu hano chayatsikumina, e chayamaawana tyaana tsatsi nutraapbe-tyiusa ku  
13 nutraashikata-tyiusa mi hamatyi Paul kauttawatya. E emi taa chayamaawanatyishi tyana-wa-katsi ye ai yuku  
14 nu taapu. E chayani yani tsaaputyishi e tsaya tsaaputyishi dyika hau tyeeku tyaana: mame kutru shikayamaawani mi hamatyi Paul sa-uttawatya tsatsi  
15 tsi nutraapbe-shikusaty. Emi heya kayiwatyamishi gayaatsi kawaipetyia yani tseshi dyika nippena-kutrusa gowa tsi hawe nu tsiyutseyu, mi na shrami-me niutana-kutrusanu, she hinome tyitra, tsa na haweku  
16 tsiyatsini, haku-shikuwautrani uttawi. Etyu Paul gaguitra ga-mutyi kakani tsaayukamishatyishi, hake tsutyu e kawaipetyia katrutyia hau tyiupu e Paul  
17 tyiuppe. E Paul haityi ishike katsi-wa-katsi gowatsikumishi si kawaiku hawe tyuppeotsa e tyanata: Towa mutye tsa kawaipetyia yani tseshi dyika piyutse ye; she

## E-TSAAPUTYISHI 23

18 haityi tsi uppeni niuppe-tyiuma. She hake tyiyutse, e ai kawaiptyia yani tseshi gaapishra tyiatsi, e tyanata: Paul tsaaitsitanikuiyanatyishi gaapishra dyika ye shikuppeotsa e shiku-wittaa towa mutye tseshi hishrome dyika hau uyutseyi. Tsi haityi uppeni niuppe-truma.  
19 E kawaiptyia yani tseshi kamashityi si tyitya, e nowe hekoma tyiyutse e ai nowe tyiuppeta: Tsi niuppe-tiuma? E tyanata: Horiyu hano tsiwashra niwittaana-tutrumasa nachama Paul hawe uyutseyi, kayiwatyamishra dyika, tyemeshru tsi mina mame  
20 shrami-me uwittaani nya ka. She etyu bashrumi truheetsi tseema; she tyana-wa-katsi ye ai yuku nu hatrutsai tsiyukamisha, kayamaawanatyishi tsa upbewi ku tsa ushikatyi mi hamatyi tsiumuttyitsanatya. She shru haku-kusa nyeewaheetsani-shrunishi kutyi-yuka-  
21 misha. She kawaiptyia yani tseshi mutye tseshi yuku si utsutsi tyiuheetsani, tyiyanikuiya tsa hau hatrutsai  
22 uppeni tsi towa tyuppenishi. E katsi-wa-katsi gowatsi-  
23 kumishi si dyue hawe tyuupeotsa e tyanata: Dyuya-  
katsi-wa-katsi kawaiptyia haku utrani, Caesarea hau hema utsutsi, e maityana-wa-katsi kawayu dyu  
24 tseemishi kawaiptyia, e dyuya-katsi-wa-katsi utsya-  
25 wani nya kawaiptyia, gapishu ni mayuka ura dyika. E adyashi haku piutranittyu Paul heyu dyu nikuiyan-  
26 kusanu, e Felix gauchanishi dyika hau niyutsee-ku-  
27 sanu, tsa tsiunatyumenishi. E tsidyatrani chudyatra towa taa:  
28        Cladius Lysias si, mame dinya huchanishi Felix  
29 dyika, Gowa-tsi. Towa hatrutsai Horiyu hano tsi-  
30 tyatta, e gaika niumentyitsana-tsiumasa, etyu hau tsu-se gaapishra, e kawaiptyia nya si-tragu, Roma-me hano tseshi taa siwittawanishi. E shiku-tsipu utonimi tsi shi dyia uwaitaawani tsaaitsranatyishi ai gayiwatyamishra hawe si-yutse. She ga-uyukaishi nya tsi haityishi dyia tyimaatranattyishi si-yaina, she etyu ushitoni ku upashityani hema tsiwaitaawanishi tsatsi shityi-  
31 yainaku. E tysiemi shika-utranatyishi towa hatrutsai tsaayeetsanishatyishi Horiyu hano dyika si, tu haika-

## E-TSAAPUTYISHI 23, 24

miku hishrome dyika ye si-kuya, seja-yanikuiya tsimaatranityishi tsika hishrome dyika kutsi niya hake wa uwaitaawani.

- 31 She kawaipetyia emi e tsayayanikuiyanatyishi Paul tyiyutsee e Antipatris hau tiwatsinaime, gapishu ni.  
32 Etyu ai nanu, kawayu niya dyu tseema ai tyiatana, hake nayiwatyime-kusatyishi, shrue etyu kawaipetyia katrutyia ye hake si tyeeku. E Caesarea hau tseetyupi, e tsidyatrani tsichu huchani tsaapetyi, tsika  
34 Paul hau ai gaapishra tyikuyana. E tsidyatrani kuukachani tyipeeta haityi hatsi dyika si tseshi.  
35 E kuwittawani Cilicia si tseshi, tyanata: Sai tsi shrami niukashrauma, kutyi-maatranityishi tuwe tseetyupi. E chuwaya ai Herod gayatani katrutyia gaya upinaimi.
- 24 She e shru taama tsaashityi si yuku yani tseshi chayani Ananias, haityi tsaya tsaputyishi kayiwatyimetyi hawe nu tsutyu, e tsika haityi kokatseeta Tertullus E-tyashi, e towa tsichu huchani tyiuppena Paul  
2 kutsi niya. E tsiuppeotsani Tertullus ai ye si tymeaatratta, tyanata:

Mame dinyaa Felix, shrutsi niya mame bishityi tseshi anye-shikuwautranishi niya ka, e tsika shrutsi niya towa hatsi dyu mame tawa utanitrani e-tsiutranishi niya ka, tu dyutsishru e sai haitaa puta shikuanama, sai unamatawani niya. She etyu, tsatsi mina nyiwashityumatawa-shraumanu, shru-wittaa tsa eniwaka-tyuwatruma hatsue tseni niya, shrami kutyeshi niya ka. She towa hatrutsai si-yainawa tsayapakataya, sai gaishibishra dyu tseemishi sai Horiyu hano kotaatsi ganashiyaini gayatyita, e Nazareth-me hano tsikuyeetsita; e tsika emi tsityumi katrutyia sutsi utrani kuuta. Emi sityatta, e sutra-utsitokaiishi niya gaika niutaana-shrusa, etyu kawaipetyia yani tseshi Lysias hau shikuwawatsi e mame tsishatsishi niya shrayamashityi dyika si yuku tsiyutse, e tsiwaitaawanatyishi gayayanikuiya hishrome dyika hau utsutsi. She tsi emi towa shrayaakaesikuiyanu towa sai tsi niutonimitratya-

## E-TSAAPUTYISHI 24

- 9 shru, tsi shi dyia siuwaitaawanatyishi. E Horiyu hano tsika tyiwashra, tyaana tsi towa chaimatsishi.
- 10 She shrue ai si yuku tsichu huchani kamashityi niya Paul dyika tyiuyashitani, shru amashrani, Paul tyipe-yuta:
- Hishrome towa hatsi dyu mame naoya kashraityi tsayataanikuiya kuta shrami siutonimishi niya ka mame yuku shiku-uishityiaa su-tsi niya seyi peyuta. She shru niutonimi-shru tu menashru katsi dyue tsitra sai Jerusalem ye dyu tsu-sishi, amoma utrani; e tsika tsatsi shityi-yainawatya ai tsityumi katrutyga hau hatrutsai shruni sutruumusi ku tsi hanowishi ganashiyaini ayatytani, tsatsi emi ayawatyamishra ye, ku ai tsaashi-tyitra. Ku tsatsi kaimatsi nitrana-kusatya tsi shiku-maatranatyishi. She etyu towa hishrome dyika shrami e-satsa, towa Hiani dyika emi tsi kui tse hano tsayaniatyishi, sutra-naishityiatyaimishi gaa-Iusishi dyika amoma-sutyekkuiya, sai tsi utsitokaii kuushranishi e tsika prophet tseshi dyika nu tsidyatranishi shiku-hima; Iusi dyika ye wa su-naetrani emi towa tsika tsiyukamisha, emi ushitoni dyika si dyu uipatyinishi e-n'taku, shikaewa kaya-uitonimishi e tsa kaya-uitonimishi. Emi heya tsika hinome e-sutyekkuiya tu dyutseshru shikaewa Iusi e hano dyika shitutsi na-tsityishitani-sinishi niya ka. She e shru mi hatsuma kashraityi si yuku sa-hanotyaimishi dyika ye umatsanishi e uyaityanishi hau udaikkuiyani niya ka hawe tsu-se. Towa e-utranishi niya ka ai tsityumi katrutyga hau shiku-yainawa, shiku-yashityimishi, tsatsi tsi hanowishi siutaatsi, e tsika tsatsi ganashiyaini ai kaaitrani. Etyu haityi Asia-me Horiyu hano ai tsee, emi gaika tui nu tyee-kusa, uwaitaawani niya ka, shraapishra tui yani nu, tsi emi tsi haityishi dyia sutsi sutyeshi tsiyainawatyanu. Ku e tsika tui tseemishi hatrutsai e-patsia tsi sutsi sitranishi tsiyainawatyishi ayawatyami ai yani si-chanishi, tsi emi tsa towa ishike atsani, ai tseema seechanishi sa-tsanishi: Ushitoni dyika si dyu uipatyinishi niya ka wai hishrome dyika shikaataana.

## E-TSAAPUTYISHI 24, 25

- 22 Etyu Felix, Hiani niya mi na shrami chasomeni, tyiwapakotsa tyanata: Lysias, kawaipetyia yani tseshi hawe nu tsutsi, tsi shru-tsi niya niutaasi. She katsi-wakatsi gowatsikumishi si kawaiku tyiyanikuiya shrami utsitani upinaimi, she etyu gowa-kunu uheetsanittyi, e tsatsi hau haityi ga-ukinityaimishi nyiukashana-tsiumasatyishi ku niutanye-tsiumasatyishi uapakashityi.
- 24 E hatsu sai ai si dyu Felix hau tsutyu, ga-okui Drusilla Horiyu-me tseshi hawe tsiyutseni. She Paul hawe tsu-petyu, e shrue Christo Jesus dyika uhimatyi niya tyiukka. E Paul tsiminatyi uitonimishi, e shrami-hyaanishi, e hawe tsu-nyekunishi ayataanikuiyanishi niya, Felix chuputsa e tyipeyuta: Hake ima towa yaatse, e shrue tsika na haityi e-shikutranishi tsaashityi niuppeotsa-shrauma. She tyiitra Paul sawaka niukkui-tsiumanishi, emi heya tsika naoya wa tyiuppeotsa, e chaatsakuiya. Etyu dyue kashraityi heme kaaitrani, Porcius Festus Felix ga-hamashu hau nu tyiupu, e Horiyu hano naunamatawana-tsiumasatyishi tsitsiputyi Felix Paul gaapashityumi ai tyikuiya.
- 25 She Festus, ai hatsi hawe tsaatsini, chami sai tse  
2 Caesarea dyika si Jerusalem hake dyu tsutyu. She chayani yani tseshi e Horiyu-me dinya tsaaputyishi  
3 Paul kutsi niya taapena, e tyuwittaana e tyiwatsipu Paul kutsi niya e-ayiwatranittyi, emi Jerusalem dyika ye uyutseyi, she tsinaetranisha hiani ai hatyi niyukami,  
4 umutyitsi niya ka. Etyu Festus tayipeyuta Paul ai Caesarea niupinaimikuni, etyu noyu hatsumashu kaai-trani hake tsunyetyu. She e-tyaana payiwaheetsani itye-kusatyishi kutyeema dyika si ayiwatyime e towa hatrutsai uwitaawani tsi emi kutsi niya sutsi tseshi tsanu.
- 6 E shrue katsi sai ai yuku nu ai tseema kukuiyani Caesarea ye nu tsutyu, e ai nanu ayataanishra si dyu  
7 kukuiyani chuwaya Paul hawe uyutseyi. She hawe tsutsi, Jerusalem tsekkuishi Horiyu hano ai shriena tyaashru, e naoya tse e gowa puta sutsi tseshi ayawataawanishi kutsi niya e-tyaana, tsatsi gowa kaimatsi

## E-TSAAPUTYISHI 25

- 8 tyitranatyishi. She Paul noyu kutsi niya kaakaesikuiyani, tsatsi emi Horiyu hano ga-utsitokaii dyika, ku tsatsi tsityumi katrutya dyika, ku e tsika tsatsi Caesar dyika haityi tsi shi dyia sutsi shityi-tranu. Etyu Festus Horiyu hano naunamatawana-tsiumasatyishi tsiusi-putyishi Paul dyika tyipeyuta e tyanata: Jerusalem ye dyu tsunyetru e ai towa shi dyia nyeetaana-tutraumasa,
- 10 hinome dyika? She Paul tyanata: Caesar gayaataanishra ai yani nu si-chani, emi ai gaika nyeetaani-si. Horiyu hano dyika tsatsi tsi sutsi shityiranu, emi
- 11 trutyu mu shrami shru-toni. She tsi emi sutsi sutyee-kuiyanu, ku haityi tsi emi heya gaika niushitosinu, tsatsi tsa e-shikunu ushityi. Etyu haityi tsi towa shiku-waitaawityiatyishi tsatsi kaimatsishranu, tsatsi hau hatrutsai tseema hau nikuya-shityiumanu. Caesar
- 12 dyika su-wittaa. She Festus, kayiwatyamishi gayiminatyi, tyipeyuta: Caesar dyika tru-wittaa? Caesar dyika tsunyeshru.
- 13 She haityi tsaashityi ai si dyu rai tseshi Agrippa, e Bernice, Caesarea hawe tyeeyu, Festus gowa-tsi utrani
- 14 niya ka. E naoya tsaashityi ai gaaapi, Festus Paul kutsi niya rai dyika tyiuppeta tyanata: Felix hau hatrutsai gaapashityumi tui tsikuya, emi kutsi niya Jerusalem ai siipi chayani yani tseshi e Horiyu hano dinya tsaaputyishi shikuppena, tyiwatsiputyishi utaani gaa-pishra dyika. Emi seyipeyuta, tsatsi Roma-me tyitra
- 15 ga-uyukaishi ta, hau hatrutsai ushitoni hau ukuyani, menashru tsiwaitaawanatyishi e tsiwaitaawanatyishi shruni tseetyupi, e tsiuheetsanittyi noyu kutsi niya ayipeyutani, tsiwaitaawanishi ukitsi niya ka. Emi heya
- 16 tui hau shruni tsekkuuyi, ai nanu tsa- pakokani, ai aya-taanishra si dyu sikuiya, e suwaya emi hatrutsai hawe
- 17 uyutseyi. She tsiwaitaawanatyishi ai dyu gaashratyani, tsi sinaetranishi uwaitaawani tsatsi tsi hawe
- 18 tsitranatya, etyu noyu ga-uyukaishi dyika si haityi shi dyia tsiwaitaawana, e tsika hau haityi Jesus niya, emi kushitonishi, etyu Paul mi na tsiiianishi e-chatsasu.
- 20 She towaya shi dyia tsatsi shrami siutonimishi gowa

## E-TSAAPUTYISHI 25, 26

- 21 nippeta-sinishi, siuppeta tsi e Jerusalem ye tsu-nye-tyunu e ai nyeetaana-kunu, towaya shi dyia. She etyu Paul ku-wittaa Augustus rai gayataanishi niya ka upunaimi, suwaya upunaimi mi hamatyi Caesar dyika ye nikuya-si ni. She Agrippa Festus dyika e-chatsa: Hinome tsika towa hatrutsai akani shiku-tsipu. She tyanata: Nachama niukka-shru.
- 22 Shrue ai nanu Agrippa e Bernice hawe tseeyi, mame gaaukenatsi, e ai tsaya-kanishra hau tyaapu, e tsika kawaipetyia yani tsaaputyishi e tsaashityitra yani tsaa-putyishi ai tyee, Festus ga-uwayani niya ka Paul hawe taayutsee. She Festus tyanata: Rai tseshi Agrippa, e sai sayiwatyametyishi, Towa hatrutsai shru-kachana, emi kutsi niya tsi hanowishi Horiyu hano shiku-waitaa-wana, ishikaku Jerusalem e tui si, kowashigaitsanatyi tsa na gaika niikunishi. Etyu si-yaina tsatsi tsi haityi ushitoni hemaku e-tsitrinishi; etyu she noyu Augustus dyika ku-wittaanishi niya ka, su-heetsi hake ukuyani.
- 23 24 She etyu tsatsi tsi kaimatsishi nidyatranishikunu, sa-huchani dyika. Emi heya tuwe uyutseyi-si tui kutyeema, e mame emi tui shraapishi niya ka, Agrippa rai, emi e tsaakaesikuiyanatyishi dyika si tsi shi dyia itye nudyatra-ti. She sinaetrani tseetyu tsi shi dyia tsi tsiutsitanishi tsiukuyanishra, e tsatsi tsika tsiwaitaa-wanishi ukitsi tyiemi niutrani-tsiumanu.
- 25 26 27 She etyu tsatsi tsi kaimatsishi nidyatranishikunu, sa-huchani dyika. Emi heya tuwe uyutseyi-si tui kutyeema, e mame emi tui shraapishi niya ka, Agrippa rai, emi e tsaakaesikuiyanatyishi dyika si tsi shi dyia itye nudyatra-ti. She sinaetrani tseetyu tsi shi dyia tsi tsiutsitanishi tsiukuyanishra, e tsatsi tsika tsiwaitaa-wanishi ukitsi tyiemi niutrani-tsiumanu.
- 28 E Agrippa Paul dyika e-chatsa: Shauheetsanitta noyu tseshruwa-shrunishi amashrani. She Paul kama-shityi niya dyu chaotta, e noyu tseshruwa-kunishi tyamashra:
- 29 30 31 32 Rai Agrippa, mame shiku-uishityaani she wai su-tsi niya itye nyemashra-si kutyeema, sai tsi Horiyu hano shiku-waitaawanatyishi she siutoni Horiyu hano ga-uyukaishi e tsisomeshitanishi niya mame maima shruso. Emi heya shrawittaa shra-ushigitsani niukatyuma.
- 33 34 35 36 She gowa sa-ianitratyani, mutye suaani si yuku, emi tsaya si yuku noyu sa-hanotyaimishi dyika siutaa, e shrue Jerusalem dyu, sai Horiyu hano kutonimasa.

## E-TSAAPUTYISHI 26

- 5 Ai ye si yuku su-tsi niya kutonimasa, tsi emi tsiwatsi-putya shityishityiku utrani, e kutonimasa sa-hano ga-uyukaishi maima sa-uyukaii, Pharasee hano suteshi.
- 6 She shru tui kutyeeema ai si si-chani, sutra-naishityashi ga-Iusi tsi-ushranishi dyika si uiitranishi niya shika-
- 7 ataanatyishi niya ka. Towa tsiushranishi uinaottani tsiuiitranishi niya ka katsi dyu tsitra shraya-hanotyamishi settyutse e nayatru Iusi dyika kayukaii. E towa uiitranishi niya ka Horiyu hano shiku-waitaawani, rai
- 8 Agrippa. Tsekoma niunaetraniku tsa kutyi-uhimatyi-
- 9 shi tsa, tsi Iusi ushitonishi si dyu gayapatyunu? Kaimatsu noyu si-utsityishita Nazareth-me Jesus E-gashi
- 10 hake wa mame tsi naoya e e-nitra-sinishi. E towa tsika ai Jerusalem dyu e-sitra; she naoya tsityumishi hano ai Jerusalem utsitani se-yaashityi, chayani yani tseshi dyika si shikuiyanikuiyani, e shrue tsayiwanatyi, siwa-
- 11 yeetsani. E sai ai shra ayawatyamishra dyika ye naoya wa siwa-tsitanikuiya she siuta sekka ayatrani Iusi dyika sutsi-me atsani. E mame shiku-tsawayanatyishi niya ka, mi emi nanami tsaashityitra ye siwatsitani-
- 12 kuiya. Emi shi dyia Damascus ye wa senirutyeyani, chayani yani tsaaputyishi dyika si shikuiyani e shikui-
- 13 trani, suna tsi-dyia, rai kutyeshi, ai hiani ye howaka si nu mashra si-ukacha, mame mina kushityemitsita, tsatsi hemaku oshratra, hinome e tsika sayiwatyime-
- 14 tyishi ai shriena mashra kaaityita. E sai haupa nutsatya nu sowatyaitansi, atsani se-ka shiku-minatyikuiya, Horiyu hano tseni niya ka: Saul, Saul, tsekoma tuishi-kuiyasu? Ayatyawani dyika uiyanukutsi aya-shru.
- 15 She senata: Hau emi kuta, Huchani? E Huchani ka-
- 16 nata: Tu hinome Jesus, tuishikuiyasushi. Etyu si dyu utattyu e shrashityi niya ai si chutyatsi, she towa emi heya hishrome dyika su-tyiemi-tra, hishrome utaatawi umatsi e shityishityiku n'tashrunishi, shikaewa tsi towa shrukachanishi e tsika tsi tui yani piukacha-shraumanishi; hau nikuya-shraumanishi hano dyika si e nanami hano dyika si, emi hake shra-kuya, gaya-ana ayaatawityi, emi heya tsamishityutsi dyika si mashra dyika hau

## E-TSAAPUTYISHI 26

nayashigutrai-kusatyishi e tsika Satan ga-itye tseshra dyika si Iusi ga-itye tseshra dyika ye, emi hey a ukitsishi ayatoinaimittyi e tsika hinome dyika tsiuhimatyishi  
19 kowataatsi uiyeetyi nayaawa-kusatyano. Emi hey a, Agrippa rai, kaunamatsi si nu utyiemitrani dyika tsatsi  
20 tsa siyukaii shityanu, etyu shikaewa haikamiku ai Damascus tseemishi dyika e shrue ai Jerusalem tsee-  
mishi dyika siwappeta, e tsika sai ai shra Judea hatsi  
dyu tseemishi dyika e nanami hano dyika, emi nowawa-  
taipunaime-kusatyishi e Iusi dyika ye nayashigutrai-  
kusatyishi e uwataipunaimi kushranishi utanitrani e-  
21 nitrana-kusatyishi. Towaya shi dyia tsityumi katrutya  
gaya Horiyu hano shikutyatta e tuyu niumentyitsana-  
22 shikumasa. Emi e Iusi dyika si umatsi sayaou, tu mi  
na wai emi ai si sayanatyi, shikaewa drugashashi e ga-  
chashi dyika shityishityiku sutyekkuiya, tsatsi tsi ishi-  
ka shikanatasunu tu heme prophet tseshi e Moses e-  
23 katsiatyishi e-naaitrakunishi, emi e Christo sekka nuna-  
tyumeku e tsaya hatyi ushitoni dyika si dyu niipa-  
tyuku, e hano dyika e nanami hano dyika mashra  
nyewatraniku.  
24 She emi taa Paul noyu tseshruwakunishi tyama-  
shrami, Festus tsishatsi e-chatsa: Paul, tsatsi shrami  
shru-wittonima. Mame kutra-utymitranishi niya  
25 gowa ma kutyityita. Etyu Paul e-chatsa: Tsatsi kui  
shityeeshra, mame dinya Festus, etyu kaimatsishi e  
26 shitutsi tseshi tseni se-mashra. She rai tseshi tsi  
towa kutoni, tsika emi gaapishra dyika shrami sa-  
tsa. She siutoni tsatsi haityi tsi towa gaapishra tsiushi-  
kumashityishra she towa tsatsi tu ai shukuna ye tsiu-  
27 tranishra. Agrippa rai, prophet tyitra dyika truhima?  
28 Siutoni kutru-himatyishi. She Agrippa Paul taatsa-  
kuiya: Koimishuku Christian naasinishi hake wa niu-  
29 cha-tiuma. E Paul tyanata: Iusi dyika shiku-tsipyi-  
shi shikaewa koimiku e mameku, tsatsi nowe hishrome,  
etyu tsika sai wai shiku-kanatyishi tu hinome e-sutyee-  
shi emi taa e-n'tyeeshi-kusa, tu heme tsatsi towa apa-  
shityumi.

## E-TSAAPUTYISHI 26, 27

- 30 Shrue taa gamashrani, rai dyu tyutattyu, e tsika  
31 Bernice e ai shriena kaatatyishi; e hatsuma yuku si  
tsekkuii chayatyishani-kuiyana, chayania: Towa ha-  
trutsai tsatsi tsi e-tsitranshi emi ushitoni ku apashi-  
32 tyumi hemaku tsanu. E Agrippa Festus dyika e-  
chatsa: Towa hatrutsai nyietoinaimiku tsi tsa Caesar  
dyika kuwittaanu.
- 27 She e-tsiutaanishi Italy ye kanue niya n'tyeeku-  
tutrusa, Paul e haityi mika tsiwatsitanikuiyanishi Julius  
E-gashi kawaipe dyika tayayatana. Towa Julius hau  
Augustus tsaniatyishi kawaipetyia gowatsikumishi emi  
2 ai si. E Asia kawaishu butru tsunyekunishi Adramyt-  
tium-me kanue dyika dyu sutyepu e kawaishu ye wa  
sutyeku, Thessalonica-me Macedonia hano Aristar-  
3 chus sayiwatyise. E ai nanu Sidon hake sutrayitratyu,  
e Julius Paul dyika tawa e-tsiutra ni tsiuheetsani ga-uki-  
4 nityaimishi dyika ye utsutsi, shratsanikunishi niya. E  
ai si yuku kawaishu ye wa sutyekkuii, Cyprus kunyisa  
satsaishita sutyeku, she natrani hake wa gaanishi.  
5 E Cilicia e Pamphylia butruna kuwami kawaishu sutyee-  
kuii, Myra hau sutyeteyu, emi Lycia hatsi tsaashityi-  
6 tra. She ai emi kawaiku Alexandria-me kanue tsiyai-  
nawa, emi Italy ye wa tsunyetyu, e shrue emi ai dyu  
7 shikayashita. E shrue naoya tsaashityi shranaya su-  
tyekkuiyani, Cnidus ye wa sutyekkuiyi she gunaishi  
niya tsatsi hau sutyeteyuku, Crete kunyisa satsaishita  
8 sutyeku, Salmone ye wa, e tu mamu sutraitratyutsi  
ai Fair Havens tsaaniatyishra hau sutyeteyu, ai haweku  
Lasea tsaashityitra ta.
- 9 E ai mame maiku sutyeeemi, e kanue niya ani tsa na  
kautsayumi, she ushruikami bashruku mishru tsiya-  
10 tyutsi, Paul tyiwakashitaya e tyayitsakuiya: Hatrutsai,  
si-utsityishita towa ani niya nyienatyumeniku e naoya  
sutsi naaitraku, tsatsi tu heme tsishityimishi e kanue  
11 dyika, etyu tsika shra-ianishi dyika. She etyu emi ka-  
waiku mi na mame tyiuuhima kanue dyika yani tseshi  
12 tsatsi hemaku Paul tsi e-katsanishi. E ai kanue ga-  
tyitsimishra tsatsi chachukashranu, kuku ai ukuiyani,

## E-TSAAPUTYISHI 27

naoyatse tayawasenitta tsika ai yuku utsutsi, tsi shru  
tsi Phœnix hau tseetyukunu, e ai kuku ukuiyani. Towa  
Crete ai nu kanue ga-tyitsimishra ta, e bunya-kuwami  
13 wa ta. E natrani shranaya kunisa tseeshitaya ni, tsinaetranishatyi gowa tsiwatsiputyishi-me e-naaitraku-  
nishi, kanue si tyaatoinaime e Crete ishikayashu  
14 haweku hake tyeeku. Etyu tsatsi maiku ai si yuku  
mame mi na tsishatsi natrani hake wa tyeeshityiratya,  
15 emi Euroclydon tsaniatyishi. E kanue tsityaatyi, e  
tsatsi na itye natrani dyika hakuma wa gaani, tuwe siu-  
16 heetsanitta e shikayitrutseyea. E Cauda tsaaniatyishi  
drusishu kutaashroma kunyisa satsaishita sutyeetyupi,  
17 mame sowa-tanitrani kanue settyanitta. E dyu tsidaik-  
kuiityi umatsi tsiwatyawani usiushityani niya shruni  
dyu tsiupashityanitta. E kaaputsanishatyi yaai dyika  
hau dyu niyatsikunishi niya ka, heyka kanue tsiyutse-  
yanishi kutyenishu si nu kaukuiyawa, e she tuwe tai-  
18 trutseyea. She mame sowa-tanitrani, gunaishi niya ka,  
ai nanu tsishityimishi shru yuku nu gaishityiruitrani,  
19 e chami tsaashityi kanue heyka tsiyutseyanishi yuku nu  
20 gaukuiyawii, noyu gaya-mashityi niya. E shrue naoya  
saii tse tsa na oshratra ku shityita kowa-tyiemi-tran-  
atyi, e tsatsi tu drusishu gunaiyu shityayawataima, sai  
siitranatyishi natragumi-shrusatyishi sai shikuwaoyu.  
21 Etyu maiku kuwashruikami Paul ai tseema suna si  
chutyatsi, e tyanata: Hatrutsai, gaika niuitrachana-  
tyumasanu, e tsatsi Crete ai yuku kutyekuiyu, she  
towa unatyumeni e aitrawani tsatsi naatra-kutrusatya.  
22 She etyu shru uishityiaani shrawakashitaya, she tsatsi  
hau hatrutsai kutyemaa ga-iani tu naaitratyunu, etyu  
23 nowe kanue. She wai gapishu ni Iusi, emi gashi sutye-  
shi e tsika emi sitanitrani, emi ga-upeseyi ai siipishra  
24 hau kutyatsi, kanata: Bami chuputsani, Paul, she Caesar  
gaapishra ai yani nityatsi-shru, e Mu, Iusi hawe kutyi-  
25 utrani sai kanue dyu shrayawatyimetyishi. Emi heyka,  
hatrutsai, truwaishityia, she Iusi dyika shikuhima,  
emi e shikaapenatyishi, emi taa e naaitraku. Etyu  
26 sekka haityi kutaashroma hau dyu waka nutyeeshrusa.

## E-TSAAPUTYISHI 27

27 Etyu katsi tyana tsitra gapishu ni kaaitrani, ai  
Adria kawaishu ai shra shikayitrutseyani, hatyi tsi suna  
gapishu ni kanue kowatanityita tyinaetranisha hatyi  
28 hatsi haweku hau tseeyatsini, she hatsu katsinishi  
tsityime, e tyiyainawa dyuya katsi wa tsiyumityutsi  
heme katsinishi, e hatsuma ai yuku tsekkuysi tsika na  
tsityime e tyiyainawa katsi taama tsitra wa tsiyumi-  
29 tyutsi. E tsaaputsanisha tsi shru tsi yaonitsa hatsi  
dyika ye dyu waka nutyeeshrusanu, kanue kaatya si nu  
tyana heyka kanue tsityatyishi yuke nu tyayitottyana e  
30 nyeishibitraty-a-kunishi tyiyukamisha. E kanue dyu  
kowatanityita gaika shru kanue dyika si yuku nutraa-  
payu-kusatyi drusishu kanue tsits' dyika nu tyitaatsi-  
me, tyemeshru tsi emi heyka kanue tsityatyishi kanue  
dyika ai yani yuke nu nyeyitottyana-kusatyishi me e-  
31 taa, Paul kawaipe yani tseshi e kawaipe tyayitsakuiya:  
tsi emi towa tsatsi kanue dyu tseechukunu, tsatsi itye  
32 naatragumi-kutrusatya. She kawaipe heyka drusishu  
kanue ai si nu tsitottyanishi usiushityani chaotsutru-  
33 tsana, e yuku nu tyitrachanaime. E nyeishibitraty-  
kuni tsiyukamishatyi, Paul tyiwakashitaya sai haupa  
upbewi, tyanata: Wai katsi tyana tsitra tsaashityi  
34 shruwashruikami, e tsatsi tsi kutraapbetya, emi heyka  
shrawapeta upbewi, she towa emi heyka itye nitragume-  
kutrusatyishi niya ka. She ishike hadrani puta kutra-  
35 ya-nushika si tsatsi tu naaitrakunu. E emi taa e-  
katsani, semita dyu tyita, e ai sai haupa tseema Iusi  
dyika tyiunamatyi e kaotsayutsani shru chupbeukuiya.  
36 She sai haupa tyiwaushityia e noyu tsika tyaapbe.  
37 A sai eku kanue dyu sutyeechupishi dyuya-katsi-wa-  
katsi si dyu maityana-wa-katsi shichisu tsitra hano  
38 sutaapu. E shrue chatrukaimetyi, ashranis tsits' dyika  
ye nu tyayishityirui, emi heyka tsa na kanue nyeyutaya-  
39 kunishi niya ka. E gaishibitratyani, ai hatsi tsatsi  
tyiunimasatyaru, she etyu haityi chunatayu tyiukac-  
hana, ai hatyi kawaishu butru yaai tyaashra, e chayi-  
tyishana tsi emi kanue hake dyu uyutseyi itye nitra-  
40 gume-tyiusa. E heyka kanue tsityatyishi gatoiityi, ai

## E-TSAAPUTYISHI 27, 28

tsits' dyika nu tyayityairame, e kanue heyu uishigutraimi gaapashityumishi si tyiushiputawa, e kanue ai yani kutyenishu si dyu tyunutsanatyi natrani dyika ye  
41 wa, hatsi dyika ye wa tayitrutse. Etyu ai dyue tsits' kayawataisutyutsishra hau tyeetyupi, kanue hatsi dyika nu tyityatsinaime, e kanue dyika ai yani kutru chaaitra, e tsatsi na itye ayunani, etyu ai kaatya tsits'  
42 kutashikatsitanishi tsishatsishi niya tyiukayutsa. E kawaipetyia tyinaetranisha tsiwatsitanikuiyanatyishi tsiwanishra, tsi shru tsi hake kowawaishawatsanatyi  
43 gaapayunu. Etyu kawaipetyia yani tseshi Paul ultragumi tyiutsiputyi, emi tsinaetranishatyishi tyiwapakasha, e chuwaya haityi hau ye emi itye uwaishawatsikusatyishi haikamiku tsits' dyika nu utotsi, e hatsi  
44 dyika hau uatsini; etyu kaatyumishi mika ishraka dyika ye dyu e mika tsi haityi kanue kayukanishi ye dyu. She e-chaaitra sai haupa hatsi dyika hau tyeetyu, chaatragumi.

28 She hau chaatragumetyi suwatyu emi kutaashroma  
2 ai emi Melita tsaaniatyishi. E ai tseemishi nanami hano tsatsi tu koimi shityiwashutsanaty, she kowapayana, e sai haupa shikuwashutsana, she emi eyu kaa-  
3 chanishi e gaishitayanishi niya ka. Etyu Paul gotsi shruni kaamakuiyawi, e ai tsipashra dyu tsishani, gaa-  
4 chatyishi niya ka shruwi hawe dyu tyumu e kamashityi si tyityatyishi, e ai tseemishi nanami hano kamashityi si tyityatyishi kukachanatyi chayatyishana: Kume tsa towa hatrutsai tsyawatruta ta? emi bato tsits' kawaishu si tsitragumiku, tsatsi emi e-ee nutyeetyu nii-  
5 kunishi. She etyu kaamawutsutsani shruwi tsipashra  
6 dyu tyaawi tsatsi chunatyumenu. Etyu nyeyishimistratyakunishi ku tu tsiwatyi kushityi nautyaitsakunishi tyinaetranisha. Etyu maiku tsinaetranishatyi e tsatsi tsi haityi kui kaaitranishi kukachanatyi gaatsityishitanishi chayashigutrai, e tyaana, Iusi tseshi.  
7 She e shru ai sutyemishra haweku shriena emi kutaashroma ga-yani tseshi, Publius E-gashi cha-hatsi. Towa emi hake dyu shikayitrutse e chami sai anye

## E-TSAAPUTYISHI 28

- 8 shikuwashutsa. She e-chaaitrani, Publius ga-naishityia ai tyikai, gaachatyishi e tsishigutseetanishi niya tyiwasa, emi gaapishra Paul hake tyiupu e amoma-tyitra e
- 9 kamashityi niya tyupakatsani tysiutsaipunaii. E towa e-tsitrani tsika mika ai kutaashroma tseemishi tyaya-
- 10 yatsanishi hawe tyeeku e tysiutsaipu. Towa tsika tsi naoya niya shikuwashutsana, e ai yuku si kanue niya sutyekuii hau dyu tsishitana tsi niwatsipu-shikuwa-trumanishi.
- 11 She chami tawatra ai yuku nu Alexandria-me kanue niya ai yuku si sutyeku, ai kutaashroma kuku kukuiyanishi, gaudyatranishi Tsoko-kayatyumutyutsishi. E Syracuse hau sutyeyatsi, chami sai ai saata.
- 12 E ai si yuku shriena sutyeku e Rheygium hau sutyetyu, e ai si yuku ishike sai tse kunyisa tseshityitratya, e
- 13 shrue ai nanu Puteoli hau sutyetyu. Ai tyumutyaimishi siwatyainawa e shikuwauttaana maityana sai ai
- 14 ukuiyani. She emi taa Rome ye wa sutyeku. She emi ai si tyumutyaimishi sa-trutsi niya ga-kanatyi, hawe tutrayawataime, Appius tsishityiatyishra e Chamie ai Ukuiyanishra hema. Paul emi gowakachani Iusi tiu-namatawani tyaushigitsishitratya.
- 15 E Rome hau sutyeyupi kawaiapetyia yani tseshi tsiwatsitanishi hau tyyiyata, tsiwatsayumishi yani tseshi dyika, etyu Paul tyyiuheetsani nowe ai haami, tsiutsayumishi sentaru kuutyimutyutsishi.
- 16 She e-chaaitra, chami sai ai yuku, Paul tyuwappeotsa Horiyu hano yani tsaaputyishi e hau shruni tsekkuu tyayitsakuiya: Tyumutyaimishi, Bato tsatsi haityi tsi hano dyika tiitraniku, ku shra-naishityiatyaimishi ga-uyukaishi dyika hake wa tanu, she etyu Roma-me gayamashityishi dyika Jerusalem si shiku-kuyana,
- 17 shikutsitani. Emi hama shikaakaesikuiyanatyi gai ye si nikuyana-shikumasa, she tsatsi tsi shi dyia niushitosinishi tsanu. Etyu Horiyu hano yuku ma gamashraty, Caesar dyika ye uwittaani shikuiyatsitsinaii. She etyu tsatsi tsi shi dyia sa-hano niupinaii-sinishi
- 18 niya ka. Towaya shi dyia shrawappeotsa niwakacha-
- 19
- 20

## E-TSAAPUTYISHI 28

- shrawatrumanishi e nyeyimina-shrawatrumanishi niya ka; emi Israel ga-uiitranishi niya ka towa kayanutsanishatyishi niya sapashityu. She tania: Tsatsi tsi tsidyatranji Judea si shikayaawatya, shru-tsi niya, ku tsatsi haityi tyumutyaimishi tuwe tsekkuishi hawe shityayiwatranitty, shru-tsi niya sutsi-me tsippenatyu ku katsiatya. Etyu shikuwa-tsipu niukana-shraumastyishi gowa shru-tsityishitanishi; she towa tsi kui tse hano niya, siutonimasa sayu ka shra, hake wa tsayania.
- She haityi tsaashityi tsiwashrani, naoya tse hawe ga-ama shichaakuishi, she shrami tyiwappe Iusi ga-itye tseshra dyika shityishityiku tyitrani e tyiwakashitaya Jesus kutsi niya, Moses ga-utsitokaii e prophet tseshi tsidyatranishi dyika si, gayu tse si mi shapuka ni hema.
- E mika tsi katsanishi tyiwahima, etyu mika tsatsi tyiwahimatyi. E tsatsi noyu tsiwashrani ai si yuku tyeeku, Paul towa ishike tseni tyamashrani si yuku: Mame shrami Tsityumi Maiani e-katsa, kutranaishityiatyaimishi dyika, Isaiah prophet tseshi niya, tyanata: Towa hano dyika hau uiatsi-shru, e pimina: Akani niya nutra-kase e tsatsi niwittawana-kutrusaty; E ukachani niya niukachase-kutrusa, e tsatsi mashra nuwautra-kutruwatrumunu. She towa hano gaya-winoshika gayayu, tsayappe pesha me tsaa, e gaya-ana tsechainityishi, tsi shru tsi gaya-ana niya niukachana-kusatyishi, e tsayappe niya nitrakani-kusatyishi, e gaya-wino-shika niya niwittawana-kusatyishi, shrue si kayai-shigutrai e shrami niyatrasi.
- Emi heya putonimasa towa Iusi ga-uitragumi nanami hano dyika tsayaapi, emi tsika n'trakani-kusa.
- E towa mani e-katsani si yuku, Horiyu hano yuku si tyeeku, e mame shruni tyeemusu.
- E Paul dyu kashraityi ai noyu kaushitsanishra kattruya tyaou, e sai heme hawe tsiwatsekkuiyishi tyiwashtsa, chukatsetasu Iusi ga-itye tseshra niya, e Huchani Jesus Christo tsi kutsi niya tayasomeshitatu, kaushigitsishi, hau hano tsatsi tsipakashityi.